

O LE EKALESIA A IESU KERISO O LE AU PAIA O ASO E GATA AI • APERILA 2017

O Le Iahona

**Ua Na o la e Mafai Ona
Avea ma o Tatou Faaola, i. 8**

O a Upumoni ua Tatou Aoao e Uiga
i le Tino mai le Toetu? i. 14

Mauaina o le Saolotoga mai Avega
o le Faatautala Tau Feusuaga, i. 22

Iloa Lou Fili: O le Ala e Tetee Atu ai
i Fuafuaga e Fa a Satani, i. 30



Ua faatuina i luga e tagata faigaluega se faailoga i le tulaga e fausia ai le malumalu o Bern Suitiselani. Sa faapaiaina le malumalu ia Setema 1955 e Peresitene Tavita O. Makei. O le uluai malumalu lea na fausia i fafo atu o Amerika i Matu ma le malumalu muamua na tuuina atu sauniga i gagana e ese mai le Igilisi.

Ata mai le faaaloaloga a le Faletusi o Talafaasolopito o le Ekalesia

Liahona, Aperila 2017



4

O SAVALI

- 4 Savali a le Au Peresitene Sili: E Ola le Tagata Amiotonu I le Faatuatua**
Saunia e Peresitene Dieter F. Uchtdorf
- 7 Savali a Faiaoga Asiasi: Tautoga ma le Feagaiga o le Perisitua**



I LE FAAVAA

O Maria e Toatolu i le Tuugamau, saunia e William-Adolphe Bouguereau

TALA FAAALIA

- 8 O le Togiola a le Faaola: Faavae o le Kerisiano Moni**
Saunia e Elder Robert D. Hales
Ona o loo soifua o Ia, o le a tatou toe ola uma lava.
- 14 O Le toetu o lesu Keriso ma Upumoni e uiga i le Tino**
Saunia e David A. Edwards
Ua aoao mai e le Toetu o Iesu Keriso ia i tatou upumoni taua e uiga i le faavavau ma le natura paia o le tino.
- 22 O se Alalaupapa i le Faamoe-moe ma le Faamalologa**
Saunia e Nanon Talley
E mafai faapefea e oe po o se tasi e pele ona maua le filemu, faamoemoe, ma le faamalologa i le mavae ai o se mea e leaga ma matautia e pei o le sauaina i feusuaiiga?

- 28 O Le Tusiata Tuai a le Aiga: O Le Mana o Tala Faaleaiga**
Saunia e Amneris Puscasu
O tala ma olaga o ou tuua ua faaauau pea ona faamalosia ai au.

30 Ua Faaauau Pea le Taua

Saunia e Elder Larry R. Lawrence
Ua faasoa mai e Elder Lawrence le fa o fiafuaga a Satani ma le ala e tetee atu i ai.

MATAGALUEGA

- 20 Musika: O mai, O mai ia te la**
Saunia e Steven K. Jones ma Michael F. Moody
- 38 O Ata o le Faatuatua: Skaidrite Bokuma**
- 40 O Leo o Le Au Paia o Aso e Gata Ai**
- 80 Seia Tatou Toe Feiloai: O Le Mana o le Atua**
Saunia e Elder Bruce R. McConkie

AUTALAVOU MATUTUA



44 Malamalama i Lou Faamanu-iaga Faapeteriaka

Saunia e Allie Arnell ma Margaret Willden

O faamanuiaga faapeteriaka e pei o la tatou lava faafanua patino o le ala. O nisi nei o Motugaafa mo le saililiga ia outou faamanuiaga.

48 Saunia mo se Malaga Fou

Saunia e Karina Martins Pereira Correia de Lima

O masalosaloga ma le fefé e uiga i le amataga o lou lava aiga na faapopoleina ai au. E mafai faapefea ona ou maua le filemu?



50

AUTALAVOU

50 E Mafai Faapefea Ona ou Suesue i Lou mafaufau ma Lou Loto?

O le a le ala a le Alii i le sailia o tali i au fesili ma malamalama atili ai i tusitusiga paia?

52 Faapatinoina Lau Suesuega o le Talalelei

Aoao i le auala e mafai ai ona e maua le tele o mea mai lau suesuega o le talalelei.

56 O Tali mai Taitai o le Ekalesia: Pe Faapefea ona Maua le Filemu Moni

Saunia e Elder Quentin L. Cook

57 O Tusi ua Galo, Molimau ua Manatuaina

Saunia e Abegail D. Ferrer

58 Sa Latou Vaai ia te la

Faitau nei molimau o le Faaola Toetu ma tagai pe faapefea ona mafai ona avea foi oe o se molimau o Lona Toetu.

62 O La Tatou Avanoa

63 Pepa Lautele o I Ai se Savali: Savali i Luma le Autau Kerisiano

64 Fesili ma Tali

E mafai faapefea ona ou iloaina o loo faafofoga mai le Atua i au tatalo?



Vaa'i pe mafai ona e mauaina le Liahona o loo natia i le lomiga lenei. Faaiteite: Pe susulu mai?



TAMAITI



79

66 O Andrei ma le Upu Leaga

Saunia e Julie C. Donaldson

O se tamai upu leaga e tasi o le a le faatiga tele, e sao?

68 O Tali mai se Apostolo: E mafai faapefea ona ou fesoasoani i lou aiga ia malolosi?

Saunia e Elder David A. Bednar

69 Saunia mo le Malumalu i Aso Uma

Sister Joy D. Jones

Aoao pe na faapefea ona faia e Sister Jones se sini taua.

70 E Susulu Fetu

Saunia e Jane McBride

Sa popole Fetu i le alu i le Peraimeri mo le taimi muamua. Pe o le a mafai ona ia maua se uo?

72 Avea o se Malamalama!

Saunia e Elizabeth Pinborough

O auala e valu e avea ai ma se uo lelei.

73 Ata Faatusa o le Talafaasolopito o le Ekalesia: Talai Atu le Talalelei

74 Mafaufau ia lesu

Saunia e Lindsay Tanner

Ua aoao Mía e aoaoina e uiga i le faamanatuga.

76 Tala ia lesu: Sa Tuuina Mai e lesu ia i Tatou le Faamanatuga

Saunia e Kim Webb Reid

79 Lili o le Eseta

O Le Lomiga Faamaonia Faa-Samoa a le Ekalesia
a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson,
Henry B. Eyring, Dieter F. Uchtdorf

O Le Korama a Apostetolo e Toasefululu:

Russell M. Nelson, Dallin H. Oaks, M. Russell Ballard,
Robert D. Hales, Jeffrey R. Holland, David A. Bednar,
Quentin L. Cook, D. Todd Christofferson, Neil L. Andersen,
Ronald A. Rasband, Gary E. Stevenson, Dale G. Renlund

Faatonu: Joseph W. Sitati

Assistant Editors: Randall K. Bennett, Carol F. McConkie

Fautua: Brian K. Ashton, Jean B. Bingham, LeGrand R.
Curtis Jr., Christoffel Golden, Douglas D. Holmes, Erich W.
Kopischke, Larry R. Lawrence, Carole M. Stephens

Pule Faatonusili: Peter F. Evans

Faatonusili o Mekasini a le Ekalesia: Allan R. Loyborg
Pule o Mea Tau Pisini: Garff Cannon

Pule Faatonutonu: Adam C. Olson

Pule Faatonutonu Lagolago: Ryan Carr

Lagolago o Lomiga: Cremilda Amaral

Au Tūtusi ma Faatonutonu: Bethany Bartholomew,
Brittany Beattie, David Dickson, David A. Edwards,
Matthew D. Flitton, Lori Fuller, Garrett H. Garff, LaRene Porter
Gaunt, Charlotte Larcabal, Michael R. Morris, Eric B. Murdock,
Sally Johnson Odekirk, Joshua J. Perkey, Jan Pinborough,
Richard M. Romney, Mindy Anne Selu, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, C. Kimball
Bott, Thomas Child, David Green, Colleen Hinckley, Eric P.
Johnsen, Susan Lofgren, Scott M. Mooy, Mark W. Robison,
Rachel Smith, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Glen Adair, Connie Bowthorpe Bridge, Julie
Burgett, Bryan W. Gygi, Ginny J. Nilson, Gayle Tate Rafferty,
Derek Richardson

Tailolomi: Joshua Dennis, Ammon Harris

Faatonusili Lolomiga: Steven T. Lewis

Faatonusili o le Tufufatuga: Troy K. Vellinga

Mo le okaina o mekasini, alu i le store.lds.org po o le
Faletusi Tutotonu i Peseaga. Telefoni 64127. Totogi o le
Mekasini: \$0.55 (Samoa) i le kopi. Totogi mo le Tausaga
Atoa \$6.60 (Samoa).

Auina atu tusitusiga ma faafesili i luga o le

initoneti i le liahona.lds.org; pe meli mai i le *Liahona*,
Rm. 2420, 50 E. North Temple, Salt Lake City, UT 84150-
0024, USA; po o le i-meli: liahona@ldschurch.org.

O Le *Liahona* (o lona uiga i le Tusi a Mamona o le "tapasa"
po o se "faatonuala") e lomia i le faa-Alepania, Amania
(Sasae), Pisilama, Palekeria, Kemupotia, Sepuano, Saina,
Kalaotia, Siekisolovakia, Tenimaka, Take, Igilisi, Esitonita,
Fiti, Finelani, Farani, Siāmani, Eleni, Hanikeri, Initu, Iselani,
Iitoniesia, Italia, Iapani, Kiripati, Korea, Latvia, Litunia,
Malakasa, Masela, Monokolia, Nouei, Polani, Potukale,
Romania, Rusia, Samoa, Saina (ua faafaoigofieina), Slovenia,
Sipaniolo, Suetena, Swahili, Tagalogka, Tahiti, Tai, Toga,
Ulkureuni, Urutu, ma Viatename. (E eseese lava gagana)

© 2017 Puletaofia e le Intellectual Reserve, Inc. Ua taofia

aia tatau uma. Lomia i le lunaite Setete o Amerika.

Faamatлага o le Puletaofia: Wagana ua faaiao atu, e
mafai e tagata taitoatasina ona kopina anomea mai le *Liahona*
mo lo latou faaaogaina patino, ma le saili tupe (e aofia ai
mo valaauga o le Ekalesia). O lenei aia tatau e mafai ona
faaleaoagaina i soo se taimi. O anomea o mea fatino e le
mafai ona kopina pa afai o loa faaiao mai se faaia i le
laina o loo i ai ma le faatufugaga. O fesili mo le Puletaofia
e tatau ona faatuatasi mai i le Intellectual Property Office,
50 E., North Temple St., FL 13, Salt Lake City, UT 84150,
USA; email: cor-intellectualproperty@ldschurch.org.

For Readers in the United States and Canada:

April 2017 Vol. 41 No. 4. O LE LIAHONA (USPS 311)
Samoa (ISSN 1045-0947) is published monthly by The
Church of Jesus Christ of Latter-day Saints, 50 East North
Temple, Salt Lake City, UT 84150. USA subscription price
is \$10.00 per year; Canada, \$12.00 plus applicable taxes.
Periodicals Postage Paid at Salt Lake City, Utah. Sixty days'
notice required for change of address. Include address label
from a recent issue; old and new address *must* be included.
Send USA and Canadian subscriptions to Salt Lake
Distribution Center at address below. Subscription help
line: 1-800-537-5971. Credit card orders (Visa, MasterCard
and American Express) may be taken by phone. (Canada Post
Information: Publication Agreement #40017431)

POSTMASTER: Send all UAA to CFS (see DMM 507.1.5.2).

NONPOSTAL AND MILITARY FACILITIES: Send address
changes to Distribution Services, Church Magazines,
P.O. Box 26368, Salt Lake City, UT 84126-0368, USA.

Manatu mo Afiafi Faaleaiga

O lenei lomiga o loo aofia ai tusiga ma gaoioiga e mafai ona faaaoga mo afiafi faaleaiga.
O ni faataitaiga nei se lua.



"Na Latou Vaai ia te la," itulau 58: o le a
le uiga o le avea ma se molimau a Keriso? A
uma ona faitau le tusiga faatasi o se aiga, e
mafai ona outou talanoaina ni auala e mafai
ai ona e avea ma molimau a Keriso e aunoa
ma le vaai tino ia te la. E mafai ona e mafau-
fau i ni manatu e faalatalata atili atu ai i le
Faaola e pei o le sailia o ni avanoa e auauna
atu ai i tagata sulufai i lou alalafaga, aoao
e uiga i le soifuaga o le Faaola i le taimi o
suesuega i tusitusiga paia, tauisama mo se
ulugalii ina ia mafai ona la auai i le malu-
malu, po o le aapa atu i se uo o manaomia
le fesoasoani. E mafai foi ona e matamata
i le vitio o loo maua i le mormon.org/easter
ma mafaufau loloto i le taua o Keriso ma
Lona toetu mai i o tatou olaga.

Ua faamanatu mai e le **"Saunia mo le
Malumalu i Aso uma,"** itulau e 69:
Atonu e te mafaufau e fai se "po o le
talafaasolopito o aiga ma le malumalu"
mo afiafi faaleaiga. E mafai ona outou
aoao pe faapefea ona fai le faasino igoa
ma saili mo faamaumauga faaleaiga pe
talanoa i le taua o sauniga o le malumalu
ma matamata i ata o malumalu i le salafa
o le lalolagi. Afai tou te nonofo latalata i se
malumalu, e mafai ona outou asiiasi i lotoa
o le malumalu ma talanoaina auala e mafai
ai ona aumaia e malumalu outou ia latalata
atili atu ai i le Tama Faalelagi ma fesoasoani
ia tatou lagonaina Lona alofa.

FAAOPOOPOGA O LOO MAUA I LE INITONETI

O le *Liahona* ma isi tusi a le Ekalesia o loo maua i le tele o gagana i le languages.lds.org.
Asiasi i le facebook.com/liahona.magazine (o loo maua i le gagana Peretania, Potukale,
ma le Sipaniolo) e sue ai savali musuia, manatu mo afiafi faaleaiga, ma mea e mafai ona e
faasoia atu i au uo ma aiga.

AUTU I LE LOMIGA LENEI

E tau mai e numera le itulau muamua o le tusiga.

Agaga Paia, 50

Aiga, 28, 42, 48, 68

Auauna atu, 4, 42, 68

Eseta, 14, 58, 76, 79

Faamatologa, 22

Faamanatuga, 74, 76

Faamanuiaga

faapeteriaka, 44

Faamoemoe, 22, 48

Faaosoosoga, 30, 63

Faataitaiga, 72

Faautatala i Feusuaiaga, 22

Faatuatua, 4, 38, 41, 48, 80

Faaugoga, 70, 72

Feagaiga, 7

Filemu, 48, 56, 62, 66

Gagana Samoa, 40, 66

Iesu Keriso, 8, 14, 30, 56,

58, 74, 76, 79

Lototele, 40, 57, 63

Malamalama, 50, 52

Mana faaleagaga, 4, 30,

63, 80

Molimau, 38, 50, 57, 58

Ola e faavavau, 8, 14

Perisitua, 7, 80

Suesue i tusitusiga paia,

43, 52, 57

Talafaasolopito o aiga, 28

Talafaasolopito

o le Ekalesia, 73

Tapuai i le malumalu, 69

Tatalo, 41, 62, 64

Taua i le Lagi, 30

Tino, 14

Toetu, 8, 14, 58, 76, 79

Togiola, 8, 22, 74, 76



**Saunia e Peresitene
Dieter F. Uchtdorf**

Fesoasoani Lua i le Au
Peresitene Sili

E OLA LE TAGATA AMIOTONU I LE FAATUATUA

O le Aoao ma le Fai Fasimoli

Oloo i ai se tala faa-Iutaia tuai e uiga i se fai fasimoli e lei talitonu i le Atua. I se tasi aso a o la savavali faatasi ma se aoao, sa ia fai atu, “E i ai se mea e le mafai ona ou malamalama i ai. Ua tatou maua aoaoga faalelotu mo le faitau afe o tausaga. Ae sooo se mea lava e te vaai i ai e i ai lava le amioleaga, piopio, le faamaoni, faamasinoga le tonu, tiga, fiaai, ma le faasaua. E foliga mai o mataupu faalelotu e lei faaleleia lava le lalolagi. O lea ou te fesili atu ia te oe, o le a ea sona lelei?”

Sa lei tali mai le aoao mo se taimi ae sa faaauau pea ona savali faatasi ma le fai fasimoli. Na iu ina la latalata atu i se malae taalo o loo i ai ni tamaiti, ua pefua uma, o loo taaalo i le palapala.

“O loo i ai se mea ou te le malamalama i ai,” o le tala lea a le aoao. “Vaai i na tamaiti. Ua ia i tatou le fasimoli mo le faitau afe o tausaga, ae o loo eleelea a na tamaiti. O le a le lelei o le fasimoli?”

Sa tali mai le fai fasimoli, “Ae le aoao e, e le talafeagai le tuuaia o le fasimoli mo nei tamaiti palapala. O le fasimoli e tatau ona faaaoga a o lei mafai ona faataunu lona faamoemoega.”

Sa ataata le aoao ma fai mai, “Sao lelei.”

O le a Faapefea Ona Tatou Ola?

Na aoteleina e le Apostolo o Paulo le uiga o le avea ma se tagata talitonu, i le siiina mai o se perofeta o le Feagaiga Tuai ina ua ia tusia, “E Ola le Tagata Amiontu i le Faatuatua” (Roma 1:17).

Atonu i lenei faamatalaga faigofie tatou te malamalama ai i le eseesege i le va o se tapuaiga e vaivai ma le le aoga, ma se tasi lea e i ai le mana e liua ai olaga.

Ae o le malamalama i le uiga o le ola i le faatuatua, e tatau ona tatou malamalama po o le a le faatuatua.

O le faatuatua e sili atu i le talitonu. O le talitonu atoatoa

lea i le Atua faatasi ma le faatinoga.

E sili atu nai lo le moomoo.

E sili atu nai lo le na ona nofonofo, luelue o tatou ulu, ma faapea mai tatou te ioeina. Pe a tatou fai atu “E Ola Tagata Amiontu *i le faatuatua*,” o lona uiga e taijalaina ma taitaiina i tatou e lo tatou faatuatua. Tatou te *faatinoina* i se ala lea e ogatusa ma lo tatou faatuatua—e le ona o se lagona o le usiusitai ma le le manatu i ai ae ona o se alofa mautinoa ma le faamaoni mo lo tatou Atua, ma mo le poto le mafaatauina ua Ia faaalia mai i Ana fanau.

O le faatuatua e tatau ona o faatasi ma le faatinoga; pe o le a leai se ola (tagai i le Iakopo 2:17). E le o se faatuatua lava. E le o i ai le mana e suia ai se tagata e toatasi, aemaisse lava le lalolagi.

O Alii ma tamaitai o le faatuatua e faalagolago i lo latou Tama Faalelagi e alofa mutimutivale—e oo lava i le taimi o le le mautonu, e oo lava i le taimi o le masalosalo ma faigata atonu pe a latou le mafai ona vaai atoatoa pe malamalama lelei i ai.

O Alii ma tamaitai o le faatuatua e savavali ma le nau-nautai i le ala o le avea ma soo ma taumafai e mulimuli i le faataitaiga a lo latou Faaola pele, o Iesu Keriso. O le faatuatua e uunaia ai ma, e moni lava, e musuia ai i tatou e liliu atu o tatou loto i le lagi ma ia aapa atu ma le mataalia, sii i luga, ma faamanuia o tatou uso a tagata.

O le tapuaiga e aunoa ma le faatinoga e pei o le fasimoli o loo tumau pea i le pusa. Atonu e i ai ona gafatia ofoofogia, ae o le mea moni lava e i ai se mana itiiti e faia se eseesegea seia oo ina faataunu lona faamoemoega atofaina. O le talalelei toefuataiga a Iesu Keriso o se talalelei o le faatinoga. E aoao mai e le Ekalesia a Iesu Keriso le tapuaiga moni i le avea ai ma se savali o le faamoemoe, faatuatua, ma le alofa mama, e aofia ai le fesoasoani atu i o tatou uso a tagata i ni auala faaleagaga ma le faaletino.

I ni nai masina ua mavae, sa matou o ai ma, lou toalua,



O Peresitene Uchtdorf ma lona afafine, o Antje, na asiasi atu i tagata sulufai i se tolauapiga e lata i Atenai, Eleni.

o Harriet, i se malaga faaleaiga ma nisi o la ma fanau i le eria o le Meititirane. Na matou asiasi atu i ni tolauapiga a tagata sulufai ma feiloai ma aiga mai ni atunuu ua faatafunaina e le taua. O nei tagata e le mai la tatou faatuatuga, ae o i latou o o tatou uso ma tuafafine ma na latou manaomia vave lava se fesoasoani. Sa matua ootia o matou loto ina ua matou vaia e i matou lava pe faapefea e le faatuatua ola o o tatou tagata o le Eklesia ona aumaia le fesoasoani, toomaga, ma le faamoemoe i o tatou uso a tagata e le tagolima, e tusa lava po o a a latou tapuaiga, atunuu, po o aoaoga.

O le faatuatua e tauave faatasi ma le faatinoga faifai pea e tumu ai le loto i le agalelei, o le mafaufau i le poto ma le malamalama, ma le agaga i le filemu ma le alofa.

E mafai ona faamanuiaina uma e lo tatou faatuatua ma le faatosinaga

amiotonu i latou o siomia i tatou ma i tatou.

E mafai e lo tatou faatuatua ona faatumulia ai le lalolagi i le agalelei ma le filemu.

E mafai ona suia e lo tatou faatuatua le inoino i le alofa ma fili i ni uo.

O tagata amiontu, la, e ola i le faatinoina o le faatuatua; latou te ola i le faalagolago i le Atua, ma savavali i Ona ala.

Ma o le ituaiga lena o faatuatua e mafai ona suia ai tagata taitoatasi, aiga, nuu, ma le lalolagi. ■

AOAO ATU MAI LENEI SAVALI

Na faamalamalama mai e Peresitene Uchtdorf o le faatuatua e sili natu nai lo na o se faaalia o le talitonu. O le faatuatua moni i le Tama Faalelagi ma lesu Keriso e manaomia ai le faatino, ma o le ola i le faatuatua e i ai le mana e liua ai olaga ma aiga. E mafai ona e valaaulia i latou e te aoaoina e faasoa mai ni taimi na latou vaiai ai faamanuiaga ma le mana o le ola ai i le faatuatua—mai faataitaiga faaletagata lava ia po o le matauina o isi. Uunaia i latou e tatalo mo se taitaiga ia iloa ai pe faapefea ona sili atu ona ola i le talalelei.

Auauna atu i Isi i le Faatuatua

Ua tau mai ia i tatou e Peresitene Uchtdorf faapea o lo tatou faatuatua i le Atua e *tatau* ona "o faatasi ma le faatinoga." Pe afai o lo tatou faatuatua ua "tauamo faatasi ma lona faatinoga faifai pea," ua ia faamalamalama mai, e "tumu . . . le agaga i le filemu ma le alofa." Faatasi ai ma le folafolaga o lenei faamanuiaga, e *mafai* ona tatou faia se esesegia, ma e mafai ona tatou vaaia lenei mea i o tatou olaga pe a tatou faaaluina le taimi e fai ai auaunaga e tumu i le faatuatua. E mafai ona e tatalo i taeao taitasi e ole atu i le Alii mo se fesoasoani i le auauna atu i isi. Mo se faataitaiga, fai atu ia te la e faaali atu ia te oe se taimi e manaomia ai e sou tei le fesoasoani i se galuega po o le manaomia e se uo o se faamalo. Ma, pe a e mauaina se uunaiga, faatino loa! Afai e te faia nei tatalo ma lenei auaunaga o se mausa, ona faamanuiaina lea o lou olaga ma olaga o isi e lau faatinoga faamaoni. Ua folafola mai e Peresitene Uchtdorf, e "mafai ona e suia tagata taitoatasi, aiga, nuu, ma le lalolagi."




TAMAITI

Faatuatuaina

Faataitai lenei gaoioiga faatasi ma se uo. E *tatau* ona e talitonuina ma mulimuli ma le totoa i a latou taitaiga. Faatasi ai ma se peni po o se penitala i lou lima, moeiini ou mata. Ia tuu atu i lau uo e faamatala atu ia te oe po o fea e tusi ai mata, isu, gutu, ma lauulu i lenei foliga. Ona pupula lea. Na faapefea mai lau ata? E mafai ona e valivaliina le foliga ma toe tusi se isi ia toe taaaalo ai!

O nisi taimi e faigata ai ona mulimuli i faatonuga. Ae a tatou taumafai e mulimuli i le Tama Faalelagi e ala i le faalogo i le Agaga Paia, o le a la fesoasoani ia i tatou. E mafai ona tatou faatuatuaina o ia i taimi uma.



Tautoga ma le Feagaiga o le Perisitua

Ia suesue ma le agaga tatalo lenei savali ma saili ia iloa mea e faasoa atu. E faapefea e le malamalama i le faamoemoega o le Aualofa ona saunia afafine o le Atua mo faamanuiaga o le ola e faavavau?

O le tele o lo tatou malamalama o ni uso o le tautoga ma le feagaiga o le perisitua e faatatau ia i tatou lava ia, o le tele foi lena o le a tatou opoina ai faamanuiaga ma folafolaga a le perisitua.

Na saunoa mai Elder M. Russell Ballard o le Korama a Apostolo e Toasefululu, “O i latou uma o e ua osia feagaiga paia ma le Alii ma e faamamaluina na feagaiga o le a agavaa e maua faaaliga faafetagata lava ia, ia faamanuiaina e ala i auauanga a agelu, e fagatua ma le Atua, e maua le atoaga o le talalelei, ma mulimuli ane, ia avea ma suli faatasi ma Iesu Keriso i mea uma o i ai a lo tatou Tama.”¹

O faamanuiaga ma folafolaga o le tautoga ma le feagaiga o le perisitua e faatatau uma i alii ma tamaitai. Na saunoa mai Sister Sheri L. Dew, le fesoasoani talu ai i le au Peresitene Aoao o le Aualofa, “O le atoaga o le perisitua o loo i ai i sauniga e aupito sili ona maualuga i le



maota o le Alii, e na o le tuufatasia o se alii ma se tamaitai e mauaina ai.”²

Ua tuuina mai e Sister Linda K. Burton, le Peresitene Aoao o le Aualofa, lenei valaau, “Ou te valaaulia outou e taulotolina le tautoga ma le feagaiga o le perisitua, lea e mafai ona maua i le Mataupu Faavae ma Feagaiga 84: 33–44. E ala i le faia o lena mea, ou te folafola atu ia te oe o le a faalauteleina e le Agaga Paia lou malamalama i le perisitua ma musuia ma faagaeetia ai oe i ni auala matagofie.”³

Sa faamoemoe faatonuga a Iosefa Samita i le Aualofa e sau-nia ai tamaitai e “o mai ia maua-inia avanoa & faamanuiaga & meaalofa o le perisitua.” O lenei mea o le a faataunuina e ala i sauniga o le malumalu.

“O sauniga o le malumalu [o ni] sauniga o le perisitua, ae latou [te] le faaeeina tofi faale-Ekalesia i luga o le Alii po o tamaitai. [O nei sauniga e faataunuina] folafolaga a le Alii faapea o lona nuu—alii ma tamaitai—o le a ‘faaeeina ai outou i le mana mai luga’ [MF&F 38:32].”⁴

Mau Faaopoopo ma Faamatatalaga
Mataupu Faavae ma Feagaiga 84:19–40; 121:45–46; reliefsonline.lds.org

FAAMATALAGA

1. M. Russell Ballard, “Alii ma Tamaitai ma le Mana o le Perisitua,” *Liahona*, Sete, 2014, 36.
2. Sheri L. Dew, *i Afafine i Lo'u Malo: O Le Talafaasolopito ma le Galuega a Le Aualofa* (2011), 128.
3. Linda K. Burton, “O le Mana o le Perisitua—Ua Avanoa mo Tagata Uma,” *Liahona*, Jun 2014, 39–40.
4. Autu o le Talalelei, “Joseph Smith’s Teachings about Priesthood, Temple, and Women,” *topics.lds.org*.



Mafaufau i le Mea Lenei

O le a se mea e mafai ona e faia ina ia malamalama atili ai ma maua ai faamanuiaga folafolaina o le tautoga ma le feagaiga o le perisitua?



KETESEMANESALUNIA E.J. KIRK RICHARDS



Saunia e Elder
Robert D. Hales

O Le Korama
a Aposetolo e
Toasefululua

O Le Togiola a le Faaola: FAAAVE O LE KERISIANO MONI

*O le a tatou toetutu uma lava ma avea ma ni tagata
ola pea ona o le taulaga togiola a Iesu Keriso.*

Sa fesiligia le Perofeta o Iosefa Samita (1805–44), “O a ni mataupu faavae autu o la outou tapuaiga?” Na ia tali mai, “O mataupu faavae autu o lo matou talitonuga o le molimau a le au Aposetolo ma Perofeta, e faatatau ia Iesu Keriso, e faapea na maliu o Ia, ma tanumia, ma toetu mai i le aso tolu, ma afio a’ei le lagi; ma o isi mea uma e faatatau i la matou talitonuga ua na o ni faaopoopoga i ai.”¹

Ou te fia tuuina atu foi la’u molimau e uiga i le saunoaga a le Perofeta o Iosefa. O le totonugalemu o mea uma matou te talitonu i ai o lo matou Faaola ma Lana taulaga togiola—“le faamaulalo o le Atua” (1 Nifae 11:16) lea na auina mai ai e le Tama Lona Alo i le lalolagi e faataunu le Togiola. O le faamoemoega autu mo le soifua o Iesu Keriso o le faamaea o le taulaga togiola. O le Togiola o le faavae o le Kerisiano moni.

Aisea e avea ai le Togiola a le Faaola o le totonugalemu o le mataupu faavae o le talalelei i le Ekalesia ma i o tatou olaga?

Mataupu Faavae o le Faatuatua 1:3

O loo taua i le mataupu faavae o le faatuatua lona tolu, “Matou te talitonu e ala i le Togiola a Keriso, e mafai ai ona faaolaina tagata uma, e ala i le usiusitai i tulafono ma sauniga o le Talalelei.”

“Faaolaina” i lenei tusiga e faatatau i le tikeri aupito maualuga o le mamalu i le malo selesitala. E maua e tagata uma e o mai i le lalolagi le toetu, ae ina ia maua le ola e faavavau, o faamanuiaga atoatoa o le alualu i luma e faavavau, e tatau i tagata taitoatasai ona usiusitai i tulafono, maua sauniga, ma osia feagaiga o le talalelei.

Aisea e mafai ai e Iesu Keriso, ma ua na o Ia lava, ona togiola mo agasala a le lalolagi? Na Ia ausia uma lava mea e manaomia.

Na Alofa le Atua ia te la ma Talitonuina o Ia

Na soifua mai Iesu i ni matua Faalelagi i se muai olaga. O Ia o le Ulumatua na Fanaua a lo tatou Tama Faalelagi. Na filifilia o Ia talu mai lava le amataga. Sa usiusitai o Ia i le finagalo o Lona Tama. E masani ona talanoa mai tusitusiga paia i le olioli o le Tama Faalelagi i Lona Alo.

Ua tatou faitau i le Mataio, "Faauta foi o le siufofoga mai le lagi, ua faapea mai, O lo'u Atalii pele lena, ua ou fafia lava ia te ia" (Mataio 3:17).

Ua tusia e Luka, "Ma sa oo mai o le siufofoga mai le ao, ua faapea mai, O lou atalii pele lena: ia outou faalogo ia te ia" (Luka 9:35).

Ma i le malumalu i le laueelele o Nuumau ina ua mavae le Toetu o le Faaola, na faalogoina e tagata le siufofoga o le Tama: "Faauta i lou atalii pele, o le ua ou fafia lava i ai" (3 Nifae 11:7).

E faapitoa lava le ootia o lou loto ina ua ou faitau e faapea ao mafatia Iesu i le faatoaga o Ketesemane, o le Tama, i Lona alofa tele ma le mutimutivale mo Lona Alo Pele e Toatasina na Fanaua, na auina atu se agelu e faamafanafana ma faamalosi ia te Ia (tagai i le Luka 22:43).

Sa Faaaoga e lesu Lona Faitalia e Usitai Ai

Sa i ai ia Iesu le naunau e tuuina atu Lona soifua mo i tatou.

I le Fono sili i le Lagi, o Lusifelo, "le atalii o le taeao" (Isaia 14:12; MF&F 76: 26–27), na fai atu:

"Faauta, o a'u lenei, auina atu a'u, o le a avea a'u mo ou atalii, ma o le a ou laveaiina tagata uma, ina ia leai se agaga e toatasina e se ese, ma e moni lava o le a ou faia lena mea; o le mea lea, ia tuu mai ia te au le mamalu.

"Ae, faauta, o lo'u Atalii Pele, o lē o la'u Pele ma la'u Filifilia mai le amataga, na fai mai ia te a'u—Le Tamā e, ia faia lou finagalo, ma e a oe pea le mamalu e faavavau" (Mose 4:1–2; tagai foi i le Aperaamo 3:27).

Ona o le alofa maoae o le Atalii mo Lona Tama ma mo i tatou taitoatasina, na ia fetalai atu ai, "Auina atu au." Ina ua Ia fetalai "auina atu au", sa Ia faaaogaina Lona faitalia.

"E pei ona silafia au e le Tama, ma ou iloa le Tama: Ou te tuuina atu foi lou ola e sui ai mamoe. . . .

"O le mea lea e alofa mai ai le Tama ia te au, aua ou te tuuina atu lou ola, ina ia ou toe au mai ai.

"E leai se tasi na te aveeseina ia te au, a e peitai au, ou te tuuina atu e au lava. O ia te au le pule e tuuina atu, o ia te au foi le pule e toe au mai ai. Ua ou maua lena poloaiga mai lou Tama" (Ioane 10:15, 17–18).

Pe ana finagalo i ai le Faaola, semanu e mafai e lekeona o agelu ona aveeseina o Ia mai le satauro ma ave sao atu i le aiga i Lona Tama. Ae sa Ia faaaogaina Lona faitalia e ositaulagaina o Ia lava mo i tatou, e faauma Lana misiona i le olaga nei, ma tumau seia oo i le iuga, ma faamaeaina le taulaga togiola.


Na finagalo Iesu e afio mai i le lalolagi, ma na agavaa o Ia. Ma ina ua Ia afio mai, sa Ia fetalai mai, "Aua ou te le'i alu ifo mai le lagi e fai lo'u lava loto, ao le finagalo o Le ua auina mai a'u" (Ioane 6:38).

Sa Muai Faauuina lesu.

Na aoao mai Peteru faapea o Iesu "na silafia lava e ia anamua ae lei faavaeina le lalolagi" (tagai i le 1 Peteru 1:19–21).

O perofeta i tisipenisione uma lava na muai tau maia le afio mai o Iesu Keriso, ma po o le a Lana misiona o le a i ai. E ala i le faatuatua tele, sa faaalia ai ia Enoka se faaaliga ofoofogia o le fanau mai, maliu, Afio ae, ma le Afio Mai Faalua o le Faaola:

"Ma faauta, sa vaai Enoka i le aso o le afio mai o le Atalii o le Tagata, i le tino lava; ma sa olioli lona agaga, ua fai mai: Ua sii i luga le Amiontonu, ma ua fasia le Tamai



Mamoe mai le faavaega o le lalolagi; ma ua ou i ai i le loto o le Tamā e ala i le faatuatua, ma faauta, ua faatasi Siona ma a'u. . . .

“Ma sa fetalai mai le Alii ia Enoka: Vaaí, ma sa vaai o ia ma vaai atu i le Atalii o le Tagata ua sii a'e i luga o le satauro, e tusa ma le tu a tagata;

“Ma sa ia faalogoina se siufofoga leotele; ma sa tapuna le lagi; ma sa aue foafoaga uma a le Atua; ma sa oi le lalolagi; ma sa mavaevae papa; ma sa tutulai mai le au paia, ma sa faapaleina i le aao taumatau o le Atalii o le Tagata, i palealii o le mamalu. . . .

“Ma sa vaaia e Enoka le Atalii o le Tagata ua afio a'e i le Tamā. . . .

“Ma sa oo ina vaaí Enoka i le aso o le afio mai o le Atalii o le Tagata, i aso e gata ai, e afio i luga o le lalolagi i le amiontonu i le va o le afe tausaga” (Mose 7:47, 55–56, 59, 65).

Pe a ma le 75 tausaga ae lei fanau mai Keriso, na molimau mai Amoleka: “Faauta, ou te fai atu ia te outou, ua ou iloa o le a afio mai Keriso i totonu o le fanauga a tagata, e ave i ona luga solitulafono a ona tagata; ma o le a ia togiola mo agasala a le lalolagi; ona ua fetalai mai ai le Alii le Atua” (Alema 34:8).

Na i ai ia lesu ni Agavaa Tulaga Ese

Ua na o Iesu Keriso lava e mafai ona faia le taulaga togiola—na fanau mai i se tina faaletino, o Maria, ma sa ou maua le mana o le ola mai Lona Tama (tagai i le Ioane 5:26). Ona o lenei mana o le ola, sa Ia manumalo i le oti, na faaleaogaina ai le mana o le tuugamau, ma avea ai o Ia ma o tatou Faaola ma le Puluvaga ma le Matai o le Toetu—o le auala lea e mafai ai ona tuuina mai ia i tatou uma lava le faaolataga ma le tino ola pea. O le a tatou tote-tutu mai ma avea ma tino ola pea ona o le taulaga togiola a Iesu Keriso.

Na Togiola ma le Finagalo i ai lesu mo le Uluai Agasala

O loo faapea mai le mataupu o le faatuatua lona lua, “Matou te talitonu o le a faasalaina tagata ona o a latou lava agasala, ae lē ona o le solitulafono a Atamu.”

E ala mai i le faaaogaina o la tatou faitalia, tatou te filifili ai e faatino lo tatou faatuatua. Faatasi ai ma le filiga, e mafai ona tatou salamo; a aunoa ma le Togiola, tatou te le mafaia.



ASO FAANOANO O KOKOKOTA SAUNIA E.J. KIRK RICHARDS

Ua aoaoina i tatou i le Mose, “O lea na oo mai ai le tala i totonu o le lautele o le nuu, e faapea ua togiola le Alo o le Atua mo le uluai sala, lea e lē mafai ai ona tali o agasala a matua i luga o ulu o fanau,” (Mose 6:54).

Ua tuuina mai ia i tatou se aoaoga maoae i le 2 Nifae:

“Ona e pei ona oo mai le oti i tagata uma, e faataunu ai le fuafuaga alofa mutimutivale a le Foafoa Silisiliise, e tatau ona i ai o se mana o le toetutu, ma e tatau ona oo mai le toetu i le tagata ona o le pa’ū; ma na oo mai le pa’ū ona o le solitulafono; ma talu ai ona ua pauu tagata o lea ua vavae ese ai i latou mai luma o le Alii.

O le mea lea, e ao ina i ai se togiola aoao lē gata—vagana o se togiola aoao lē gata e lē mafai e lenei tino pala ona ofu i le tino lē pala. O le mea lea, o le faasalaga muamua na oo mai i le tagata o le a tatau ona tumau pea i se umi e lē gata. Ma afai e faapea, po ua taoto i lalo lenei tino ia pala ma nuti i lona tinā o le eleele, e lē toetu mai” (2 Nifae 9:6–7).

Ua Na o lesu le Tagata Atoatoa

I le Mataupu Faavae ma Feagaiga, ua fetalai mai le Faaola: “Le Tama e, faauta i mafatiaga ma le oti o le na le faia e ia se agasala, o le na e fiafia tele i ai; faauta i le toto o lou Atalii na faamaligiina, le toto o ia o le na e tuu atu ina ia faamamaluina oe” (MF&F 45:4).

Ua na o Iesu le tagata sa atoatoa, e aunoa ma se agasala. O le taulaga i le Feagaiga Tuai o se taulaga i le toto—ma e faasino atu i luma i le taulaga a lo tatou Alii ma le Faaola i

luga o le satauro ina ia faataunuu ai le taulaga togiola. Pe a faia taulaga i le toto i totolu o malumalu anamua, sa faataulagaina e ositaulaga se tamai mamoe mama, e atoatoa i soo se itu. E masani lava ona taua le Faaola i tusitusiga paia “o le Tamai Mamoe a le Atua” ona o Lona mama aiai (tagai, mo se faataitaiga, Ioane 1:29, 36; 1 Nifae 12:6; 14:10; MF&F 88:106).

Sa aoao mai Peteru ua togiolaina i tatou “o le toto taua o Keriso, pei o lo le tamai mamoe e le pona lava e leai foi sona leaga” (1 Peteru 1:19).

Na Aveese e Iesu Keriso Agasala a le Lalolagi

O fuaiupu nei ua faamanino mai ai faapea na totogi e le Faaola le tau mo a tatou agasala e ala i Lana Togiola:

“O i tatou uma, e pei o mamoe, ua se ese; ua tatou taisasi ma liliu atu le tagata i lona lava ala; ma ua faafafa e le Alii i ona luga amioletonu a i tatou uma” (Mosaea 14:6).

“A ua faaalitino mai e le Atua lona lava alofa ia te i tatou, ina ua maliu Keriso ma sui o i tatou, a o tatou agasala pea. . . .

“Aua afai, ua lelei i tatou ma le Atua i le maliu o lona Alo, ina o fai i tatou mona fili, e matua faaolaina lava i tatou i lona soifua.

“Ae le gata i lea, ae ua tatou mitamita foi i le Atua ona o lo tatou Alii o Iesu Keriso, o ia ua tatou maua mai ai nei le leleiga. . . .

“Aua faapei ona avea ma agasala o le toatele ona o le le anaana o le tagata e toatasi ua faapea foi ona avea ma amiontonu ona o le anaana o le toatasi” (Roma 5:8, 10–11, 19).

“Ona taunu ai lea o le upu a le perofeta o Isaia, ua faapea mai, o ia lava na na aveina o tatou vaivai, ma na tauave o tatou mai” (Mataio 8:17).

“Peitai ua le taofia le avea o le Atua ma Atua, ma e maua e le alofa mutimutivale le aia i le tagata ua salamo, ma e oo mai le alofa mutimutivale ona o le togiola; ma ua aumai e le togiola le toetutu mai o e ua oti; ma o le toetutu mai o e ua oti ua toe aumai ai tagata i luma o le Atua; ma faapea ona toefuatai ai o i latou i ona luma, e faamasinoina e tusa ma a latou galuega, e tusa ma le tulafono ma le faamasinotonu. . . .

Ma e faapea ona faataunuu e le Atua ona faamoemoega tetele ma faavavaau, ia sa saunia mai le faavaega o le lalolagi. Ma e faapea ona oo mai o le olataga ma le togiolaina

o tagata, ma lo latou faafanoga ma lo latou pagatia foi” (Alema 42:23, 26).

Sa Tumau Iesu e oo i le luga

Na onosaia e Iesu Keriso tofotofoga, mafatiaga, ositaulaga, ma puapuaga o Ketesemane, faapea foi ma le atuuvale o Kolokota i luga o le satauro. Ma, mulimuli ane, sa Ia faapea mai, “Ua taunu” (Ioane 19:30). Sa ia faamaeaina Lana galuega i le olaga nei ma tumau e oo i le iuga, o lea na faamaeaina ai le taulaga togiola.

Sa Ia faapea atu i le Faatoaga, “Lo’u Tama e, afai e mafai, ia ave ese lenei ipu ia te au; ae aua le faia lo’u loto, ao lou finagalo” (Mataio 26:39).

Ua aoaoina i tatou i le Mataupu Faavae ma Feagaiga:

“O le mafatia lea na oo ai ia te a’u lava, o le Atua lava lea, o le ua silisili i tagata uma, le gatete ona o le tiga, ma tafe toto ai i pu afu uma, ma mafatia ai i le tino atoa ma le agaga—ma manao ai ia Ou le inuina le ipu oona, ma ma’e’e—

“E ui i lea, ia i ai i le Tama le viiga, ma sa ou inu ma faauma ai a’u tapenapenaga mo le fanauga a tagata” (MF&F 19:18–19).

Sa fetalai atu Iesu i lona Tama, “Ua ou tuu atu le viiga ia te oe i le lalolagi: ua ou faaumaina le galuega na e tuuina mai ia te au ou te faia” (Ioane 17:4).

Ona oo lea, i luga o le satauro, “Ua talia le vineta e Iesu ona fetalai ane lea o ia, Ua taunu: ua faagaugau lona ao, ona tuuina atu lea o lona agaga” (Ioane 19:30).



O FEA UA LATOU AVEINA | AI O IA? SAUNIA E J. KIRK RICHARDS

Na afio mai Iesu i le lalolagi, ma tausia lona paia, ina ia mafai ai ona la faatino le taulaga togiola, ma tumau ai e oo i le iuga.

Manatua o la e Ala i le Faamanatuga

I le asō tatou te manatua le taulaga togiola a le Faaola i faatusa o le falaoa ma le vai—o faatusa o Lona tino ma le toto—e pei ona sa faia i le Talisuaga Mulimuli a le Alii faatasi ma Ana Apostolo.

“Ona tago ai lea o ia i le areto, ua faafetai, ua tofitofi, ma avatu ia te i latou, ua faapea atu, O lo’u tino lenei, ua foaiina atu mo outou; tou te faia le mea nei e fai ma faamanatuga ia te au.

“Sa faapea foi ona tago i le ipu, ina ua uma ona talisua, ua faapea atu, O lenei ipu o le feagaiga fou lea i lo’u toto, ua faamaligiina mo outou” (Luka 22:19–20).

I le Ioane 11:25–26 tatou te faitau ai:

“O a’u nei o le toetu ma le ola: o lē faatuatua mai ia te a’u, e ui lava ina oti, a e ola lava ia:

“O tagata ola uma o e faatuatua mai ia te au e le oti lava e oo i le faavavau.”

Tatou te faitau foi: “O a’u le areto ola na alu ifo mai le lagī: pe a ai se tasi i lenei areto ona ola ai lea o ia e faavavau: o le areto foi ou te avatua, o lo’u tino lea, ou te avatua ma ola o le lalolagi” (Ioane 6:51).

“O le ola o le lalolagi” o lona uiga o le ola e faavavau.

E tatau ona tatou saunia i tatou lava ma o tatou aiga i vāiaso uma ina ia agavaa e aai ma feinu i le faamanatuga ma faafou a tatou feagaiga ma loto salamo.

E Alolofa Le Tama ma le Alo ia i Tatou

Na auina mai e le Tama Lona Alo i le lalolagi—le faa-maualalo—e tuuina mai o Ia ina ia faasatauroina ma ia ui atu i mea uma sa tatau ona Ia uia. I le tusi a Ioane ua tatou faitau ai:

“Ua fetalai atu Iesu . . . , O A’u nei le ala, ma le upu moni, ma le ola: e le alu atu lava se tasi i le Tama, pe a le ui mai ia te au.

“Ana iloa e outou o a’u, po ua iloa foi e outou lo’u Tama: e amata nei foi ona iloa o ia e outou, tou te vaai foi ia te ia” (Ioane 14:6–7).

“O le alofa lava lenei, e le ona ua tatou alofa i le Atua, a ua alofa mai o ia ia te i tatou, ua na auina mai foi



lona Alo o le togiola mo a tatou agasala” (1 Ioane 4:10).

Totogi o lona uiga o le faaleleia po o le faamalieina.

Faaiuga

O tagata taitoatasi e o mai i le lalolagi ma mauaina se tino faaelalolagi o le a toetu mai, ae e tatau ona tatou galuluue ina ia maua le faamanuiaga o le faaeaga e ala i lo tatou faamaoni, lo tatou fitalia, lo tatou usiusitai, ma lo tatou salamo. O le alofa mutimutivale o le a maua i le faamasi-noga tonu, ma faatagaina ai le salamo.


Ona ua tatou filifili e mulimuli ma talia Iesu Keriso o lo tatou Togiola, o le a tatou tauave Lona suafa i o tatou luga i le papatisoga. Tatou te tauave le tulafono o le usiusitai. Tatou te folafola atu o le a tatou manatua pea o Ia ma taus i Ana poloaiga. Tatou te faafouina a tatou feagaiga pe a tatou aai ma feinu i le faamanatuga.

E ala i le faafouina o a tatou feagaiga, tatou te maua ai le folafolaga o le mauaina o Lona Agaga e faatasi ma i tatou i taimi uma. Afai tatou te faatagaina Lona Agaga e oo mai i o tatou olaga, ma taitaia o tatou olaga, e mafai ona tatou toe foi atu i le afioaga o le Tama Faalelagi ma lona Alo, o Iesu Keriso, o le La fuafuaga o le fiafia lea mo i tatou—le ata o le faaolataga. ■

Mai se saunoaga, “O Le Togiola,” na tuuina atu i le semina mo peresitene fou o misiona i le Nofoaga Autu o Aoaoga Mo Faifeautalai i Provo i le aso 24 o Juní, 2008.

FAAMATALAGA

1. Aoaoga a Peresitene o le Ekalesia: Josefa Samita (2007), 55.



O LE Toetu O Iesu Keriso MA UPUMONI E UIGA I LE TINO

Saunia e David A. Edwards

Mekasini a le Eklesia

“**O**na fetalai ane lea o ia, Ua taunu: ua faagaugau lona ao, ona tuuina atu lea o lona agaga” (Ioane 19:30). I lena taimi, na tuua ai e le agaga o Iesu Keriso lona tino—o se tino na onosaia mafatiaga ina ia mafai ona Ia Togiola mo agasala a tagata uma ma fesoasoani ia i latou i o latou vaivaiga (tagai i le Alema 7:12–13). O lena tino, ua avea nei o se ipu gaogao, na aveese mai le satauro, na aui i ie, ma na iu lava ina tuuina atu i se tuugamau. I le aso lona tolu, o tamaitai na agai atu i le tuugamau sa i ai iina e fauma sauniuniga mo le tanuina o lena tino.

Ae ua leai se tino.

O le mauaina o le tuugamau avanoa ua na o se amataga. O Maria le Makatala, le au Apostolo, ma le tele o isi na molimauina mulimuli ane se mea faavavega: o le tino toetu, atoatoa o Iesu Keriso, i se tulagamoni ma le foliga faaletagata.

Na faamautinoaina e le Faaola ua malamalama atoatoa i latou o e na vaaitino ia te Ia ina ua mavae Lona Toetu i le ituiga tino sa ia te Ia. Sa ia valaaulia le au Apostolo, mo se faataitaiga, e fetagof i lona tino ina ia mafai

ona faamautinoa atu ia te i latou lava o Ia sa faaletino ae le o se agaga (tagai Luka 24:36–40).¹ Sa Ia taumafa faatasi ma i latou (tagai i le Luka 24:42–43).

A o faataunuina e le au Apostolo lo latou tiute e talai atu le talalelei a Iesu Keriso, sa latou feagai ma le tetee ma sauaga, o nisi o na mea na oo mai ona o lo latou aoaoina atu faapea ua toetu Iesu Keriso ma o se taunuuga o le a toetutu tagata uma (tagai i le Galuega 4:1–3).

I le taimi nei, o loo totonugalemu pea le Toetu o Iesu Keriso i le savali o loo folafolina atu i le lalolagi e Lana Eklesia e pei ona sa i ai muamua. E pei ona saunoa le Perofeta o Iosefa Samita, “O mataupu faavae autu o lo tatou talitonuga o le molimau a le au Apostolo ma Perofeta, e faatatau ia Iesu Keriso, lea na Ia maliu, ma tanumia, ma toetu mai i le aso tolu, ma afio a'e i le lag; ma o isi mea uma e faatatau i lo tatou talitonuga ua na o ni faaopoopoga i ai.”²

O le Toetu e fesoasoani e tali ai fesili autu e uiga i le natura o le Atua, lo tatou natura ma la tatou sootaga ma le Atua, le faamoe-moega o lenei olaga, ma le faamoemoe o loo

*Na aoaoina i
tatou e Iesu Keriso
e ala i Lona
Toetu, i upumoni
taua e uiga i
le tino.*



***Soo se tasi e
le taliaina le
manatu faavae o le
Atua ua faafuina
i se tino ua le talia-
ina uma le Keriso
faaletino ma le
Keriso toetu."***

— Elder Jeffrey R.
Holland

ia i tatou ia Iesu Keriso. O ni nai upumoni nei na faamamafaina mai i le Toetu o Iesu Keriso.

O Loo i le Tama Faalelagi se Tino Faamamaluina

O le manatu faapea e i ai se tino tagata o le Atua e mautinoa lava e maua i le Tusi Paia,³ e faapena foi i le mafaufau masani, ae o le tele o manatu faalelotu ma aga faafilosofia faalelotu ua teena ae lagolago se Atua “e leai ni tino, itutino, po o lagona faamamai,”⁴ talu mai lena taimi, i lenei vaaiga, o le tino (ma le elemene i lona tulaga lautele) e leaga pe le moni, ae o le agaga, mafaufau, po o ni manatu oni mea moni ia o se atua po o le meamoni.

E mamalu ma faigofie ma feteenai, i lea taimi, le faaaliga o le natura o le Atua e ala mai i Lona Alo, o Iesu Keriso.

I le taimi o Lona galuega, na fetalai atu ai le Faaola, “O le ua vaai mai ia te au, ua vaai o ia i le Tama” (Ioane 14:9). O lenei mea na sili atu ona moni ina ua mavae Lona Toetu ma se tino atoatoa, ma ola pea, lea na faailoa mai ai e “ua i le Tama se tino o aano ma ivi e mafai ona pai i ai e pei o le tagata; ua faapea foi le Alo” (MF&F 130:22).

Sa faapea ona faaali mai ai le natura faaletino o le Tama Faalelagi. E pei ona

faamalamalama mulimuli ane e Iosefa Samita, “O se mea e aunoa ma se tino po o ni vaega e leai se mea. E leai lava se isi Atua i le lagi ua na o le Atua e i ai aano ma ivi.”⁵

Na taua faapea e Elder Jeffrey R. Holland o le Korama a Aposetolo e Toasefululu: “Afai e le manaomia le i ai o se tino ma e le manao i ai le Atua, aisea la na togolaina ai e le Togiola o tagata *Lona* tino mai le mana o le otu ma le tuugamau, ma ua faamaonia ai o le a le toe tuueseseina lava *Lona* tino mai *Lona* agaga i le olaga nei po o le faavavau? *Soo se tasi e teenaina le manatu faapea e i ai se tino o le Atua, ua na teenaina foi le Keriso faitino ma toetu.*”⁶

O le Tama Faalelagi e i ai Mana-Silisiliise, Malamalamalama-Atoatoa, ma le Agalelei-Uma

O uiga auaumama silisili o le Tama Faalelagi ua faaalia foi i le mea moni lava o le Toetu o Iesu Keriso. E pei ona saunoa mai Elder D. Todd Christofferson o le Korama a Aposetolo e Toasefululu, “Ona o le moni o le Toetu o Keriso, o masalosaloga la e uiga i le mana silisiliise, malamalamalama atoatoa, ma le agalelei o le Atua le Tama—o le sa tuuina mai *Lona Alo* e Toatasi na Fanaua mo le togolaina o le lalolagi—ua le moni ia”⁷

Ua faamaonia le mana, malamalamalama, ma le agalelei o le Atua i le Toetu o Iesu Keriso, lea e tuu maia le faamaoniga o le poto ma le alofa i le fuafuaga a le Tama Faalelagi ma *Lona* (ma *Lona Alo*) tomai e fai ai.

O i Tatou o Fanau a le Atua.

E pei ona aoao mai e le Tusi Paia ia i tatou, na faia i tatou “i le faatusa o le Atua . . . tane ma le fafine” (Kenese 1:27). O le Toetu o Iesu Keriso na toe faamalosia ai lenei upumoni. O le mea moni, i le itula tonu lava o Lona Toetu, na faamamafaina ai e Iesu Keriso la tatou sootaga ma le Tama Faalelagi, ma faapea atu, “Ou te alu ae i lou Tama, *ma lo outou Tama*; o lo’u Atua, ma lo outou Atua” (Ioane 20:17; faaopoopo le faamamafa).

Na faaali mai e le Faaola faapea o le Atua ma le tagata e le matuai eseese lava le tasi ma le isi i o laua tulaga autu. O le tulaga autu o o tatou tino e tutusa lava ma o tatou agaga,⁸ ma o o tatou agaga na foafoaina i le faatusa o le Atua aua o le natura lena o le mafutaga faalematua-tamaitiiti.

O se Tino o se Meaalofa o le Malosi ma le Mamalu

E ala mai i Lona Toetu, na faaalia ai e le Faaola ia i tatou faapea o se ola faaletino, ua faaofuina i le tino o se vaega taua lea o le tagata e faavavau o le Atua ma Ana fanau. E pei ona faaalia e le Alii ia Iosefa Samita, “O elemene ua faavavau, ma o le agaga ma le elemene, ua soofaatasi e lē matuu’eseeseeina, e mauaina se atoatoaga o le olioli” (MF&F 93:33). O lenei sootaga e le mavavaeeseina e fusia faatasi elemene faaleagaga ma faaletino ina ia tasi le tino ola pea, e le pala, faamama-luina ma atoatoa—pau lea o le ituaiga tino e mafai ona mauaina le atoatoaga o le olioli lea o loo i ai i le Atua.

I se eseesegea, ina ua mavae le mauaina o se tino faaletino ma ua tuueseina lea mai ai e ulu atu i le lalolagi o agaga, “sa [vaai] e ua maliliu i le . . . umi o le tuueseia o o latou agaga mai i o latou tino, o se pologa.” (MF&F 138:50; tagai foi MF&F 45:17).

E oo lava i o tatou tino faaletino o se vaega taua o le fuafuaga a le Tama Faalelagi ma o ni meaalofa paia. Pe a o mai o tatou agaga o le muai olaga i lenei lalolagi, e “faaopoopoina i luga” o i latou (Aperaamo 3:26) ma se tino. E pei ona aoao mai le Perofeta o Iosefa Samita: “Ua tatou o mai i lenei lalolagi ina ia tatou maua ni tino ma tuuina atu ma le mama i luma o le Atua i le malo selesitila. O le mataupu faavae sili o le fiafia e aofia ai le i ai o se tino. O le tiapolo e leai se tino, o lona faasalaga lena.”⁹

E pei ona aoao mai Elder David A. Bednar o le Korama a Aposetolo e Toasefululu: “O o

tatou tino faitino ua mafai ai ona tatou maua se poto masani lautele, loloto, ma le maoae lea e le mafai ona maua i lo tatou i ai i le muai olaga. O le mea lea, o a tatou sootaga ma isi tagata, o lo tatou malosi e iloa ai ma faatino e tusa ai ma le upumoni, ma lo tatou tomai e usitai ai i mataupu faavae ma sauniga o le talalelei a Iesu Keriso e faateleina e ala i o tatou tino faaletino. E pei ona tatou aoaoina i le olaga faitino, tatou te iloaina le agamalu, alofa, agalelei, faanoanoa, le fiafia, tiga e oo lava i luitau o tapulaa faaletino o ni auala ia e saunia ai i tatou mo le faavavau. I se faaupuga faigofie, e i ai lesona e ao ona tatou aoaoina ma aafiaga e tatau ona tatou mauaina, e pei ona faamatala mai i tusitusiga paia, e ‘tusa ma le tino’ (1 Nifae 19:6; Alema 7:12–13).”¹⁰

E faaopoopo atu i mea na aoao mai e le Perofeta o Iosefa Samita, “O tagata uma e fai tino e i ai le mana ia i latou o e leai ni tino.”¹¹ E mafai ona faaosoosoina e Satani i tatou, ae e le mafai ona ia faamalosia i tatou. “E le mafai e Satani ona maileia i tatou i ana faatosinaga sei vagana ua tatou ioe i o tatou lava loto ma gauai atu i ai.”¹²

*O o tatou tino
faaletino o
se vaega taua o le
fuafuaga a le Tama
Faalelagi ma o ni
meaalofa paia. Pe a
o mai o tatou agaga
i lenei lalolagi, ua
latou “faaopoopoina
i luga” (Aperaamo
3:26) ma se tino.*



Mulimuli ane, o le meaalofa o se tino atoatoa, ma toetu e fesoasoani ia aveesea ai i tatou mai le mana o Satani e faavavau. Ana faapea e leai se Toetu, “o le a pulea o tatou agaga . . . e le tiapolo, e le toetutu mai. Ma po ua avea o tatou agaga e pei o ia, ma avea i tatou ma ni tiapolo, o agelu a le tiapolo, ua tapunia i fafo mai luma o lo tatou Atua, ma mau faatasi ma le tamā o pepelo, i le pagatia, e pei o ia lava” (2 Nifae 9:8–9).

O le Agaga ma le Tino e Le Oni Fili

E ui e eseese i laua, e le auai le agaga ma le tino i ni mea moni taua eseese ma faafeagai e lua. E pei ona aoaoina e Iosefa Samita, “E leai se mea e faapea e le tino. O le agaga atoa o se mea e tino, ae ua sili atu ona lelei pe mamā, ma e na o mata e sili ona mamā e mafai ona vaai i ai” (MF&F 131:7–8).

I lona tulaga faamamaluina, ma toetu ua tuuina mai ai e Iesu Keriso le atoatoa o le tuufaatasiga o le agaga ma le tino, ma faapupula mai ai mo i tatou “o le agaga ma le tino, o le tagata lea” (MF&F 88:15). I lenei olaga tatou te taumafai ia “mafaufau-faaleagaga” nai lo “le mafaufau faaletino” (2 Nifae 9:39), ia “[tui] ese le tagata natura” (Mosaea 3:19), ma ia “pulea [o tatou] tuinanau uma” (Alema 38:12). Ae e le faapea ai la, o le agaga ma le tino o ni fili. E pei ona faaali mai e Iesu Keriso, o le tino e le tatau ona inosia ma faamavalugaina ae ia pulea lelei ma suia.

O le Ola i se Tino Faitino e i ai se Faamoemoega Aoga

O le manatu faapea o lenei olaga o se suega e sili atu ona sao pe a tatou mafaufau i mea ua tatou iloa e uiga i

o tatou olaga i le muai olaga ma le mavae ai o le otu. Sa tatou nonofo o ni agaga ae lei o mai i le lalolagi, ma e finalgal le Tama Faalelagi mo i tatou ina ia avea faapei o Ia ma ola faavavau ai ma ni tino faitino faavavau. O nei upumoni e faapea o lo tatou taimi o le tofotofoga i nei tino faaletino e le faafuaseia ae e i ai se uiga ma se faamoemoega moni.

E pei ona faamatalaina e Elder Christofferson: “E ala i a tatou filifiliga tatou te faaali atu ai i le Atua (ma i tatou lava) la tatou tautinoga ma le mana e ola ai i Lana tulafono faaselesitila a o tatou i ai i fafo mai o Lona afioaga, ma i se tino faaletino ma ona mana uma, manaoga, ma naunauga. Pe mafai ea ona tatou faafoeina le tino faaletino ina ia avea o se meafaigaluega ae le o se pule o o tatou agaga? Pe mafai ea ona faatuatuaina i tatou i le olaga nei ma le faavavau i mana faaleatua, e aofia ai le mana e foafoa ai le ola? Pe o le a tatou taitoatasi ma faatoilaloina le leaga? O i latou sa faia o le a “faaopoopoina i luga o o latou ulu le mamalu e faavavau ma faavavau’ [Aperaamo 3:26]—o se itu taua o lena mamalu o le tino toetu, tino ola pea, ma le mamalu.”¹³

O o tatou aafiaga i o tatou tino o i ai nei, e aofia ai a tatou fegalegaleaiga ma le tasi ma le isi, e taua aua o se faatusa o mea o le a oo mai. E pei ona aoaoina e Iosefa Samita, “Ma o lea lava mafutaga ua i ai ia te i tatou iinei o le a i ai ia te i tatou iina, ae o le a nao na faatasia ma le mamalu e faavavau, o se mamalu e lē o ia i tatou i le taimi nei” (MF&F 130:2).

Tatou te Maua le Faamoemoe ia lesu Keriso.

Talu mai lava le vaaiga o le tuugamau avanoa, ua aumaia e le Toetu o Iesu Keriso le faamoemoe ona ua tatou iloaina



*I Lona tulaga faama-
maluina, ma toetu,
ua suitulaga Iesu
Keriso i le tuufaatasiga
atoatoa o le agaga
ma le tino, e faaalia
ai “o le agaga ma le
tino, o le tagata lea”
(MF&F 88: 15).*



Talu mai lava
le vaiga o le
tuugamau avanoa,
ua aumaia ai e le
Toetu o Iesu Keriso le
faamoemoe ona ua
tatou iloaina i Lona
Toetu lo tatou lava
taunuuga.

i Lona Toetu lo tatou lava faamoemoe, lea “o a [tatou] mea
uma na maumau o le a toe mauaina e [i tatou] . . . , pe a
[tatou] faauau i le faatuatua.”¹⁴

O uluai Aposetolo a le Faaola na mafai ona tuuina atu
se molimau lototoa o Lona Toetu ona sa latou vaai ma pai
i Lona tino. Ae sa i ai se mea e sili atu ai nai lo o lena. E pei
lava ona faamalolo e Iesu Keriso ni le atoatoa faaletino ina
ia mafai ona Ia faaalia le mana e faamagalo ai agasala (tagai
i le Luka 5:23–25), Lona Toetu—le faamaoniga moni o
Lona mana e faatoilalo ai le oti faaletino—na avea ma faa-
mautinoaga mo ona soo o Lona mana ina ia faatoilaloina le
oti faaleagaga. O folafolaga na Ia tuuina mai i Ana aoaoga
—o le faamagaloga o agasala, o le filemu i lenei olaga, o
le ola e faavavau i le malo o le Tama—na avea ma aafiaga
moni ma lo latou faatuatua e le maluelue.

“Afai foi ua le toe faatuina Keriso, ua faaleaoga [lo outou]
faatuatua” (1 Korinto 15:17). Ae ona *sā* Ia toetu mai le oti,

e mafai ona tatou “faamoemoe, e ala i le togiola a Keriso
ma le mana o lona toetu, ia faatutu mai outou i le ola
faavavau, ma o le pogai ona o lo outou faatuatua ia te
ia e tusa ma le folafolaga” (Moronae 7:41).

I le taimi o Lona soifuaga faaletino, na valaaulia ai e
Iesu Keriso tagata e mulimuli ia te Ia. Ina ua mavae Lona
maliu ma le Toetu, na sili atu ona manino mai le taunuuga.
Afai o i tatou, e ala i le ususitai i tulafono ma sauniga
o le talalelei, ona atiina ae se “agaga selesitila” i totolu
o i tatou, e mafai ona tatou “maua le tino lava lea e tasi
sa avea o se tino natura” ma “faaolaina e se vaega o le
mamalu selesitila [ma] outou maua i lena taimi lea lava
mamalu e tasi, o se atoatoaga lava.” (MF&F 88: 28–29).
Ua Ia faaalia mai le ala. O Ia o le Ala. E ala mai i Lona
mana—e ala i Lana Togiola ma le Toetu—e mafai ona
maua lenei atoatoaga selesitila, lea e aofia ai se atoatoaga
o le olioli i se tino toetu. ■

FAAMATALAGA

1. Ina ua faaali atu Iesu Keriso i tagata i le Lalolagi Fou, sa Ia fesili ia te i latou—le faitau afe o i latou—e o mai, “taitoatasi,” ma tagotago i Ona lima, vae, ma le itu ina ia mafai ai ona latou molimaunina faapea na latou tagotago ma vaa i le Alii toetu (tagai i le 3 Nifae 11:14–15; 18:25).
2. *Aoaoga a Peresitene o le Ekalesia: Josefa Samita* (2007), 55.
3. Tagai i le Kenese 1:27; Esoto 33: 11; Galuega 7:56.

4. E ui na i ai ni manatu faapena i talitonuga faa-Kerisiano na muamua atu, o lenei faatulagaga faapitoa na maua mai i le Thirty-Nine Articles of the Anglican Church (1563).
5. *Aoaoga: Josefa Samita*, 42.
6. Jeffrey R. Holland, “O Le Atua Moni e Toatasi Atoa Ma Le Na Ia Auina Mai o Iesu Keriso Lea,” *Liahona*, Nov. 2007, 42.
7. D. Todd Christofferson, “O Le Toetu o Iesu Keriso,” *Liahona*, Me 2014, 113.
8. E oo lava i le faaaliga o le muai olaga o Iesu Keriso o se molimau o lenei mea moni, talu ai sa faaali mai ai le tino o Lona agaga o se tulaga faaletagata (tagai i le Eteru 3:16).
9. *Aoaoga: Josefa Samita*, 215.
10. David A. Bednar, “Matou Te Talitonu i le Nofomama,” *Liahona*, Me 2013, 41.
11. *Aoaoga: Josefa Samita*, 215.
12. *Aoaoga: Josefa Samita*, 214.
13. D. Todd Christofferson, “Aisea e Faaipoipo ai, Aisea e Fai ai se Aiga,” *Liahona*, Me 2015, 51.
14. *Aoaoga: Josefa Samita*, 51.

O Mai, O Mai ia te Ja

Ootia

$\text{♩} = 44-48$

Upu na tusia e Steven K. Jones
Fati na tusia e Michael F. Moody

mp

1. Na
(2. Na)
(3. Sa)

L.T.

5

a - fi - o mai i Lo - na a - lo - fa. Le - ai se ta - si Na te le
soi - fua o Ia i le - nei o - la - ga. Ua Ia si - la - fia po - po -
soi - fua o Ia e pei o ta - tou. E ma - nu - ia la - tou e

8

'i pa - 'i ai; O sē pa - gā - tia Na te alo - fa - gi - a; Sē
le - ga u - ma. Le - ai se ti - ga Na te le la - go - na; Le -
ta - li - to - nu. Na te faa - pu - pu - la; faa - ma - gal o a - ga - sa -

rall.

II

a tempo

faa - noa - noa e faa - ma - fa - na - fa - na. Sau, sau ia te
ai sē fia - ai Na te le fa - fa - ga. Sau, sau ia te
la, Ma mu - li - mu - li ia te I - a. Sau, sau ia te

2





14
 Ia.
 Ia. Sau ia ia. A'o - a'o ia Ia. E
 Ia.

 17
 lo - to - mau - la - lo ma a - ga - ma - lu. Sau, sau ia te
 2

 20
 1, 2. Ia.
 3. 2. Na
 3. Sa Inā

 23
 rall. sau, sau ia te Ia.

© 2016 Puletaofia e Steven K. Jones ma Michael F. Moody, Ua Taofia aia tatau uma.
 E mafai ona kopi lenei pese mo le faaaogaina i le fale ma le eklesia i mea e le faapisinisi.



O SE ALALAUPAPA I LE Faamoemoe MA LE Faamalologa

Faatasi ai ma le fesoasoani talafeagai, e mafai e i latou ua afaina i le faatautala i feusuaigna ona maua le faamalologa latou te matuaimanaomia lava.

Saunia e Nanon Tally

Tautua a le AAG mo Aiga, Texas, ISA

Vaai faalemafaufau o loo e tu i le tausiusiuga o se pupu ma e te manao e oo atu i le isi itu o se vanu loloto, lea ua tau mai ia te oe o loo faatalitali mai ai le fiafiaga sili mo oe. A o e saili mo se auala e sopoia ai, ua e iloa se faaputuga o sapalai lea, afai e tuu faatasi i le ala sao, o le a latou fausia ai se alalaupapa e sopoia ai le vanu.

Afai e te le iloa pe faapefea ona fausia le alalaupapa, o le a le aoga le sapalai ma o le a e lagonaina le loto vaivai ma le leai o se faamoemoe. Ae afai e te maua le fesoasoani mai se tagata ua i ai le poto masani i le fausiaina o alalaupapa, e mafai ona faateleina ai lou poto ma lou malamalama ma e mafai ona ausia faatasi ai le galuega.

I le aluga o le 18 tausaga ua mavae, o lau galuega o le saunia lea o ni meafaigaluga ma le taitaiga e fesoasoani ai i tagata e sopoia le vanu o le puapuaga faalelagona po o le faalemafaufau. Mai tagata uma lava na ou fautuaina, e leai ni isi tagata na o mai ua matuai manunua lava nai lo i latou na afaina i le faatautala i feusuaigna. Ua ou vaavia le aafiaga mamafa o lenei lui i le gafatia o le tagata e tumau ai i le iuga.

Ae ui i lea, sa ou oo foi ina iloa le faamalologa tumau mai o tatou tauiviga ma puapuaga e mafai ona maua e ala i lo tatou Faaola. O Lona alofa e siitia ai tagata i fafo mai le pouliuli i le malamalama.

Aisea e Tupu Mai ai i le Faatautala i Feusuaiga Lea Ituaiga o Manua?

O e na sauaina ua tau maia ia te au se olaga e tumu i le atuatuvalo, masalosalo patino, ma isi lagona loloto o le tiga. Na fesoasoani Peresitene Gordon B. Hinckley (1910–2008) ia i tatou e malamalama ai pe aisea e tupu mai ai i le faatautala i feusuaiga lea ituaiga o tiga loloto:

“O loo i ai le faiga leaga, ma matuia o le faatautala i feusuaiga. E faigata ona malamalama i ai. O se faifai lea i le faaaloalo lea e tatau ona i ai i alii ma tamaitai uma. O *se tetee lea i mea na e paia ma faalelagi*. E faataumaoi i olaga o fanau. O se faiga faataumaoi ma *e tatau i ai le faasalaga e sili ona ogaoga* o manua.

“O le maasiasi i soo se alii po o se tamaitai e faatautala i se tamaitiiti i feusuaiga. I le faia o lena mea, o le tagata faatautala e le gata *ua faia se ituaiga e aupito sili ona ogaoga o manua*. Ae tu foi o ia ua tausalaina i luma o le Alii.”¹

O le mana o le foafaina o se mana paia ma le faalelagi ua tuuina mai e lo tatou Tama oi le Lagi i Ana fanau. Na aoao mai e Elder David A. Bednar o le Korama a Apostolo e Toasefululua le faagasologa o le toefanauina: “O le mana o le foafaina o fanau e matuai taua faaleagaga. . . .

O lo tatou Tama Faalelagi ma Lona Alo o tufuga ia ma ua faamatuu mai ia i tatou taitoatasasi se vaega o lo La’ua mana foafoa.”² E leitioa, la, o le solia lea o lenei mana paia o le “agavaa mo le faasalaga sili ona matuia” ma e mafua ai le “ituaiga aupito ogaoga o manua.”

Malamalama i le Tiga

O le faatautala faalefeusuaiga o soo se fesootaiga lea e leai se maliega o i ai e aofia ai uiga e fepaiai ai po o le le fepaiai lea e faaaoga ai se tagata mo le faamalieina i feusuaiga o se isi tagata. O le tele lava o taimi, o e afaina i le faatautala i feusuaiga e tuua ma le fenumiai le mafaufau faapea foi ma lagona o le le agavaa ma le maasiasi, lea e mafai ona toetoe lava a mamafa tele e taulimaina. O le tiga ma le pagatia e aafia ai e ua afaina e masani ona sili ona leaga ona o faaupuga a isi e mafua mai i le malamalama sese i le faatautala i feusuaiga ma ona aafiaga. O nisi tagata na aafia ua tuua’ia i le pepelo po o le tuuaia o le sauaina i se isi itu ona o lo latou faatamala. O isi ua taitaiina sese e talitonu faapea e ao ina latou salamo, e peiseai ua latou agasala ona ua sauaina.

E toatele tagata sa ou galue i ai na aafia i le faatautala i feusuaiga a o laiti pe talavou ua tau atu ia i latou “ia onosai i ai,” “tuu lena mea i le taimi ua tuanai,” po o le “na o le faamagalo a ma faagalo.” O nei ituaiga o faamatalaga—ae maise lava pe a sau mai i uo mamae, tagata o le aiga, po o taitai o le Ekalesia—e mafai ona taitai atu ai le ua sauaina i le faateleina o le faalilolilo ma le maasiasi nai lo le faamalogia ma le filemu. E tutusa lava ma se manua matuia faaletino po o le siama, o nei manua faalelagona e le faigofie ona mou ese pe a le amanaiaina. Nai lo lena, o le fenumiai lena e amata i le taimi o le sauaina e faatupulaia, ma faatasi ai ma le taunuuga o lagona tiga, o le mafaufau o se tasi atonu e suia, e iu lava ina taitai atu i le atiina ae o amioga le lelei. E le o se mea fou i e na sauaina le le iloaina o le mea na tupu ia i latou o se faatautala, ae peitai e mafai ona latou atiina ae ni amioga le lelei ma ni lagona o le tiga

O Hana (ua suaia le igoa) na aafia i le faatautala i feusuaiga i lona laitiiti. E faapei o isi tagata na afaina, sa ia ola ae ma le lagona faapea o ia o se tagata leaga ma e leai se aoga. Sa ia faaluina le tele o lona olaga e taumafai ai ia lava le auauna atu i isi e aveese ai ona lagona o le le “lelei



tele” mo le Tama Faalelagi pe soo se isi tagata e alofa ai. I ana sootaga, sa fefe o ia afai e iloa moni o ia e soo se tasi, o le a latou manatu sa leaga tele o ia e pei ona ia talitonu ai. Sa ia oo i se fefe tele i le teenaina lea na mafua ai le fefe e taumafai ni mea fou i le olaga po o le faia oni galuega faigofie e pei o le valaau i se tasi i le telefonu. Sa faamanuina o ia i se taleni mo le faatufugaga ae sa ia tuua ona o le fefe i le le mafai ona ia taulimaina ni faitioga.

Mo le silia ma le 50 tausaga o ona lagona o le leai o se faamoemoe, leai se malosi, fefe, ita, fenumiai, maasiasi, tuuatoatasi, ma le faaesea na taialaina ai o ia i ana faaiuga i aso taitasi.

Suia o le Tiga i le Filemu

Na puapuagatia le Faaola i “tiga ma mafatiaga ma faaososoga o ituaiga eseese uma.” Sa Ia faia lenei mea ina ia mafai ona Ia “silafia e tusa ai ma la le tino le ala e fesoasoani ai i ona tagata” (Alema 7:11-12). O Lona puapuagatia sa le gata mo a tatou agasala ae faapea foi mo lo tatou faamalologa ina ua mafua lo tatou puapuaga ona o agasala a se isi tagata.

Pe ana fai e i ai o Ia iinei i le taimi nei, ou te vaai faalemafaufau faapea o le a tagi le Faaola ma faamanuia i latou o e ua sauaina i feusuaiga, e pei ona Ia tutulu faatasi ma faamanuiaina sa Nifae (tagai i le 3 Nifae 17). E ui e le o i ai o Ia iinei faaletino, e mafai e Lona Agaga ona faatasi ma i tatou, ma ua Ia saunia se ala mo i tatou e faamaloloina ai, e lagonaina ai le filemu, ma faamagalo atu ai.



Mo le toatele o e ua tiga, o le manatu faapea o le tiga latou te tauaveina e mafai ona suia i le filemu e toeitiiti lava a le mafai ona talitonuina. E masani lava o manua o le ua sauaina e le iloaina ma le amanaiaina e isi mo ni tausaga. O le tiga ua natia e foliga ataata, o se naunautaiga e fesoasoani i isi, ma ola ai i le olaga e pei e leai se mea na sese, ae e i ai pea lava pea iina le tiga.

Sei o tatou faatusatusa le faagasologa o le faamalologa faalelagona i le tausia ma le taulimaina o se manua faaletino. Pe a faapea na gau lou vae, ao e laitiiti. Nai lo le alu i le fomai e togafiti ai, e te tauetuetu solo seia oo ina aluese le tiga loloto, ae o loo i ai pea sina tiga i laa taitasi e te faia. I tausaga mulimuli ane ua e manao ia aluese le tiga, ona e alu lea i se fomai. E tatau ona toe seti ai e le fomai le ponaivi, faamama ese soo se afuaga lea ua faatupulaia, aveese, ma auina atu oe e fai ni togafitiga faamalositino e faamalosia ai lou vae.

O le faagasologa o le faamalologa mai le sauaina e tutusa, lea e tatau ai ona muai iloaina e le tagata na sauaina e moni le tiga ma e mafai ona fai i ai se mea. E aofia i le faagasologa le

AMIOGA MASANI A TAGATA UA AFAINA

O tagata e sauaina e masani ona tauivi ma le sootaga ma tagata ma atonu e sailia pea lava pea le fiafia mai o isi, logonoa, faia ni papupuni e taumamao ai mai tagata e aloese ai mai le faatiga, avea ai ma tagata faita e saili le faafaileleina e ala i gaoioiga faalefeusuiga (e aofia ai ponokarafi ma le faaosofia faaletagata lava ia), po o le faia o le mea e faafeagai tonu ma aloese mai soo se mea e faatatau i le feusuaiga. O le maasiasi e masani lava ona o faatasi ma nei amioga e taofia ai tagata mai le sailia o le fesoasoani mai matua, taitai perisitua, po o se tagata tomai faapitoa aua latou te le malamalama i le sootaga i le va o mea na tutupu ia i latou ma a latou amioga.

I le ola ai i le talalelei, o tagata ua sauaina e agai atu i le soona fai o se mea se tasi po o le isi: o nisi ua ova le tulaga faalelotu. I se taumafaiga e natia mea ua latou manatu o lo latou le agavaa, latou te taumafai ai e faia ia sao mea uma. E lagona e isi faapea o le a latou le toe agavaa lava mo le ola e faavavau ma e i ai taimi e fiu ai i le taumafai.

O LESONA MAI LE MATAUPU FAAVAE MA FEAGAIGA 123

A o faafalepuipuiina le Perofeta o Iosefa Samita i le falepuipui i Lipereti, Misuri, sa ia tusi atu se tusi i le Ekalesia, e aofia ai vaega e 121–124 o le Mataupu Faavae ma Feagaiga, lea e aofia ai le “tiute o le Au Paia e faatatau i e faasaua mai ia te i latou” (MF&F 123, ulutala o le vaega). Na te lei tauina i le Au Paia o e sa mafatia i sauaga ma manua faaletino e tausia o latou tiga ia i latou lava ma faafoliga e pei e leai se mea na tupu. Mafaufau i le auala na tuuina mai ai le fautuaga i le vaega 123 i le faafitalui o le faaautala.



faailoaina o le mea na tupu ma le faatagaina o lagona o le tiga, fefe, ma le faanoanoa ia lagonaina, taliaina, ma faamaonia. E masani lava ona aoga le galulue faatasi ma se tagata poto masani i lenei faagasologa o le faamalologa. (Siaki i lou taitai perisitua ina ia iloa ai pe o maua le Tautua a le AAG mo aiga i la outou eria.)

Pe na mauaina se fesoasoani faapolofesa e le ua sauaina pe leai, e sili atu le tatalo, suesue i le soifuaga o le Faaola ma Lana Togiola, ma asiasi atu e le aunoa ma se taitai perisitua. E mafai ona ia fesoasoani ia faamama avega ma maua musumusuga e fesoasoani i le ua sauaina ia malamalamama i lo latou ttau Faalelagi ma le sootaga ma le Tama oi le Lagi ma le Faaola. E pei ona aoao mai talu ai nei Sister Carole M. Stephens, le Fesoasoani Muamua i le Au Peresitene Aoao o le Aualofa: “Atonu e umi le faagasologa mo le faamaloloina. O le a manaomia ai lou saili atu ma le agaga tatalo i le taitaiga ma le fesoasoani talafeagai, e aofia ai le fefautuaai ma alii ua faauuina ma le tatau i le perisitua. A o e aoao e talanoa ma le loto matala, seti ni tapulaa talafeagai, ma masalo ia saili atu i ni fautuaga faapolofesa. O le faatumauina o se soifua maloloina faaleagaga i le faagasologa atoa e ttau tele!”³

Mo Hana, o lona olaga na oo ina leai se toa lelei o lea na ia sailia ai le fesoasoani. Sa ia iloaina mai lana molimau e mafai ona ia lagonaina le filemu ma le faamalieina i le olaga ae lei lagonaina i latou i se tulaga faifai pea. E ala i le tatalo ma le talanoa i lona epikopo, sa taiialaina o ia i le fefautuaai, lea sa mafai ai ona ia maua ni mea faigaluega na ia manaomia ina ia aumaia ai le mea moni i fafo mai le pouliuli ma faaso atu le avega matautia sa ia tauaveina na o ia. O le faia o lena mea, sa mafai ai ona ia faamatuu ese atu le tiga ma maua ai le filemu sa folafola mai e le Faaola (tagai i le Ioane 14:27). Faatasi ai ma lenei filemu ma le mafanafana na oo mai ai le manao ma le tomai e faamagalo.

O Le Manaomia o le Faamagalo

O le manatu o le faamagalo atu e masani ona faigata mo tagata na aafia i le sauaina ona faalogo i ai, ma e tele lava ina malamalamama sese i ai. Afai latou te manatu o le faamagalo atu o le tuuina atu lea o le tagata faasaua ia saoloto po o le faapea atu o le mea sa latou faia e le o toe afaina, o le a le lagonaina e le na sauaina le faamaonia ina. A o poloaiina i tatou e faamagalo atu (tagai i le MF&F 64:10), i tulaga ia e loloto

ai le afaina, o le faamalologa e masani lava e tatau ona amata a o lei mafai e le ua sauaina ona faamagalo atoatoa le tagata faasaua.

Atonu o i latou o loo mafatia i le tiga na mafua mai le faatautala e mauaina le mafanafana i le fautuaga lenei mai le Tusi a Mamona: “O au o Iakopo, ou te fia tautala atu ia te outou o e e loto mama. Ia outou tepa taulai atu i le Atua ma le mausali o le mafaufau, ma tatalo atu ia te ia ma le faatuatua tele, ma o le a ia faamafana-fanaina outou i o outou puapuaga, ma o le a ia aioia a outou tagi, ma auina ifo faasalaga i luga o i latou o e latou te saili lo outou faafanoga” (Iakopo 3:1). O le manaomia o le faamasinoga tonu ma le aia tatau e toe totogi ai e mafai ona tuuina atu i le Alii ina ia mafai ona Ia suitulaga ai lo tatou tiga i le filemu.

Na iu lava ina iloaina e Hana e mafai ona ia liliuina le manaomia o le faamasinoga tonu i le Faaola ma maua se lagona o le filemu i lona olaga na te lei oo lava i ai muamua. Talu ai nei, na fefe o ia e auai atu i faatasiga faaleaiga lea o le a i ai le tagata faasaua. O lenei, ona o lona naunau e feagai ai ma faigata o manua faalelagona i lona agai atu i le faamalologa, e le o toe fefe o ia i le a i faatasiga ma ia (o le na faatautala ia te ia) ma ua oo ina i ai le agaalofa mo ia i tausaga o lona toeaina.

Saoloto Mai Avega e le Manaomia

Na taua e Elder Richard G. Scott (1928–2015) o le Korama a Apostolo e Toasefululua faapea “o le faamalologa atoa o le a oo mai e ala i lou faatuatua ia Iesu Keriso ma Lona mana ma le matafaioi, e ala i Lana Togiola,

e faamaloloina ai manua o le sauaina fua ae le tatau ai. . . .

“E alofa o Ia ia te oe. Na Ia ofoina mai Lona soifua, ina ia faasaololina oe mai avega e le tatau ai. O le a fesoasoani o Ia ia te oe e faataunuina. Ou te iloa o loo ia te Ia le mana e faamalolo ai oe.”⁴

Sa manao Satani ia saisaitia tagata e le tiga ma le mafatiaga ona o loo pagatia o ia (tagai i le 2 Nifae 2:27). Faatasai ai ma le fesoasoani a lo tatou Faaola, o Iesu Keriso, faatoa mafai moni lava ona suia le tiga i le filemu, pe a mafai ona tuuina atu ai e le Faaola, ma mafai ai ona tatou ola i le olioli. “Na pa’ū Atamu ina ia i ai tagata; ma ua i ai tagata ina ia latou maua le olioli” [2 Nifae 2:25.] O le ola i le olioli o le a faatagaina taimi o tofotofoga ia sili atu le gafatalimaina ma mafai ai ona tatou aoao ma tuputupu ae ma avea atili e faapei o lo tatou Tama oi le Lagi.

Ua faalotomaualaloina au e ala i le faamanuiaga na ou maua i lou olaga e saofafai faatasai ma i latou o e ua faaleagaina e le faatautala, ma vaai i le vasega o le faamalologa lea e oo moni mai lava e ala mai i le Faaola. Afai o e mafatia, faamolemole liliu atu ma le agaga tatalo mo se fesoasoani. E te le tau tauaveina le avega mamafana o oe. Ou te iloa e Na te faamalolina, aua ua ou molimaunina i le tele o taimi e le mafaitaulia. ■

FAAMATALAGA

1. Gordon B. Hinckley, “Laveai Tamaiti,” *Liahona*, Ian. 1995, 67; faaopoopo le faamamafa.
2. David A. Bednar, “Matou Te Talitonu i le Nofomama,” *Liahona*, Me 2013, 42.
3. Carole M. Stephens, “O le Fomai Sili,” *Liahona*, Nov. 2016, 11.
4. Richard G. Scott, “Ia Saoloto Mai Avega Mamafa,” *Liahona*, Nov. 2002, 88.

FAUTUAGA MO TAITAI, AIGA, MA UO

Pe a ua lava le talitonuuina o oe e se tasi ua sauaina e faasoa atu ai ia te oe o latou mafatiaga ma sauaga, o talanoaga ma i latou e tatau ona amata i le alofa ma le agaalofa mo i latou. Ua tele lava taimi na faasoa mai ai e i latou na sauaina ia te au faapea ina ua latou o atu i lo latou epikopo mo se fesoasoani, o le taulai muamua lava o le manaomia lea ona faamagalo atu i le na faasaua mai. E mafai e lenei mea ona tuua ai le tagata ua afaina i le lagonaina e peiseai e pau lava le mea e taua o le tagata faasaua. Pe a tupu lenei mea, o tagata e seasea lava ona toe foi atu i o latou epikopo mo se fesoasoani ma misia ai le faamalologa faalegaga lea e mafai ona maua mai le alofa ma le lagolago faalelotu.

O le faamagalo atu o se vaega taua tele i le faagasologa o le faamalologa ma o se poloiga—ae faamolemole ia talitonuina faapea o le faatagaina o se tasi e muai faailoa atu lo latou mafatiaga, lagonaina o latou lagona, ma talanoa e uiga i ai ma se tagata faatuatuaina o le a i ai se taimi e taitai atu ai i le faamalologa lea e oo mai mai le mafai ona faamagaloina o le tagata faasaua.

E mafai ona tagai ia taitai o le Ekalesia i ministering.lds.org e sue ai le “Abuse: Help for the Victim” mo nisi faamatalaga.

O Le Tusiata Aiga: O Le Mana o Tala Faaleaiga

E ola pea talatuu a ou tuaa e ala mai ia te au, ma faaauau ai pea ona uunaia lou olaga mo le lelei sili atu.

Saunia e Amneris Puscasu

I se tasi taeao o le taumafanafana ao lumanai le Taua Lona II a le Lalolagi, na ala ae i luga lou tamamatua e pei ona sa ia masani ai—a o lei oso mai le la. Sa ia alu atu i fafo o lona fale i luga o se maupuepue e faasaga i se vanu lanuluava ma lona nuu i Romania, ma saofai i luga o le mutia o loo susu i le sau o le taeao po, o loo mafaufau loloto i ona lagona—o manatu lava na sa i lona mafaufau mo sina taimi. O se tamalii atamai ma se lototoa ma se mafaufau e tumu i le fialoa, sa alofagia ma faaaloalogia o ia e tagata uma o le nuu.

Ina ua mavae le oso ae o le la, na ia alu i le fale ma tau atu i lona toalua ua ia fia vaai pe o le a faapei lona toe sauniga o le maliu, ma sa ia manao ia faia se faataitaiga o ofu o le sauniga o le maliu. Na ia faatulaga le aso, faatau mai le pusamaliu, faatonu le faifeau ma tagata faanoanoa e totogi, ma maua mai isi mea uma o loo manaomia i le tu masani o le Lotu Eleni. Ona oo mai lea o le aso o le faataitaiga o ofu o le falelauasiga. Sa faatulaga laulau i le ogatotonu o le nuu mo le tausamaaga e manatua ai, sa laei uma le aiga i ofu uli, sa sau le faifeau, sa taoto le tama o lou tamamatua i le pusamaliu, ma tofaatulagaina le aluga ina ia mafai ona ia maua se vaiga lelei, ma amata loa le falelauasiga. Ina ua uma le sauniga, na valaaulia le nuu atoa i le tausamaaga, ma na faataunuina e le Tama o lou tamamatua lana miti o le siva lea i lona lava sauniga o le maliu. Sa ia soifua i le isi 20 tausaga, ma e masani ona siakiina e vaai pe o ofi pea le pusamaliu ia te ia.

E le na o Igoa ma Aso

Ou te lei feiloi lava i le tama o lou tamamatua, ae o lana tala ou te fiafia lava i ai lea na tuufasolo mai ia te au e ou matua matutua. O aso uma lava e faamatala mai ai e ou matua matutua ia te au ma nai ou tei ni tala e uiga i o matou tuua: le mea na latou o mai ai, pe sa latou faapei, o latou tulaga faatauaina, miti, ma faamoemoega. I le maea ai o le taumafataga i Aso Sa uma lava, e aumai ai e ou matua



matutua le tusiata a le aiga, ma i soo se taimi e susue ai le itulau, e toe ola mai ai tagata o tala ma e fusia faatasi loto o loo i le ono tupulaga i le alofa. E na oni ata tuai ma ni igoa ma aso o loo osiosi i le pito i tua. I tua o foliga taitasi sa i ai se tama po o se tina, se atalii po o se afafine, se uso po o se tuafafine, ma sa faapea lo latou talatuu, faatasi ai ma isi tu ma aga faaleaiga, sa tuufaasolo mai i lalo ia te au.

Malosi i Taimi o Tofotofoga

E oo atu i le taimi ua ou 19 ai, ua maliliu ou matua ma le toatele o tagata o lo'u aiga lata mai, ma o le tele o mea sa ou mautofi ai na leiloloa pe gaoia. Ae peitai o loo i ai se mea se tasi e le mafai ona faaleagaina e le taimi, mala faalenatura, po o le ot i foi: le alalaupapa o le alofa lena e sosooina le taimi o le tuanai, taimi nei, ma le lumanai lea na fausia e tagata o lou aiga. Ona o lo latou filiga, ua tuuina mai ai ia te au e filo ia na fusia faatasi ai loto o lo matou aiga le malosi e manumalo ai i tulaga faigata.

Ina ua maliliu ou matua ma matua matutua, sa ou lagonaina se faanoanoa maoae lea na ou mafaufau ai pe mafai ona lava lou malosi e faaauau ai pea. Sa faamanuaiaina au e lagonaina la latou uunaiga mai tala atu o le veli, ma na fesoasoani ia te au e maua ai se molimau malosi i le fuafaga o le faaolataga, o le ola i talaatu o le ot, ma mulimuli ane, o sauniga o le malumalu na e matuai manaomia lava

mo lo tatou faaolataga. Ou te lei feiloai lava i ou matua matutua po o le toatele o uso ma tuafafine o lou tina ma lou tama, ae o taimi uma lava ou te aumaia ai i luga le tusiata tuai a le aiga faatasi ma o latou ata, ou te vaai lava ia te au i o latou mata. Ua avea au ma tagata ua ou i ai nei ona o i latou uma o e na muamua mai ia te au. Ua fesoasoani a latou aafifaga ma le poto e mamanuina ai lou tagata, ma sa taialaina ai au i lou olaga.

O se tasi o meaalofa silisili na tuuina mai e lou aiga ia te au talu ona avea o se tamaititi o le malamalamā e uiga i le talafaasolopito o lou aiga, ma le talitonuga maumau-tutu e faapea o au o le sootaga i le va o le taimi ua tuanai ma le lumanai. Ou te iloaina foi na ou sau i le lalolagi e ola ai i lau lava tala—e sailia ma oo i ai ma faapelepele i ai. O lenei malamalamā o le talafaasolopito o lou aiga ua lagolagoina ai a'u i tofotofoga uma o le olaga.

Ou te mafaufau soo i lou aiga i le isi itu o le veli ma osigataulaga na latou faia mo au ina ia maua ai se olaga e sili atu. Ou te manatu o le sauniga o le malumalu e mafai ai ona toe faatasia o se aiga i se aso. Ma ou te mafaufau i le Togiola a lou Faaola, lea na mafaia ai mea uma lava. Na Ia totogiina le tau ina ia tatou ola. Mo lenei mea, tatou te alolofa ai ia te Ia ma tapuai ia te Ia i le agaga faafetai i le taimi nei ma le faavavau. ■

E alala le tusitala i Niu Ioka, ISA.





**Saunia e Elder
Larry R. Lawrence**
O le Fitugafulu



Ua Faaauau Pea le Taua

O le taua sa amatalia i le lagi o loo faaaauau pea i le aso.

*O le mea moni, o loo vevela le taua a o sauniuni
le Au Paia mo le toe afio mai o le Faaola.*

Soo se tasi e mulimuli i talafou faavaomalo e ioe ua tatou ola i se taimi o “tau ma tala o taua” (MF&F 45:26). O le mea e lelei ai, o tagata uma i le lalolagi o fitafita ua foi mai i le taua. O loo tatou tauivi ma le au a le tiapolo i se taua faifai pea lea na amataina i le muai olaga ae tatou te lei fananau mai.

Ona tatou te lei mauaina ni tino faaletino, sa tatou tau le taua i le lagi e aunoa ma ni pelu, fana, po o ni pomu. Ae o le taua sa maoae lava e pei o soo se taua o aso nei, ma sa i ai le faitau piliona o e na manunua ma maliliu.

Sa tauina le taua i le muai olaga i upu, manatu, finauga, ma le faatauanau (tagai Faaaliga 12:7–9, 11). O le metotia a Satani o le faafe fe o tagata. Sa ia iloaina o le fefe o le auala sili lea e faaumatia ai le faatuatua. Atonu na ia faaaogaina ni finauga e pei o nei: “E faigata tele.” “E le mafai ona toe foi atu ma le mama.” “E tele naua le lamatia.” “E faapefea ona e iloa e mafai ona e faalagolago ia Iesu Keriso?” Sa matuui lotoleaga o ia i le Faaola.

O le mea e faafetai ai, na manumalo le fuafuaga a le Atua i pepelo a Satani. O le fuafuaga a le Atua na aafia ai le filifiliga saoloto mo tagata ma se osigataulaga tele. Na ofo fua atu e Ieova, ua lauiloa ia i tatou o Iesu Keriso, e avea ma lena taulaga—ina ia puapuagatia mo a tatou agasala uma. Sa naunau o Ia e ofoina atu Lona soifua mo Ona uso ma tuafafine ina ia mafai e i latou o e salamo ona mafai ona toe foi mai ma le mama ma iu lava ina avea e faapei o lo latou Tama Faalelagi. (Tagai i le Mose 4:1–4; Aperaamo 3:27.)

*I le Taua i le Lagi, sa tatou alolofa ma
lagolagoina lo tatou Tama oi le Lagi.
Sa tatou mananao ia pei o la.*

O le isi avanoa sa fesoasoani ia Ieova ia manumalo ai i loto o fanau a le Atua o molimau mamana na tuuina mai e Ana au, na taitaia e Mekaeli, le agelu sili (tagai i le Faaaliga 12:7, 11; MF&F 107:54). I le muai olaga, sa ta'ua ai Atamu o Mekaeli, ma sa valaauiina Satani o Lusifelo, o lona uiga o “le e tauaveina le malamalamama.”¹ Atonu e foliga pei o se igoa tulaga ese mo le perenise o le pogisa (tagai i le Mose 7:26), ae o loo aoao mai tusitusiga paia faapea o Satani sa avea “o se agelu a le Atua o le sa i ai le pule i le afioaga o le Atua” a o lei pau o ia (tagai i le MF&F 76: 25–28).

E mafai faapefea ona pau atu se agaga e iai le malamalamama ma le poto masani tele? O le pogai ona o lona faamaualuga. Sa fouvale Lusifelo e faasaga i lo tatou Tama oi le Lagi ona sa ia manao i le malo o le Atua mo ia lava.

I lana lauga “Ia Faaeteete i le Faamaualuga”, sa aoaoina ai e Peresitene Ezra Taft Benson (1899–1994) faapea o Lusifelo na “manao ina ia faamamaluna o ia i luga ae o isi uma” ma, “o lona manao faamaualuga o le aveesea mai o le Atua mai Lona nofoalii.”² Ua outou faalogo na manao foi Satani e faaumati le fitalia a le tagata, ae sa le na o le pau lena o le mafuaaga na le toe taliaina ai o ia [e le Atua]. Sa tulieseaa o ia mai le lagi ona o le fouvale e faasaga i le Tama ma le Alo (tagai i le MF&F 76:25; Mose 4:3).

Aisea na ta tau ai faasaga i le tiapolo? Na ta tau ona o le faamaoni. Sa ta alolofa ma lagolagoina lo tatou Tama oi le Lagi. Sa ta mananao ia pei o Ia. Sa ese le sini a Lusifelo. Sa manao o ia e suitulaga i le Tama (tagai i le Isaia 14:12–14; 2 Nifae 24:12–14). Vaaifaaalemafaufau i auala e faatiga ai le faalata a Satani i o tatou Matua Faalelagi. I tusitusiga paia, tatou te faitau ai e faapea “na tutulu le lagi ona o ia” (MF&F 76:26).

Ina ua mavae se faalauiologa vevela, na manumalo Mekaeli ma ana au. Na filifili le lua-vae tolu o 'au o le



lagi e mulimuli atu i le Tama (tagai i le MF&F 29:36). Na lafo ifo Satani ma ana au mai le lagi, ae lei auina atu sao i latou i le pogisa i fafo. Muamua, na auina mai i latou i lenei lalolagi (tagai i le Faaaliga 12:7–9), lea o le a fanau mai ai Iesu Keriso ma faataunuina ai Lana taulaga togiola.

Aisea na faatagaina ai au a Satani e o mai i le lalolagi? Sa latou o mai e tuuina atu le faafeagai mo i latou o e o loo tofotofoina iinei (tagai i le 2 Nifae 2:11). Pe o le a iu lava ina lafoina i latou i le pogisa i fafo? Ioe. Pe a mavae le Meleniuma, o le a tulieseaa loa Satani ma ana au i fafo e faavavau.

Ua iloa e Satani, ua faitaulia ona aso. O le a noatia Satani ma ana agelu mo le 1,00 tausaga, i le Afio Mai Faalua o Iesu (tagai i le o le Faaaliga 20:1-3; 1 Nifae 22:26; MF&F 101: 28). O loo tau malosi au a le tiapolo, ia pueina le tele o agaga latou te mafaia a o latalata atu i lena aso mulimuli.

Sa faaalia ia Ioane le Talifaaaliga le Taua i le Lagi i le avea ai ma se vaega o se faaaliga vaaia maoae. Sa faaalia ia te ia pe na faapefea ona tulieseina Satani i lalo i le fogaelele e faaosooso i tagata. O le tali lea a Ioane: “O i talofa ia te outou o e nonofo i fanua ma le sami! aua ua alu ifo ia te outou le tiapolo ua lotoa tele, aua ua na iloa ua saasaa ona po” (Faaaliga 12:12.).

E faapefea la ona faaaogaina e Satani ona aso, i le iloaina ua leai sona taimi e maimau? Na tusia e le Apostolo o Peteru faapea, “o le tiapolo lea, o loo fealualuai o ia e pei o se leona tagi, ua saili se tasi e aina e ia” (1 Peteru 5:8.).

O le a le mea ua faaosofia ai Satani? O le a le maua lava e ia se tino, o le a ia le maua lava se ava po o se aiga, ma o le a ia le mauaina lava se atoatoaga o le olioli, o lea e manao ai o ia i alii ma tamaitai uma “ia pagatia tagata uma e pei o ia lava” (2 Nifae 2:27).

O le tiapolo na te mataituna tagata uma, ae maise lava i latou o e ua sili ona agavaa mo le fiafia e faavavau. Ua manino lava Lona lotoleaga i soo se tasi o le ua i luga o le ala i le faaeaga. Ua aoao mai tusitusiga paia faapea o Satani “ua sii taua ai o ia i le au paia a le Atua, ma si'o faataamilo i latou” (MF&F 76:29).

O le taua sa amatalia i le lagi o loo faaauau pea i le aso. O le mea moni lava, o loo faateteleina le taua a o sauniuni le Au Paia mo le toe afio mai o le Faaola.

Na valoia e Peresitene Polika Iaga (1801-77), “o le Eklesia o le a salalau atu, manuia, tuputupu ae ma oo atu, ma e tusa ai ma le salalau atu o le Talalelei i totonu o atunu o le lalolagi, o le a faapena le tuputupu ae o le mana o Satani.”³

Ou te manatu o le a tatou malilie uma ina ua faataunuuina le valoaga lenei a o tatou matamata i leaga o loo ofi atu i atunu o le lalolagi. Na aoao mai Peresitene Iaga faapea e tatau ona tatou suesue i togafiti a le fili ina ia mafai ona faatoilaloia o ia. Ou te faasoaa atu le fa o fuafuaga faamaonia a Satani ma nisi o manatu i le ala e tetee atu ai i ai.

O Fuafuaga a Satani

1. Faaosoosoga. O le tiapolo e toa pe a tuuina ni manatu leaga i o tatou mafaufau. Ua aoao mai le Tusi a

Mamona e musumusu mai e Satani ni mafaufauga le mama ma le le alofa ma totoina ni mafaufauga o le le mautonu. Na te faatauanau i tatou e galulue i uunaiga ua fai ma vaisu ma e faafafia ai le manatu faapito ma le faaloloto. E le manao o ia tatou te iloa po o fea e o mai ai nei manatu, o lea na te musumusu mai ai, “E lē o a'u o se tiapolo, ona e leai se tiapolo” (2 Nifae 28:22).

E mafai faapefea ona tatou tetee atu i lenei faaosoosoga tuusao? O se tasi o meafaigaluega sili ona aoga o le na o le tuliese lava o Satani. O le mea lena o le a faia e Iesu.

E aoga le tala i le Feagaiga Fou e uiga i le Faaola i luga o le mauga o faaosoosoga. Ina ua uma faaosoosoga taitasi na tuuina atu e le tiapolo ia te Ia, na faaaoga ai e Iesu se auala e puipuia ai e lua-laasaga: muamua, sa Ia faatonuina Satani e alu ese; ona Ia sii maia lea o se mau.

Sei ou avatua se faataitaiga: “Alu ese ia oe, Satani,” na poloai atu ai Iesu, “aua ua tusia, e te ifo atu i le Alii lou Atua, ua na o ia e te auauna i ai” (Mataio 4:10). Sa faamau-mauina i le fuaiupu e sosoo ai, “Ona tuua ai lea o ia e le tiapolo, faauta foi, ua o mai agelu ma auauna mai ia te ia” (Mataio 4:11). Na matuui aoga lava le puipuiga a le Faaola!

Ua tuuina mai e le talaaga o Peresitene Heber J. Grant (1856–1945) se vaaiga manino i le auala na teena ai e Peresitene Grant le tiapolo, ao avea ma se alii talavou. Ina ua iloa e Peresitene Grant faapea o Satani sa musumusu atu ia te ia, ma taumafai e totoina le masalosalo i lona loto, sa ia fai atu ma le leoteli, “Lau Susuga le Tiapolo, tapuni lou gutu.”⁴

E i ai le aia tatau e tau atu ai ia Satani e alu ese pe a e feagai ma faaosoosoga. Na aoao mai e tusitusiga paia, “Tetee atu i le tiapolo, ona sola ese ai lea o ia ia te outou” (Iakopo 4:7).

O le isi vaega o le puipuiga a le Faaola o le sii mai o se mau. E i ai se mana tele i le taulotoina o mau, e pei ona faia e Iesu. O mau faatusi paia e mafai ona avea o se auupega o pulufana faaleagaga.

Pe a tofotofo oe, e mafai ona e taulotoina poloaiga e pei o le “Ia e manatua le aso Sapati e te faapaiaina,” “Ia alofa atu i e o fai outou mo latou fili”, po o “Ia tuu le amiomama e teuteuina ai ou mafaufauga e le aunoa” (Esoto 20:8; Luk 6:27; MF&F 121: 45). O le mana o tusitusiga paia e le gata ina faafefe ai Satani, ae na te aumaia foi le Agaga i totonu o lou loto, faamautinoa mai ia te oe, ma faamalosia oe e tetee atu i faaosoosoga.



2. O pepelo ma le taufaasese. Ua faaalia mai i tusitusaiga paia o Satani o le “tama o pepelo uma” (2 Nifae 9:9). Aua le talitonu ia te ia pe a ia musumusu mai ni savali e pei o le “E te le faia lava se mea sao,” “Ua e agasala tele e le faamagaloina ai oe,” “O le a e le sua lava,” “E leai se tasi e popole e uiga ia te oe” ma le “E leai ni au taleni.”

O nisi o ana pepelo e faaaogaina soo o lenei: “E tatau ona e tofo i mea uma e le itiiti ifo ma le faatasi—tau lava ina ia maua ai le poto masani. O le faatasi lava e te le afaina ai.” O le tamai mea lilo palapala na te le manao ia e iloaina e faapea o le agasala o se mausa.

O se isi pepelo mataalia o le a taumafai e Satani ia te oe o lenei: “O loo faiae tagata uma. E le Afaina.” E leai se le afaina! O lea tau atu i le tiapolo, e te le manao e alu i le malo telesitila—e tusa lava pe o tagata uma lava o le a o i ai.

E ui lava o Satani o le a pepelo ia te oe, e mafai ona e talitonu i le Agaga e tau atu ia te oe le mea moni. O le mafuaga lena e matuai taua ai lava le meaalofa o le Agaga Paia.

Na taua le tiapolo “o le taufaasese maoae.”⁵ E taumafai o ia e faaseseina mataupu faavae moni uma e tuuina mai e le Alii.

Ia manatua, o mea taufaasese e le tutusa ma mea faafeagai. O le faafeagai o le paepae o le lanu uliuli, ae o se taufaasese mo le papae e mafai ona avea ma paepae-vaivai po o le efuefu. O mea taufaasese e tuuina atu se faafoliga i le mea moni ina ia mafai ona faasese tagata e lei masalosalo i ai. O i latou o se faafoliga milosia o se mea lelei, ma e pei lava o tupe taufaasese, e leai se aoga. Se'i ou faamalamaina atu.

O se tasi o mea taufaasese a Satani mo le faatuatua o mea faataulaitu. O lana taufaasese mo le alofa o le

*E mafai ona e talitonu i le Agaga
e tau mai ia te oe le mea moni. O
le mafuaaga lena e matuai taua ai
lava le meaalofa o le Agaga Paia.*



tuinananu. Ua ia taufaaseseina le perisitua e ala i le faailoaina mai o le faafaitaulaga pepelo, ma na te faataitaia vavega a le Atua i aafiaga faataulaitu.

O le faaipoipoga i le va o se alii ma se tamaitai ua faauina e le Atua, ae o le faaipoipoga o le itupa e tasi ua na o se taufaasese. Na te aumaia le leai o ni fanau po o le faaeaga. E ui lava o ana faafoliga e faaseseina ai le tele o tagata, ae e le o ni mea moni. E le mafai ona aumaia ai le fiafia tumau.

Na lapataia i tatou e le Atua e uiga i mea taufaasese i le Mataupu Faavae ma Feagaiga. Sa Ia fetalai mai, “O le mea ua le faagaeetia ua le mai le Atua, ma o le pouliuli” (MF&F 50:23).

3. Finauga. O Satani o le Tama o finauga. Ua aoao mai le Faaola, “Ua faaoso e ia loto o tagata ia fefinauai ma le ita, o le tasi i le isi” (3 Nifae 11:29).

Ua aoaoina le tiapolo mai le tele o seneturi e faapea o le mea e i ai le finauga, o le a alu ese ai le Agaga o le Alii. Talu mai lava le taimi na ia uunaia ai Kaino ia fasioti Apelu, ua uunaia e Satani uso ma tuafafine e fefinauai. Na te faaoso foi faafitalui i faaipoipoga, i totonu o tagata o le uarota, ma i va o soa faifeautalai. E fiafia o ia i le vaai atu i ni tagata lelei o finau. E taumafai o ia e amata ni finauga i le aiga i le taimi tonu lava toeitiiti amata le lotu i le Aso Sa, ae toeitiiti amata le afiafi faaleaiga i le po o le Aso Gafua, ma soo se taimi lava e fuafua ai se ulugalii e auai i se sauniga o le malumalu. O lana taimi e mafai lava ona iloa atu.

Pe a i ai finauga i lou pale po o se nofoaga o galuega, ia taofi loa lava soo se mea o loo e faia ma saili le faatupuina o le filemu. E le afaina po o ai na amata ai.

O le finauga e masani ona amata i le saili masei. Ua aoao mai Iosefa Samita, “o le tiapolo e faaseeina i tatou, tatou te amiontonu tele, pe a ua fafagaina i tatou i sese o isi.”⁶ Pe a e mafaufau i ai, o le faafiaamiontonu ua na o se taufaasese mo le amiontonu moni.

E fiafia Satani e faasalalau atu le finauga i le Ekalesia. E faapitoa o ia i le faailoa atu o sese o taitai o le Ekalesia. Sa lapatai e Iosefa Samita le Au Paia o le laasaga amata o le liliuese o le leai lea o se talitonuga i taitai o le Ekalesia.⁷

E toeitiiti lava o tusi uma e tetee i Mamona e faaautu i pepelo e uiga i le tagata o Iosefa Samita. E galue malosi le fili e faaleaga Iosefa aua o le savali o le Toefuataiga e faalagolago lea i le tala a le Perofeta i le mea na tupu i le Vao Paia. Ua galue malosi i le taimi nei nai lo se isi lava taimi muamua le tiapolo e faaoso tagata o le Ekalesia e fesiligia a latou molimau o le Toefuataiga.

I le popofou o lo tatou tisipenisione, o le toatele o le usoga perisitua, i lo latou salamo, sa lei tumau faamaoni i le Perofeta. O se tasi o i latou o Lyman E. Johnson, o le sa tapeina le igoa mo amioga le amioletonu. Mulimuli ane, na ia aue i le tuua o le Ekalesia: “Ou te tuuina atu lou lima taumatau e vavae ese, pe a mafai ona ou toe talitonu i ai. Ona tumu ai lea o au i le olioli ma le fiafia. Sa manaia au miti. Pe a ou ala ae i le taeao sa fiafia lou agaga. Sa ou fiafia i le ao ma le po, e tumu i le filemu ma le olioli ma le faafetai. Ae o lenei ua pogisa, tiga, faanoanoa, ma pagatia e le gata mai. Ou te lei toe vaai lava talu mai lena taimi i se taimi fiafia.”⁸

Mafaufau i na upu. Latou te tutu e avea ma se lapataiga i tagata uma o le Ekalesia.

O a'u o se tagata liliu mai i le Ekalesia. Sa papatisoina au ina ua 23 ou tausaga o se talavou nofofua matua i le aoga faafomai i Arisona, ISA. Ou te iloaina e au lava ia e galue Satani i tagata sailili e fenumiai i latou ma faalotovaivai i latou pe a latou sailia le upumoni.

I taimi uma o lou talavou, sa ou vaavaai ai i faataitaiga a uo o le Au Paia o Aso e Gata Ai. Sa faagaetia au i le auala latou te faatautaia ai o latou olaga. Sa ou faia le faaiuga ina ia aoao atili e uiga i le Ekalesia, ae sa ou le manao e tau atu i soo se tasi sa ou suesueina le faa-Mamona. Ina ia aloese mai le uunai malosi mai a au uo, sa ou filifili ai e faia lau sailiga o se suesuega patino.

O le tele lea o tausaga ao lei i ai le Initoneti, o lea na ou alu ai i le Faletusi a le malo. Sa ou maua ai se kopi o le Tusi a Mamona ma se tusi e taua o *Le Galuega Taua ma le Ofoofogia*, a Elder LeGrand Richards (1886–1983) o le Korama a Aposetolo e Toasefululu. Sa amata ona ou faitau i nei tusi ma le naunau tele, ma na ou iloaina lo la musuia.

A o moomoo lou Agaga ina ia malamalama atili, na amata ona musumusu mai Satani i lou taliga. Na ia tau mai ia te au e faapea ina ia mafai ona atoatoa le sao, ou te manaomia e faitau mea na tusia foi e le au faitio o le Ekalesia. Sa ou toe foi i le Faletusi ma amata ona tilotilo solo. E sao lava, sa ou maua ai se tusi o loo tauseseina le Perofeta o Iosefa Samita.

O le faitauina o lenei tusi e tetee i Mamona na ou le mautonu ai. Sa ou le toe mauaina lena agaga matagofie ma le uunaiga lea na taialaina lau suesuega. Sa ou le fiafia ma sa toetoe a lafoai lau sailiga mo le upumoni. Sa ou tatalo mo se tali ao faitauina na tusiga e tetee i Mamona!

I lou tei tele, sa ou maua se telefonu mai se uo i le aoga maualuga o le sa auai i le Iunivesite o Polika Iaga. Sa ia



valaaulaina au ou te sau e asia o ia i Iuta, ma folafola mai o le a ou fiafia i le malaga maimoa taamilo. Na te lei iloaina sa ou suesue faalilolilo e uiga i lana Ekalesia.

Sa ou taliaina lana valaaulia. Na fautua mai lau uo ma te o i le aai o Sate Leki e asiiasi i le Lotoa o le Malumalu. Sa faateia o ia i lau tali naunautai. Na te lei iloa lou gauai e aoao le meamoni e uiga ia Iosefa Samita ma le Toefuataiga.

O tamaitai faifeatalai i le Lotoa o le Malumalu, sa matuai fesoasoani lava. E aunoa ma le iloaina, na la taliina le tele o au fesili. Na uunaia au e a la molimau ia “masalo-salo i [ou] masalosaloga,”⁹ ma na amata ona tuputupu ae lou faatuatua. E le mafai ona soona maualuga le mana o se molimau mai le loto.

E taulai atu le tiapolo i tagata uma lava, ae maise lava i latou o e ua sili ona agavaa mo le fiafia e faavavau.

Na faasoa mai foi e lau uo lana molimau ia te au ma valaaulia au ou te tatalo ma ole atu i le Atua pe moni le Ekalesia. I le tietiega umi i le toe foi atu i Arizona, sa amata ona ou tatalo ma le faatuatua—mo le taimi muamua “ma le loto faamaoni, ma le manatu moni i ai” (Moronae 10:4). I se tasi taimi i lena malaga, sa foliga mai ua susulu atoa lau taavale i le malamalama. Sa ou aoaoina mo au lava ia faapea e mafai ona tuliese e le malamalama le pogisa.

Ina ua uma ona ou filifili ia papatisoina, na toe tuuina mai e le tiapolo se ttau faaiu. Sa ia galue i lou aiga, o e na faia mea uma i lo latou malosi e faalotovaivai ai au, ma sa latou mumusu e auai i lou papatisoga.

Sa ou papatiso lava, ma na faasolosolo malie ona faa-maluluina o latou loto. Sa amata ona latou fesoasoani ia te au i le sailia o lau talafaasolopito o aiga. I ni nai tausaga mulimuli ane, sa ou papatisoina ai lou uso laitiiti. O le uo lea na valaauliaina au e asiati atu ia te ia i Iuta ua avea nei ma ou toalua.

4. Lotovaivai. E faaaoga ma le mataalia e Satani lenei meafaigaluega i le Au Paia e aupito sili ona faamaoni pe a ua le manuia isi mea uma. Mo au, pe a amata ona ou lagona le lotovaivai, e fesoasoani ia te au le tau lava o le iloaina po o ai lea o loo taumafai e aumai au i lalo. O lenei mea e lava ai lou ita e faafafia ai au lava—tau lava o le faaita i le tiapolo.

I ni nai tausaga ua mavae, na tuuina mai ai e Peresitene Benson se lauga e ttau “Aua le Faavaivai.” I lena lauga manino, na ia lapatai mai, “Ua faateleina foi le taumafai o Satani e faatoilalo le Au Paia ia loto vaivai, atuatuvala, faavaivai, ma faanoanoa.”¹⁰ Na uunaia e Peresitene Benson tagata o le Ekalesia ina ia mataala, ma na ia tuuina mai fautuaga talafeagai e 12 mo le ttau ma le lotovaivai.

O ana fautuaga e aofia ai le auauna atu i isi; galue malosi ma aloese mai le faapaie; faatinoina o uiga lelei o le soifua maloloina, e aofia ai le faamalositino ma le taumafa i meaai i lo latou tulaga faalenatura; sailia o se faamanuiaga o le perisitua; faalogologo i musika musuia; fatauina o ou faamanuiaga; ma faatutuina ni sini. Ma i mea uma, e pei ona aoao mai tusitusiga paia, e tatau ona tatou tatalo e le aunoa ina ia mafai ona tatou manumalo ia Satani (tagai i le MF&F 10:5).¹¹

*Sa tetemu Satani pe a ia vaia
Le Au Paia e sili ona vaivai i ona tulivae.¹²*

E taua le iloa o loo i ai ni tapulaa i le mana o le tiapolo. Ua faatulagaina e le Aigaatua na tapulaa, ma e le faatagaina Satani e sopo ai. Mo se faataitaiga, na faamautinoa mai e tusitusiga paia ia i tatou, “ua le tuuina atu ia Satani le mana e faaososo ai tamaiti laiti” (MF&F 29:47).

O se isi tapulaa ttau e faapea e le iloa e Satani o tatou mafaufauga vagana ua tatou tau atu ia te ia. Na ta’u mai e le Alii, “E leai lava se tasi ae ua na o le Atua ua ia silafia ou mafaufauga ma faamoemoega o lou loto.” (MF&F 6:16).

Atonu o mafuaaga ia ua tuuina mai ai e le Alii ia i tatou poloaiga e pei o le “Aua e te muimui” (MF&F 9:6) ma le “Aua e te tautala leaga e uiga i le lua te tuaoi” (MF&F 42: 27). Afai e mafai ona e aoao e pulea lou laulau-faiva (tagai Iakopo 1:26), o le a e le iu ina tuuina atu le tele naua o faamatalaga i le tiapolo. Pe a ia faalogoina le muimui, faitio, ma le faipona, na te tusia ma le faaeteete na faamatalaga. O au upu le lelei e faailoa atu ai ou vaivaiga i le fili.

O loo ia te au se tala fiafia mo oe. E tele atu le autau a le Atua nai lo le autau a Lusifelo. Atonu e te vaavaai solo ma mafaufau ia te oe lava, “Ua faateleina ma faateleina le amioleaga o le lalolagi. Masalo o loo manumalo Satani i le taua.” Aua le faaseseina oe. O le mea moni lava, e toatele atu i tatou nai lo le fili. Manatua, o le lua-vae tolu o fanau a le Atua na filifilia le fuafuaga a le Tama.

Uso e ma tuafafine, ia mautinoa o loo e tau i le itu a le Alii. Ia mautinoa o loo e tauaveina le pelu o le Agaga.

O lau tatalo e faapea i le faaiuga o o outou olaga, e mafai ona outou faapea mai faatasi ma le Aposetolo o Paulo, “Ua ou tau le ttau lelei, ua iu ia te au le tausinioga, ua ou taofi i le upu o le faatuatua” (2 Timoteo 4:7). ■

FAAMATALAGA

1. Taiala i Tusitusiga Paia, “Lusifelo,” scriptures_lds.org.
2. Ezra Taft Benson, “Faateete i le Faamataluga,” *Liahona*, Julai 1989, 4.
3. *Discourses of Brigham Young*, sel. John A. Widtsoe (1954), (1954), 72.
4. Tagai Francis M. Gibbons, *Heber J. Grant: Man of Steel, Prophet of God* (1979), 35–36.
5. Tagai, mo se faataitaiga, Dieter F. Uchtdorf, “E Ttau Oe ia te Ia,” *Liahona*, Nov. 2011, 20; Gordon B. Hinckley, “O Taimi o loo Tatou Ola ai,” *Liahona*, Ian. 2002, 86.
6. *Aoaoga a Peresitene o le Ekalesia: Josefa Samita* (2007), 480.
7. Tagai *Aoaoga: Josefa Samita*, 318.
8. Lyman E. Johnson, i le Brigham Young, *Deseret News*, 15 Aok., 1877, 484.
9. Dieter F. Uchtdorf, “Sau, Auai Faatasi ma i Matou,” *Liahona*, Nov. 2013, 23.
10. Ezra Taft Benson, “Aua le Faavaivai,” *Ensign*, Mat. 1987, 2.
11. Tagai i le Ezra Taft Benson, “Aua le Faavaivai,” 2–7.
12. William Cowper, i Robert Andrews, comp., *The Concise Columbia Dictionary of Quotations* (1987), 78.

O Skaidrīte o se tasi o tagata e sili ona fiafia ua ou feiloai i ai. O lona olaga e foliga mai o se ata atoatoa. Ae a o teineitiiti sa nonofa ma lona tina e inupia, lea sa le gafatia ai ona tausia o ia ma lona uso. Sa uuina e Skaidrīte le lima o lona uso ina ua oti o ia i le fiaai. Na amata i le 8 tausaga, sa nofo ai Skaidrite i se faasologa o aiga e tausia ai. Sa kakikiina o ia, sasaina, ma faasaina ona tatalo. Sa taulimaina o ia e pei o se pologa. I le aluga o tausaga, sa ia mafaufau e pule i le ola.

I ni tausaga mulimuli ane, i le sailiga mo le faamoemoe, na ulufale atu ai Skaidrīte i se falelotu o le AAG.

LESLIE NILSSON, TAGATA PUEATA

Skaidrīte Bokuma

Liepāja, Latvija

"Se faafeiloaia au e se tamaitai faifeautalai ma ataata mai. Sa ou mafaufau o ia o se agelu. Na suia lo'u olaga talu mai lena aso. Ua 17 nei tausaga, ma ua mou ese atu uma ou mafaufauuga o le pule i le ola. I le taimi nei, ou te mafaufau i mea lelei. Pe a i ai ni au avega, sa ou tuu atu i le Atua. Ua ou aoao e faalagolago ia te la mo mea uma. E matagofie le olaga mo au."

Aoao i le auala e iloaina ai ma fesoasoani ia i latou o e atonu o loo mafaufau e pule i le ola i le lds.org/go/41739.





FAAMOLEMOLE AUA LE TAINA LENA PESE

se taimi ua mavae, sa matou nonofo ai ma lou aiga i Veracruz, Mekisiko, lea na aooga ai lau fanau i le aoga maualalo. I taeao taitasi a o ou fesoasoani i lau fanau e toatolu ia saunia mo le aoga, matou te faalogologo i le leitio—le alaleo e sili ona lauiloa i le aai—faatasi ai ma se polokalama manaia tele e taitaia e se alii faasalalau o le leitio.

Sa amata ona matou faalogo i se pese e sili ona faamomoiloto. Ina ua ou amata ona gauai atu teisi i upu o le pese, sa ou iloaina ai o mea sa ia tau maia, e ui e le matuia, ae na faatosina ma mataga.

Sa ou fai atu ma le naunautai i lau fanau, “E le mafai ona tatou faalogo i lenei ituaiga o gagana.” Atonu latou te lei gauai atu lava i upu o le pese, ae sa lava lo latou faalogo aua na latou hamuina lona fati.

Sa latou vaai mai ia te au ua tape le leo o le laau ma fesili mai ia te au po o le a lau mea ua fai. “O le a ou alu e tau atu i le tagata faasalalau o le leitio e aveese lena pese mai le polokalama.” O lo latou ofo tele sa uunaia au e faaaauau le faatinoga.

Sa latou le talitonu i ai ma e faapena foi au, ae sa ou siiina i luga le telefoni ma valaau i le nofoaga o le leitio. Ou te lei faamoemoe e maua mai se tali, ae i lou ofo tele, o le tagata faasalalau lava lea na faatoa matou faalogologo i ai i le faaaliga na vave lava ona tali mai i lau valaau.

Sa ou tau atu ia te ia faapea ou te le ioe i le faalogologo i lena pese, ona o

na ua matou faalogo i se pese e sili ona faamomoiloto i luga o le leitio, sa amata ona ou gauai teisi atu i upu o le pese.

le tele o aiga e faalogologo i le leitio i lena taimi o le taeao. Sa ia fesili mai ia te au po o le a le pese ou te fautuaina na te suia ai, ae o lana amio sa matua lelei lava o lea sa na ona ou talosaga atu ai lava e aua na te taina lena pese i le taimi e i ai tamaiti i le fale.

Ou te lei iloa lava pe na i luga o le ea lau valaau, ae sa ou faafetai lava na faalogo mai le tagata faasalalau o le leitio. Ma mo nai aso na sosoo ai, sa ou iloaina ai sa taliina mai lau talosaga.

Na faamautinoa mai e lena aafiaga ia te au e tatau ona tatou lototele pe a mafai ona tatou faia ni faaiuga ma faia mea e manaomia e puipuia ai a tatou fanau mai faatosinaga le lelei. A tatou faia lena mea, e mafai e le Agaga Paia ona faaaauau pea ona avea ma a tatou soa tumau. ■

Maria Hernandez, Texas, ISA



O LE ATOTUPE NA LEILOA

Talu ai nei lava sa ou siitia atu ai i se fale fou ma talosagaina nisi o tagata o le Ekalesia e fesoasoani mai ia te au i se galuega faatino i lou fale. I le ogatotonu o le galuega faatino, sa ou tuua ai le fale e faatau ni mea na matou manaomia e faauma ai. Ina ua maea le galuega faatino, sa ou iloaina ai ua le o ia te au lau atotupe. Sa ou popole aua o loo i totonu o lau atotupe au pepa uma lava o faamatalaga faaletagata lava ia faatasi ai ma le tupe na faatoa ou mauaina mai i se tagata faatau i lena taeao. Sa ou toe foi atu i le mea na fai ai le faatauga ae sa le faamanuiaina. Sa ou alu i le fale ma saili e vaai pe na pau i se mea, ae ou te lei mauaina lava. Sa amata ona ou mafaufau i le avanoa o le a ou maua ina ia maua ai ni kopi fou o pepa uma o faamatalaga. Ae lei tuua lou fale, na fesili mai se uo, "Pe na e tatalo ea?"

Sa vave lava ona ou mafaufau, "Ioe ua uma ona ou tatalo!"

Ae o le mea moni lava, ou te lei tatalo ma le manatu moni i ai. Nai lo lena, sa ou manao e faamalosia lou loto i le Tama Faalelagi ma faia e pei o Lona tiute le fesoasoani mai ia ou maua lau atotupe. Ae sa ou manatuina le mau i le Isaia 55:8: "Aua o ou manatu e le o outou manatu, o ou ala e le o outou ala, ua fetalai mai ai Ieova."

I le aso Sa na ou alu ai i le lotu, ma na tau mai ia te au e se tagata sa matou faatasi i le aso ua mavae sa ia



Sa ou ole atu i le Tama Faalelagi e taliina la matou tatalo ina ia mafai ona faamalosia ai le faatuatua o lou toalua ma lau fanau.

tatalo faatauanau i le Tama Faalelagi ina ia mafai ona ou maua lau atotupe. Sa ia fai mai sa ia lagonaina o le a ou mauaina. Mulimuli ane, a o ou nofo i lalo mo lau suesuega faaletagata lava ia, sa amata ona ou faitau i le *Receiving Answers to Our Prayers* na saunia e Elder Gene R. Cook, o se uso o le Fitugafulu malolo. O le itulau muamua o loo faamatala mai ai se tala ma se faafitauli e tutusa ma lou tulaga: na leiloa le atotupe a le atalii o Elder Cook, o lea na faapotopoto faatasi ai le aiga ma tatalo i le Alii ina ia latou mauaina.

Ina ua uma ona faitauina lena aafiaga, na ou faataitaiina le mea na ou aoaoina ma faapotopoto faatasi lou toalua ma lau fanau. Na matou faia se lio, ma na ofoina atu e tagata tai-toatasi se tatalo, ao augani atu i le Alii

e fesoasoani ia i matou ia mauaina le atotupe pe afai o lona finagalo lea.

Na ou molimauina muamua le mana o le tatalo, ae ina ua maea, a o ou tatalo na o au, sa ou fesili atu i le Tama Faalelagi e taliina la matou tatalo ina ia mafai ona faamalosia ai le faatuatua o lou toalua ma lau fanau.

O le aso na sosoo ai sa valaau mai ai se alii ia te au. Sa ia fai mai sa ia mauaina lau atotupe, e aofia ai ma le tupe. Sa ou tagi e pei o se tamaitiiti, aua sa taliina mai lau tatalo, ma sa faamalosia ai le faatuatua o lou aiga.

Ou te iloaina o le Tama Faalelagi, e tusa lava pe toatele naua le fanau e tausia, e tali mai lava ia i tatou taitoatas i tusa ai ma Lana lava taimi ma i Lana lava ala. ■

Luiz Marcelino, Goiás, Pasila

LAVEAIINA I LE POTU PITO I LUMA

Emasani ona faigaluega lou toalua i aso Sa, ae tuua au e nafa ma le aveina o lau fanau tama e toafa i le lotu na o au. I se tasi aso Sa faapitoa i le taimi o le sauniga faamanatuga, na fefinauai ai lau fanau laiti e toalua. Pe a ou faia ia fafia se tasi o tama i se tusi, e manao ai foi lona uso. Sa ou taumafai i meaai mama, meataalo, ma ata valivali, ae leai se mea na aoga. Sa lofituina au i lau fanau tama, o e na foliga mai e le mafai ona nofonofo filemu mo se itula e tasi.

Sa ou aumaia se tamai meataalo i fafo mai lau ato ma tuuina atu i lau tama e tasi-le-tausaga le matua. Sa vave ona ee leotele mai lau tolu-tausaga-le-matua, o Tyson, a o ia puna atu i luga o lona uso laitiiti, ma tau-mafai e fao mai le meataalo. Sa ou lagonaina le faalumaina a o ou siiina atu tamaiti laiti e toalua o loo feei, ma tauaimisa i le potu pito i luma.

Sa vave ona susu ou mata i loimata vevela. Aisea ua matuai faigata ai lenei mea? Sa ou faia le mea na finagalo le Tama Faalelagi ou te faia e ala i le aumaia o lou aiga i le lotu, e sao? Ae ua le mafai ona ou toe faia. Sa ou le lava ma maasiasi e tauivi ma lau fanau tama i sauniga faamanatuga i viaiso taitasi. Ou te lei toe manao e toe sau.

Sa ou nofo ai faatasi ma nei manatu mo na o le 15 sekone, ae sau loa mai fafo se uso ou te tau le iloaina i totonu o le potu pito i luma ia te au. O lona igoa o Sister Beus. Sa masani lava ona nofo na o ia, ona o lona toalua na auauna atu i le au epikopo ma ua matutua lana fanau. Sa ia fai mai,

Sa lofituina au i lau fanau tama, o e na foliga mai e le mafai ona nofonofo filemu mo se itula e tasi.



ATA NA TUSI E ALLEN GARN

"E te i ai lava na o oe iinei i taimi uma lava! E mafai ona ou iloa atu o loo e taumafai malosi lava. E mafai ona ma nonofo faatasi ma Tyson?" Sa le mafai ona ou mafaufau i se tali! Sa na ona lue atu o lou ulu a o ia toe taitai atu o ia i le lima, o lenei ua filemu ma fiafa, i totonu o le falesa.

Sa ou soloiese ou loimata, sii i luga lau pepe, ma savali atu ma le lotomaualalo i totonu o le falesa ina ia olioli ai i le vaega o totoe o le sauniga i le filemu.

O le Aso Sa na sosoo ai a o matou savavali atu i totonu o le sauniga faamanatuga, na sailia e Tyson lana uo fou. I le po e tatalo ai o ia, "Faafetai lava, Tama Faalelagi, mo Sister Beus. Ou te alofa tele ia te ia!"

Ua silia nei ma le tolu tausaga, ma o loo sailia pea e Tyson le falesa mo Sister Beus. O le tausaga ua mavae sa valaauna ai o ia e avea o se faiaoga o le Peraimeri ia Tyson. Sa avea o ia o se tamaitiiti sili ona fiafa.

Ou te matua faafetai lava mo Sister Beus ma lona naunautaiga ina ia alofa atu ma auaua atu i isi. Ou te iloa e mafai ona tatou faamanuaina olaga o isi pe a tatou auaua atu e pei ona faia e le Faaola. ■

Kristi Lewis, Iuta, ISA

UMA!

I le taimi o au faatalanoaga o se epikopo i se tasi o aoauli o le Aso Sa, sa ou maua ai le fiafia i le nonofo ai i lalo ma se ue lelei e talanoa e uiga i nisi o luitau sa feagai ma ia. Ina ua uma ona faalogo atu i ona popolega mo ni nai minute, sa ou lagona o le mea e tatau ona ia faia e le aunoa o le fatauina o tusitusiga paia. Sa faamanatu mai ai foi ia te au, o lana epikopo, sa tatau foi ona ou faaaauau pea lou suesueina o tusitusiga paia, o se mea lea sa ou tauivi lava e fai. O lea sa ou fautua atu ai ia avea maua ma "paaga e tali atu i le isi" i le taumafai ia sili atu le suesue pea lava pea.

I aso uma lava pe a uma ona ma fatauina a ma tusitusiga paia, ma te tesu atu le tasi i le isi le upu *Uma!* I le iloaina faapea sa faatalitali mai se isi tagata e faalogo pe na faamaeaina e le isi lana fatauga mo le aso sa o se uunaiga tele lea mo i maua uma. Afai e galo i se tasi o i maua, o le mauaina o se tesu sa avea o se faamanatu. Afai e lei tesu mai le isi tagata, sa faamanatu atu pea ia te ia. Sa ma tuuina atu i le tasi ma le isi e tauaveina lenei lui e aunoa ma le faia o le isi tagata e lagonaina le tausalaina.

Sa ma amataina le lui i le ono masina talu ai nei, ma ou te le



manatuaina se aso na ma misia ai le fatauina o a ma tusitusiga paia.

O lenei uso sa tu i luga i le taimi o le sauniga anapogi ma molimau i le lua masina talu ai ma faasoa mai lana molimau i le aafiaga lelei o le suesue i tusitusiga paia i aso uma ia te ia ma lona aiga.

Ou te faafetai mo lenei uso ma lana faaao, faapea foi ma ana tesu i aso taitasi. Ua ou vaai i auala e mafai ai e tekinolesi, pe a faaaogaina tatau, ona faamalosia o tatou olaga. Ou te matuai faafetai lava foi mo tusitusiga paia ma le auala ua latou molimau mai ai ia Keriso. Ou te iloa o le taulaga togiola a le Faaola ua mafai ai mo i tatou taitoatasati ona toe foi atu e mau faatasi ma Ia i se aso. ■

Alex Whibley, British Columbia, Kanata

Tatou te avea ma "paaga e tali atu mo oe lava" i le taumafai ia sili atu ona suesue pea lava pea i tusitusiga paia.





O LAU LIAHONA PATINO

"E le tatau ona gaugau faalelei lou faamanuiaga ma teuina. E le tatau ona faavaa pe faalauaiteleina. Ae, e tatau ona faitauina. E tatau ona e fiafia i ai. E tatau ona mulimultaia. O lou faamanuiaga faapeteriaka o le a tauaveina oe i taimi sili ona pogisa. O le a faatautaia oe i taimi matautia o le olaga. O lou faamanuiaga faapeteriaka o se Liahona mo oe lava e faatautaia iau malaga ma taialaina lou ala."

Peresitene Thomas S. Monson, "O Lou Faamanuiaga Faapeteriaka: O Se Liahona o le Malamalamā," *Liahona*, Ian. 1987, 66.



Malamalama | Lou Faamanuiaga Faapeteriaka

Saunia e Allie Arnell ma
Margaret Willden

Ua tumu le olaga i vai e le masani ai: *O fea e tatau ona ou alu ai i le aoga? O le a le mea e tatau ona ou suesueina? Pe e tatau ona ou alu i se misiona? O ai e tatau ona ou faaipoipo i ai?* Afai e tuuina atu ia te oe se faafanua patino e taialaina oe i filifiliga o le olaga, mata o le a e mulimuli i ai?

Ua tuuina mai e le Tama Faalelagi ma Iesu Keriso ia i tatou se faafanua faapena—faamanuiaga faapeteriaka—e aumaia ia i tatou le taitaiga i o tatou olaga. E ui ina ua tuuina mai ia i tatou le meaalofa o le faitalia e fai ai filifiliga i lo tatou lava loto fuatiaifo, o faamanuiaga faapeteriaka e mafai ona faasusuluina le malamalama po o a auala o le a aumaia ai le fiafia sili.

Ae o le na ona i ai o se faafanua e le lava lea. E tatau ona tatou suesue, malamalama, ma faaaoga le uiga i totonu o le faafanua. E faapena foi, ao amata ona e malamalama i le gagana o loo faaaoga i lou faamanuiaga faapeteriaka—o lau lava taiala patino

i le olaga—o le a mafai ona e iloaina po o ai oe i fofoga o le Atua ma po o ai o le a avea ai oe.

Iloa Lou Tupuaga

O le mea muamua ma le sili ona taua, o lou faamanuiaga faapeteriaka e tautino mai ai lou tupuaga, po o le ituaiga patino o ituaiga e sefululua o Iakopo (o le na mulimuli ane faaigoa ia Israuelu) lea e te sau ai. E ui e le o i tatou uma o ni suli moni o Iakopo, ua aoao mai tusitusiga paia ia i tatou o tagata o le Ekalesia e vaetamaina i le aiga o Israuelu: “Ona o le toatele e taliaina lenei talalelei o le a taua i lou igoa, ma o le a faitauina o au fanau, ma o le a tutu ae ma faamanua ia te oe lo latou tamā” (Aperaamo 2:10).

Ua faapea mai Shelisa Schroepel o Iuta, ISA, “O le iloaina o au e mai le aiga o Iakopo e fesoasoani ia te au ia malamalama ai i lou faamoemoega i lenei olaga ma le mafuaaga ua valaauina ai au i ni valaauga i le Ekalesia.”

O lou faamanuiaga faapeteriaka e mafai ona faamatalaina foi soo se faamanuiaga e fesootai ma lau ituaiga



**O le faailoaina
o vaega o lou
faamanuiaga
e mafai ona
fesoasoani e te
maua ai le taitaiga
i lou olaga.**

faapitoa. Mo se faataitaiga, o le toatele o tagata o le Ekalesia e mai le ituaiga o Efaraima, le ituaiga e i ai le tiute-tauave tupito e faasalalau atu le savali o le talalelei toefuataiina i le lalolagi (tagai i le Teuteronomie 33:13–17; MF&F 133:26–34).

Maua Fautuaga Patino

Pe a faaaogaina lelei, e fesoasoani se faafanua i se tagata malaga ia aua nei leiloa. E faapena foi, i lenei malaga

MOTUGAAFA MO SUESUEGA

- Faailoa mai le fautuaga, lapa-taiga, taleni, ma folafolaga i lou faamanuiaga faapeteri-aka. Tatalo pe faapefea ona mafai ona aoga ia te oe i lou tulaga i le taimi nei o le olaga.
- Suesue maeaea i lou faamanuiaga ma le tele o taimi i lou olaga atoa. O le fuaiupu lava lea e tasi e mafai ona maua ai le tele o uiga ia te oe i ni taimi eseese.
- Ia manatua e le taua e se faamanuiaga faapeteriaka vaega uma o lou olaga. E tusa lava pe le o taua mai se sini taua i lou faamanuiaga, e mafai lava ona avea o se mea taua ia tauivi i ai.
- Ia usiusitai i le talalelei. O faamanuiaga i lou faamanuiaga faapeteriaka e faalagolago i luga o lou amiotonu.
- Seti ni sini e saili ai i meaalofa ma atiina ae ai taleni o loo taua i lou faamanuiaga.
- Mafaufau i le mea o e agai i ai i le olaga ma le mea e te fia iu i ai. E faapefea ona ogatusa au sini ma lou faamanuiaga faapeteriaka?
- Mafaufau e fai se kopi o lou faamanuiaga faapeteriaka e faaaoga mo duesuega. E mafai ona e tusia se malamalamaga, valivali upu e tulaga ese, ma tusi mau e faatatau i lou faamanuiaga.



faaletino, o lou faamanuiaga faapeteri-aka e mafai ona ofoina atu fautuaga ma taitaiga i lou olaga. O lou faamanuiaga faapeteriaka e le na ona tau atu ia te oe le mea e fai, ae e mafai ona ofoina atu le malamalamaga patino po o fea auala-pe afai e tuliloaina i le faatuatua—e mafai ona fesoasoani e te iloa ai pe ua e faaogatusa lou olaga ma le finagalo o le Tama Faalelagi. A o e duesue i lou faamanuiaga faapeteriaka ma saili atu e ola i se ala lea e valaaulia ai le Agaga o le Alii, e mafai ona e maua le saoga-lemu, olioli, ma le taitaiga.

Ua faapea mai Gabriel Paredes o Lima, Peru, “O nisi o fautuaga sa tuuina mai ia te au i lou faamanuiaga na faatoa mafai ona ou faaaogaina atoatoa i lou aiga ina ua uma ona faamauina i lou toalua.

“Talu ai nei na matou mafaufau ai i mea e mafai ona matou faia e faamalolosia ma atiina ae ai lo matou aiga fou. Na taliina ia ma fesili e ala mai i lou faamanuiaga faapeteriaka. I lena faamanuiaga ua fautuaina ai au e faamuamua le faaaloalo, faapalepale, ma le alofa i lou aiga, aua o nisi nei o faavae taua o le talalelei a Iesu Keriso.

“A o ma taulai atu i lenei mea, na ma mafaiia ma lou toalua ona foia faafitauli. O loo i ai pea luitau faavaitaimi o se aiga, ae o loo ma fiafia. Sa ou lagonaina sa pei ua faamanatu mai e le Alii ia te au pe faapefea ona mafai ona ou maua le aiga lea na ia folafola mai ia te au. Ou te iloa e fetalai mai le Alii e ala mai i faamanuiaga faapeteriaka ma o le fautuaga o loo i totolu e tatau ona faaaogaina i o tatou olaga.”

Faalogo i Apoapoiga

E le makaina mai e se faafanua tulaga lamatia uma i luga o le ala, ae

o le mea e lelei ai, o faamanuiaga faapeteriaka e tele lava ina tuuina mai ni lapataiga e puipuia ai i tatou i o tatou olaga. O nisi o nei apoapoiga e fesoasoani e puipuia i tatou mai faatosinaga a Satani; o isi e mafai ona faamalamalamaina i tatou i le auala e mafai ona tatou faatoilaloina ai le tagata natura i totolu o i tatou.

Mo Caitlin Carr o Iuta, o nisi o lapataiga i lona faamanuiaga faapeteriaka sa le vave ona manino mai, ae o le duesueina mulimuli ane o lona faamanuiaga sa aumai ai ni malamalamaga fou.

“Ina ua maua lou faamanuiaga faapeteriaka, na lapataiina au e uiga i tagata o le a taumafai e taitaiese au mai le upu moni i tala matagofie. Ou te lei mafaufau tele i ai; sa ou maua se talitonuga maumautu i aoaoga faavae sa ou aoaoina.

“Ae ui i lea, i le tausaga na sosoo ai sa ou feagai ma ni manatu ma filosofia ia, i le taimi muamua, na foliga mai sa mauaa i le tonu ma le alofa ae leai. O nei savali na foliga mai na oo mai i soo se mea: i ala o faasalalauga, aoga, e oo lava i uo mamae. E ui lava sa ou iloa o nei filosofia sa feteenai ma le fuafuaga a le Atua, sa oo ina ou manao e lagolago uma nei manatu fou faalelalolagi *ma* le Ekalesia. E lei umi ae ou iloaina faapea ‘e leai se na te mafaiia ona auauna i alii e toalua’ (Mataio 6:24) ma e le tatau ona ou faalagolago i le poto o tagata. Na foia e le Tama Faalelagi ou masalosaloga i tusitusiga paia, ma tuuina mai le filemu i lou mafaufau ma lou loto. O se taunuuga, na faamalosia lau molimau ma ua sili atu ona ou mausali i le puipuia o mea ou te iloa e moni.”

Atiina ae Meaalofa ma Taleni

O lou faamanuiaga faapeteriaka e mafai foi ona taua ai meaalofa faaleagaga ma taleni ia ua tuuina mai e le Alii ia te oe e fausia ai Lona malo. Afai o lou faamanuiaga o loo taua ai se taleni e fou ia te oe, e mafai ona mafua mai ona e te lei mauaina le avanoa e iloa ai pe atiae ai lenei taleni. E ala i le saili ma le filiga ma le fesoasoani a le Alii, e mafai ona e maua le tomai e faaaoga ai lenei taleni ma le tele o isi.

O le atiina ae o au taleni e fesoasoani ia te oe e iloa ai mea e tulaga ese e te saofaga ai i le galuega a le Alii. E mafaufau loloto Johanna Blackwell o Kalefonia, ISA, i meaalofa ma taleni i lana faamanuiaga pe a ia lagonaina le faaosoosoina e faatusatusa o ia lava ma isi: "A o ou faitauina upu i lou faamanuiaga faapeteriaka, ou te manatua ai ua faamanuiaina au i meaalofa sa ou manaomia patino lava e manumalo ai i tofotofoga ma auai i le faanatinatiina o le galuega a le Alii.

"Sa tau mai e lou faamanuiaga ia te au lou mafaia ona alofa, faamagalo

atu, ma maua le lototele e miomio faatasi ai ma i latou o loo siomia au. A o ou faataitaia nei meaalofa, ua faamanuiaina au e le Alii i se manao faateleina e fetaiai ma fesootai ma tagata ma aganuu fou. O le taunuuga, ua faatupulaia lau molimau o i tatou o fanau uma a se Tama Faalelagi alofa, ma ua mafai ai ona ou auauna atu i isi a o tatou sailia taitasi ina ia avea atili faapei o Keriso."

Mauaina o Faamanuiaga Folafolaina

O le mea mulimuli, o a tatou faamanuiaga faapeteriaka e faaalia faamanuiaga folafolaina a le Tama Faalelagi ia i tatou pe afai tatou te tumau i le faatuatua ia te Ia. E leai se faamaoniga i le taimi e faataunuuina ai nei folafolaga, ae e mafai ona tatou iloa, afai lava tatou te ola ma usiusitai i le talalelei, o le a faataunuuina, pe i le olaga nei po o le isi.

E faalagolago Sergio Gutierrez o Nevada, ISA, i se folafolaga i lona faamanuiaga faapeteriaka i soo se taimi lava na te lagona ai le popole e uiga

i fuafuaga o lana galuega i le lumanai: "I nisi taimi ou te lagonaina ai le popole i le le mautonu o lou lumanai, ae o loo i ai se folafolaga i lou faamanuiaga faapeteriaka lea e aumaia ai pe a lou mafaufau le filemu. O lenei folafolaga e fesoasoani mai ou te iloa ai faapea afai ou te galue malosi lava ma tumau i le faatuatua, o le a ou maua punaoa e manaomia e mafai ai ona tausia lou aiga ma fausia le Eklesia. Ou te le o iloa tonu lava le ala o matata ou te fia sailia, ae o le i ai o lenei folafolaga ou te maua ai le faatuatua ma le mautinoa."

Pe afai e te mafaufau i se taimi pe o le a le finagalo o le Tama Faalelagi mo oe, e le o tuua na o oe. Na malamalama le Alii o le a e feagai ma le tele o auala eseese e mafai ona e tulimataia i lou olaga, o lea ua ia tuuina mai ai ia te oe se faafanua patino ina ia e tausia ai lou olaga ia ogatasi ma Lana talalelei. E le mafai e faamanuiaga faapeteriaka ona faia a tatou faaiuga mo i tatou, ae e mafai ona latou taitai atu i tatou i a tatou lava faaliga faaletagata lava ia. E ala i a tatou faamanuiaga faapeteriaka, ua faaalia ai ia i tatou pe faapefea ona tatou fetaui i le fuafuaga a le Alii e faapotopoto mai Israuel e ala i le aoaoina o a tatou lava itu-aiga; ua tuuina mai ia i tatou fautuaga patino, aoaiga, ma folafolaga; ma ua aoaoina i tatou e uiga i meaalofa faapi-toa ma taleni ua tuuina mai e le Tama Faalelagi ia i tatou e auauna atu ai ia te Ia. Afai lava e te taumafai e ola e tusa ai ma nei elemene uma o lou lava faamanuiaga faapeteriaka, e mafai ona e iloa o au faaiuga e faapea ua i ai i le finagalo o le Alii mo lou olaga. ■

E alala tusitala i Ilinoi, ISA, ma Niu Ioka, ISA, i le faasologa lena.



Ua saunia e le Alii se faafanua patino ina ia e tausia ai lou olaga ia ogatasi ma Lana talalelei.

Saunia mo se Malaga Fou

Saunia e Karina Martins Pereira Correia de Lima

vaiaso ao lumanai lau faaipoipoga ma le faamauga i le malumalu, sa amata ona fai si ou popole teisi e uiga i mea uma e tatau ona ou faia ao lei amataina lou aiga fou. E ui lava i le olioli tele o le taimi lena, sa ou lagona le popole e uiga i le faia o la ma faatulagaga fou, o le faavasegaina lelei o a ma tupe, mauaina o se nofoaga e teu ai a ma meatotino, ma ou tiutetauave fou uma lava o se ava. Sa ou manao ina ia mautinoa sa ma amataina le ma faaipoipoga i le ala sao e ala i le faia o se avanoa i a ma gaoioiga mo mea e taua e pei o le tausia o poloaiga ma le faaaluina o taimi faatasi o se tane ma se ava e ui lava i le pisi o o ma olaga.

A o latalata atu i le aso o le faaipoipoga, sa ou tei i se faasologa o miti taufaafefe e aofia ai soo se ituaiga o faafitauli e mafai ona aafia ai se aiga. Ona ou te sau mai se aiga alolofa ae puapuagatia, e faamatauina i finauga

matuia faifai pea ma loto nutimomoia, na sili atu ona aafia au i miti leaga nai lo le tulaga sa tatau ai. O lea i se tasi po, ina ua mavae ni nai isi po faapena, sa ou ala ae i luga ua afuafu tetele ma filifili loa e mulimuli i le fautuaga na tuuina mai e Sister Neill F. Marriott, le Fesoasoani Lua i le au Peresitene Aoao o Tamaitai Talavou, na tuuina mai i lana lauga “Gauai Atu o Tatou Loto i le Atua” (*Liahona*, Nov. 2015, 30–32). Sa ou moeiini ma tatalo, “Tama Faalelagi pele e, o le a se mea e mafai ona ou faia e aveesea ai nei mea leaga mai lou aiga?”

O le tali na taia ai au i se saoasaoa ma se malosi e peiseai na tatala mai e se tagata se faitotoa i lou mafaufau ma tuu i ai le manatu. Na uunaia au e le leo itiiti, ma le filemu, “Tau lava o le faia o mea e tatau ona e faia. Ia faamaoni i laasaga taitasi.” Na musumusu mai e le Agaga ni fautuaga faapitoa, ma sa ou lagonaina afai ou te faia ia mea, o le a lelei mea uma.”

Sa ou ataata, ma lagonaina se

E pei o Nifae na folau atu i se lalolagi e le mailoa, sa ou manaomia le faaaogaina o le faatuatua i le Alii e uiga i le amataina o se aiga.

mafanafana ua faatumulia ai lou fatafata. Na vave lava ona gallo atu popolega uma lava, aua na ou iloa e moni. Sa ou lagonaina le Agaga Paia muamua, ae e lei malosi muamua e pei ona ou i ai i lena po. Sa ou lagonaina le alofa o lo tatou Tama Faalelagi ma lo tatou Faaola ua siomia ai au, ma sa ou iloina o le mafanafana ma le



faaolataga o lo matou aiga na taua te ia i Laau e pei ona i ai ia te au.

I le avea ai ma se faamautinoaga faaopoopo, na oo mai i lou mafaufau se tala mai tusitusiga paia—le taimi na faatonuina ai e le Alii Nifae e fau se vaa: “Ma sa oo ina fetalai mai le Alii ia te a’u, faimai: Ia e fausia se vaa, e tusa ma le *ala o le a ou faaali atu ia te oe*, ina ia mafai ona ou ave o ou tagata i tala atu o nei vai” (1 Nifae 17:8; faaopoopo le faamamafa).

Na i ai Nifae ma lona aiga i le vao mo ni tausaga, ma onosaia o soo se ituaiga o puapuaga. Sa ono mafai ona ia lagonaina le fefe i le amataina o se malaga i le sami ma tuuina atu i lona fefe ia sili atu le malosi nai lo lona faatuatua. Ae na te lei faia. Na ia taliaina ma usiusitai i faatonuga a le Atua. Na i ai lona faatuatua o le a faataunuina Ana folafolaga. E lei tauina atu e le Alii ia Nifae faapea o le a le tulai mai ni afa pe o le le taia e galu le vaa. Ae sa Ia tau atu ia Nifae faapea afai na te mulimuli i Ana taitaiga, o le a mafai ona ia taitaia lona aiga ma le saogalemu i luga o le vasa i le nuu folafolaina.

Sa ou iloaina sa ou malaga foi i se vao mo le tele o tausaga, ae o lenei ua

ou i luma o le sami, ua saunia mo se malaga fou: faaipoipoga. Ua valaauina au—ma ou te manatu o le tulaga lava lena mo aiga uma o le Au Paia o Aso e Gata Ai—e fausia se vaa i le mulimuli i faatonuga a le Atua.

O le taimi lava na ma faaipoipo ai ma lou toalua, sa oo mai ai faafitauli. Na ou mai, ma na ma tauivi e faapalenai a ma fegalegaleaiga tautupe ma faatinoina uiga masani lelei uma na ma filifili e mulimuli ai.


Ae o le fautuaga na ou maua i lena po sa tumau pea i lou loto. Na ma taumafai i aso taitasi e aoao ma faapelepele le upu a le Atua i o ma loto, i le mulimuli i faataitaiga lelei a o ma taitai pele—e aofia ai Keriso—ma faaleleia atili a maua lava amioga. Sa ou mauaina se molimau e malosi atu o le tatalo ma tofo moni lava i le alofa o le Tama mo i maua. Sa amata ona sili atu lou talitonuina nai lo le fefe. Na ma iloaina ua avea faigata na ma feagai ma laasaga i le faaleleia atili. I le taimi nei ua foliga mai lo ma aiga e pei o se vaega itiiti o le lagi.

O loo ma i ai pea i le amataga o la ma malaga, ae o le faaipoipo ma amataina se aiga

o le filifiliga sili ona lelei ua ou faia. E faatumulia lou loto i le olioli pe a ou mafaufau e uiga i le sauniga o le malumalu na ma mauaina ma iloaina na faamauina e ala i le pule a le Atua. O le tele lava ona ou malamalamā i le taua o le aiga i le fuafuaga a le Tama Faalelagi ma le paia o le feagaiga sa ma osia, o le tele foi lea ona ou manao e fesoasoani i isi aiga ia maua foi lea lava sauniga.

Sa ou aoaoina faapea tatou te le manaomia le popole e uiga i le mea o le a tupu, aua “ua le foaiina mai e le Atua ia te i tatou le Agaga e matau ai; ae o le Agaga e faamalosi ai, ma alofa ai, ma mafaufau tonu ai” (2 Timoteo 1:7). E na ona manaomia lava ona tatou usiusitai, mulimuli i faatonuga na tuuina mai i tusitusiga paia ma upu a perofeta o aso nei, ma ole atu i le tatalo mo faatonuga e sili atu ona patino. Afai tatou te faia nei mea, o le a mafai ona tatou sopoia ai le vasa o nei aso e gata ai i le mautinoa faapea e tusa lava po o le a le ituaiga o faalavelave na taia ai i tatou, o le a saogalemu pea e pele ia i tatou. ■

E alala le tusitala i Parana, Pasila.



E Mafai Faapefea Ona ou Suesue i LOU MAFAUFAU ma LOU LOTO?

Ole a se mea e tatau ona e faia pe a i ai sau fesili e uiga i se aoaoga faavae, talafaasolopito, po o le faaletagata lava ia? E faapefea ona e maua se tali? Ua folafola mai e le Alii, “O le a ou tau atu ia te oe i lou mafaufau ma lou loto, e ala i le Agaga Paia” (MF&F 8:2). E faapefea ona e faaaogaina lou mafaufau *ma* le loto e iloa ai musumusuga? O ni nai manatu nei.

MAFAUFAU

Suesue, Tatalo, Faalogo

Na saunoa mai Elder Robert D. Hales o le Korama a Aposetolo e Toasefululua, pe a tatou faia “ni filifiliga taua o le olaga . . . , e faamoemoe le Tama Faalelagi ia i tatou e faaaoga lo tatou fitalia, suesue le tulaga i o tatou mafaufau e tusa ai ma matapu faavae o le talalelei, ma aumaia se faaiuga ia te la i le tatalo” (“O le Agaga Paia,” *Liahona*, Me 2016, 105).

E tutusa lava ma soo se fesili. A o e suesue, tatalo ma le faamaoni e uiga i tali e te maua i luga o le ala. O le a tuu atu e le Agaga Paia ia te oe ni uunaiga—pe i manatu, o upu i lou mafaufau, po o isi faamanatu o le tagata lava ia—e taiala ai oe i nisi o tali e te manaomia.

Faaaoga Punaoa

Suesue i tusitusiga paia, e aofia ai le Taiala i Tusitusiga Paia ma isi fesoasoani e suesue ai. E mafai foi ona e sailia isi punaoa a le AAG e pei o lauga o konafesi aoao, o Gospel Topics i le LDS.org, mekasini a le Eklesia, le Joseph Smith Paper Project, ma isi. (Tagai i le itulau e 54 mo se lisi o punaoa aoga a le Eklesia.)

Talanoa i Ai

Aua le fefe e fesili atu mo se fesoasoani. Sa faamalosiau mai Elder Ronald A. Rasband o le Korama a Aposetolo e Toasefululua, “O le a tuuina atu ia te oe se lui. . . . E tatau ona e mafaufau i se tasi [e mafai ona fesoasoani ia te oe e sue ni tali]—se uo faatuatuaaina, se matua po o ni matua, matua o matua, faiaoga, au epikopo, [po o] faufautua. . . . —ma e tatau ona e mauaina tali o nei fesili” (Face to Face broadcast, Ian. 20, 2016). Faataitai i ai! Talanoa i se tasi e te faatuatuaaina e uiga i au fesili ma sue faatasi tali.

Tatalo

Faalogo

Talanoa

Saili po o le a se mea e mafai ona e faia pe a i ai ni au fesili.

Suesue



TALI MAI LE ATUA

“O le taulimaina o fesili faamaoni o se vaega taua o le atinaeina o le faatuatua, ma tatou te faaaogaina uma lo tatou atamai ma o tatou lagona. Na fetalai le Alii, ‘O le a Ou tau atu ia te oe i lou mafaufau ma lou loto’ [MF&F 8:2]. E le o tali uma o le a vave ona oo mai, ae o le tele o fesili e mafai ona foia e ala i le suesue ma le loto ma saili atu i tali mai le Atua.”

Elder Neil L. Andersen o le Korama a Aposetolo e Toasefululua, “O Le Faatuatua e Le Tupu Faafuasei, ae e ala i Filifiliga,” Liahona, Nov. 2015, 66.

Suesue

Tatalo

Faalogo

Onosai

FATU

Suesue, Tatalo, Faalogo

O laasaga taua nei mo le manatunatu loloto i ai i lou mafaufau faapea foi ma lou loto. Na saunoa Peresitene Dieter F. Uchtdorf, Fesoasoani Lua i le Au Peresitene Sili, “Afai e te manao e iloa upumoni faaleagaga, e tatau ona e faaaogaina meafaigaluega sao. E le mafai ona e mauaina se malamalamaaga o upumoni faaleagaga i meafaigaluega e le mafai ona maua ai” (“Mauaina o se Molimau o le Malamalama ma le Upumoni,” Liahona, Nov. 2014, 22). O le Agaga Paia o le meafaigaluega lea tatou te iloa ai mea faaleagaga. O lea pe a e tatalo ma faalogo i le Agaga, o le a e mafai ona maua ni tali i se taimi.

Ia Onosai

Na faamatalaina foi e Peresitene Uchtdorf, “O le faateleina o le liliu atu o o tatou loto ma mafaufau i le Atua, o le faateleina foi lena o le malamalama faalelagi e oo mai i o tatou agaga.... E faasolosolo malie, o mea na muamua foliga mai e puaoa, pogisa, ma mamao ese e oo ina manino, malamalama, ma tatou masani ai” (“Mauaina o se Molimau i le Malamalama ma le Upumoni,” 22). O le saili mo ni tali e mafai ona avea ma se faagasologa umi. Ae afai e te naunau e faalogo mo tali, e tusa lava pe alu ai le taimi, o le a e mauaina.

Faataitai le Faailoaina o Uunaiga

O le tele ona e faailoaina uunaiga ma naunau e faatinio pe a musumusu mai le Agaga i lou loto, o le faigofie foi lea ona iloa uunaiga faaopoopo i le lumanai. E mafai ona e “lagona ai ua sao” po o le oo i se “pogisa o le mafaufau” pe afai e sese (tagai i le MF&F 9:8-9). Atonu e te lagonaina foi se faamanatu malu, se lagona o le filemu, po o isi lagona e patino lava ia te oe. E silafia e le Alii oe, ma Na te silafia le auala o le a e malamalama ai i le Agaga. O le a la tuuina atu ia te oe le taitaiga alofa lea e tulaga ese ia te oe. O lea ia faaauau pea le faalogo ma faaauau pea le faataitaia. ■

FAAPATINOINA *Lau* SUESUEGA OLE TALALELEI

*Siaki motugaafa nei mo
le suesueina o le talalelei
ma le sailia o tali i au
fesili faaleagaga.*

Saunia e Bethany Bartholomew

Mekasini a le Ekalesia

Faapefea ona e duesue a o e sailili mo ni tali i se fesili faaleagaga pe tusa lava pe na o le taumafai e malamalama atili ai i tusi-tusiga paia? O lau tala e faapitoa lava ia te oe—e patino lava. E eseese uma lava uiga masani mo suesuega mo le aoga a tagata taitoatasi, ae o nisi taimi e galo ai ia i tatou, e mafai ona tatou faapatinoina foi la tatou suesuega o le talalelei. O le isi taimi e i ai sau fesili faaleagaga po o se aoaoga faavae, faataitai nisi o motugaafa nei e fuafua ai po o le a le ala e sili ona aoga mo oe.



1. FATU

Fai se lisi, se siata, po o se faafanua. (Tagai i lalo ifo mo se faataitaiga.)

Fai se ata o le suesuega. Tusi i lalo upu ma manatu ma ona faafesootai lea o i latou i laina ma lio e faaali atu ai auala latou te fesootai ai.



FATU SE LISI, SIATA, PO O FAAFANUA

Onisi taimi e aoga le vaai i le faatulagaina o ou manatu i le taimi o suesuega o le talalelei e ala i le tusiina i se lisi, siata, po o se ituaiga o faafanua. O se faataitaiga lenei o le ituaiga o siata e mafai ona fatu e se tagata pe a suesue i le Tusi a Paulo i le feagaiga fou. E mafai ona e fatuina se lisi, siata, po o se faafanua o lau lava faaaogaina o soo se faiga e sili ona aoga ia te oe. la amata se mea fou! la sue ni auala malie e faatulaga ai lau suesuega o le talalelei.

O TUSI A PAULO

TUSI	FAATASI MA SE SOA?	TUSITUSIGA MAI IA...?	AUTU FAAPITOA O LE TUSI
Faataitaiga: 1 Timoteo	E le o taua	Laodicea (tagai i le faamatalaga i le faaiguia o le 1 Timoteo 6)	O le aoaoga faavae moni, o le Faaola, tatalo, faatuatua ma le alofa mama, uiga auau mama faaletaitaiga, liliuese, tausia o e matitiva, tumau i le faamaoni, aloese i 'oa faalelalolagi

2. TUSI

Faamaumau manatu ma uunaiga e te maua i le taimi o lau suesuega o tusitusiga paia i se tusitalaaga suesue ma iloiloina soo na manatu.

Tusi i lalo ou mafaufauga ma lagona ina ua uma ona e tatalo, e tusa lava pe o uunaiga e le fesootai tonu lava ma le autu o loo e suesueina. Tagai i mea e aoao atu e le Agaga ia te oe i le aluga o taimi.

Tusi i lalo au fesili i se tamai api, i luga o lau telefoni, po o se api i talaane o lou moega e faamanatu atu ia oe ma fesoasoani ia te oe e mafaufau ai pea e uiga i mea e te aoaoina i aso uma.

4. SAILIILIGA

O le suesue i le sailiiliga e fesoasoani i tusitusiga paia ma i le initonetesi (tagai i lalo ifo mo se lisi o punaoa aoga a le AAG).

Saili i le LDS.org mo vitio ma pese e uiga i le mea o loo e suesueina.

Suesue le anotusi. Sailiili le talafaasolopito po o mataupu na siomia ai le autu po o le mau o loo e suesueina.



3. FAALOGO MA TALANOA

Talanoa i se matua po o se tai-tai faatuatuaina. Galulue faatasi i ai. Atonu e umi se taimi, ae o le a ouluua tuputupu ae i le faagasologa.

Aoao se isi tagata. Feauauai i le faasoaina atu o mea ua *lua* iloaina. Ia talanoaina mea ua e aoaoina mai le tasi ma le isi.

Faaologologo leotele i tusitusiga paia po o isi tala o le AAG ma punaoa.



I TUSITUSIGA PAIA

- Taiala i Tusitusiga Paia
- Kanona (mea na tutupu mai le Feagaiga Tuai ma le Feagaiga Fou ua faatulagaina i le faasologa o taimi ma aso e tau talafeagai)
- O Evangelia e tutusa (o tala e uiga i le Faaola mai Evangelia a Mataio, Mareko, Luka, ma loane na faatulagaina e ala i mea na tutupu, nofoaga, ma aso e tau faatalafeagai)
- Faaliliuga a losefa Samita o le Tusi Paia
- Faafanua ma ata
- Faapuupuuga o le taiala



I LE LDS.ORG

- Tusitusiga paia (scriptures.lds.org)
- Konafesi aoao (conference.lds.org)
- Autu o le talalelei (topics.lds.org)
- Mekasini (liahona.lds.org)
- Talafaasolopito o le Ekalesia (history.lds.org)
- Fesoasoaniga mo suesuega (scriptures.lds.org)
- O lesona ma punaoa faaleaoaoga (lds.org/go/41754a)
- Potutusi o ala o Faasalalauga a le AAG (lds.org/media-library)
- Fesoasoani i luitau (lds.org/go/41754b)



ISI PUNAOA I LE INITONETI

- Talafaasolopito o Aiga (familysearch.org)
- Alaleo Mamona (mormonchannel.org)
- Tusitusiga paia na taua i le konafesi aoao (scriptures.byu.edu)
- Potu o Talafou Mamona (mormonnewsroom.org)
- Galuega faafafeatalai, ma le faasoaina atu o le talalelei (mormon.org)
- Galuega Faatino o Pepa a losefa Samita (josephsmithpapers.org)

5. FAI

Faatino tala mai tusitusiga paia po o isi punaoa. E faapefea e le tuuina o oe lava i le tulaga o le tagata ona fesoasoani e malamalama atili ai i le mea o loo e duesueina? O a ni tulaga talitutusa faapea i lou olaga?

Ia faia se filifili o mau e fesootai ai tali e te maua i tusitusiga paia. (Tagai i lalo mo se faataitaiga.)

FAI SE FILIFILI O MAU E SUESUE

Onisi taimi e fesoasoani le tusia o se faamatalaga o ni nai mau e aofia ai le autu lava lea e tasi. Siaki le Taiala i Tusitusiga Paia mo mau e faatatau i le autu o loo e duesueina. Ona faaaoga lea o vaefaaamatalaga ma le anotusi e fesootai ai mau ma nisi faamatalaga e uiga i le mataupu lava e tasi. Tusi le mau e sosoo ai i le filifili lea i le laina i autafa o le mau ua mavae atu ma faaaauai ai pea. E mafai foi ona e duesue mo lauga o le konafesi e uiga i se autu faapitoa e fesoasoani ia te oe i lau saililiga (tagai i le lisi o autu i le conference.lds.org). O le filifili o mau e duesue ai i le autu o le faamoemoe o se faataitaiga.

FILIFILI O MAU E SUESUE

Mau e uiga i le faamoemoe:

Amata: Moronae 7:40



Eteru 12:4



Moronae 7:3



Mataupu Faavae ma Feagaiga 138:14



Moronae 7:41



Faaiuga: Alema 46: 39 (Tusi Moronae 7:40 i le laina i autafa o le mau lenei.)

O lauga e uiga i le faamoemoe:

- Epikopo Dean M. Davies, "O faamanu-iaga o le Tapuui," konafesi aoao Oke. 2016.
- Elder Paul V. Johnson, "Ma e Leai Foi se Toe Oti," konafesi aoao Ape. 2016.
- Peresitene Dieter F. Uchtdorf, "O le a la Tuu Oe I Luga o Ona Tauau ma Ave Oe i le Aiga," konafesi aoao o Ape. 2016.
- Elder L. Whitney Clayton, "Filifili e talitonu," konafesi aoao Ape. 2015.
- Peresitene Boyd K. Packer (1924 - 2015), "O le Mafuaaga mo lo Tatou Faamoemoe," konafesi aoao Oke. 2014.
- Peresitene Henry B. Eyring, "O Se Tofi o le Faamoemoe e Le Mafaatauina," konafesi aoao Ape. 2014. ■





Saunia e Elder
Quentin L. Cook

O Le Korama
a Aposetolo e
Toasefululua



PE FAAPEFEA ONA MAUA LE FILEMU MONI

Ole sini faamoemoeina faalelagi o tagata lelei i soo se mea, o loo i ai ma o le a i ai pea lava e le aunoa, o le filemu lea i le lalolagi. E le tatau lava ona tatou fiu i le faataunuina o lenei sini. Peitai, na aoao mai Peresitene Iosefa F. Samita (1838–1918) “E le mafai lava ona oo mai i le lalolagi lena agaga o le filemu ma le alofa . . . sei vagana ua maua e tagata le upumoni a le Atua ma le savali a le Atua . . . , ma iloa e paia lona mana ma lana pule.”

Tatou te faamoemoe ma le naunau-tai ma tatalo mo le filemu lautele, ae tatou te mauaina le ituaiga o filemu folafolaina o le **taui o le amiontonu** o ni tagata taitoatasi ma aiga. O lea filemu o se meaalofa folafolaina o le misiona ma le taulaga togiola a le Faaola.

O le filemu e le na o se saogalemu po o le leai o ni taua, vevesiga, fetau-aiga, ma fefinauaiga. O le filemu e maua mai le **iloaina e silafia e le Faaola po o ai i tatou** ma iloa e i ai lo tatou **faatuatua ia te la, alofa ia te la, ma tausia Ana poloaiga**, e oo lava ma ae maise

foi le i ai o faigata ma faalavelave matuia (tagai i le MF&F 121:7–8).

“O fea lou filemu? O fea ou te mapu ai pe a ua le mafai e isi punaoa ona faaatoatoaina au?” (“O Fea Lou Filemu?” *Viiga*, no. 68). **O le tali o le Faaola**, o le punavai ma le tufuga o le filemu. O Ia o le “Alii o le filemu” (Isaia 9:6).

Faalotomaualaloina i tatou lava i luma o le Atua, tatalo pe, salamo i agasala, ulu atu i vai o le papatisoga ma se loto momomo ma se agaga salamo, ma avea ma soo moni o Iesu Keriso o ni faataitaiga maoae o le amiontonu lea e tauia i le ola ai i le filemu.

O le Ekalesia o se sulufaiga lea e mafai ai e soo o Keriso ona maua ai le filemu. Fai mai nisi o tupulaga talavou i le lalolagi, o i latou e faaleagaga ae le lolotu. O le lagonaina e faaleagaga o se laasaga lelei muamua lea. Peitai, o totonu o le Ekalesia tatou te maua ai le **faaaumeaina, aoaoina, ma fafagaina ai e le afioga lelei** a le Atua. Ae sili atu ona taua, o le pule o le perisitua i le Ekalesia lena e sau-nia **sauniga ma feagaiga paia**

e fusia faatasi ai aiga ma faaagavaaina ai i tatou taitoatasi e toe foi atu i le Atua le Tama ma Iesu Keriso i le malo selesitila. O nei sauniga e aumaia le filemu aua o feagaiga ia ma le Alii.

O malumalu o nofoaga ia e faatino ai le tele o nei sauniga paia ma o se punavai foi o le malutaga o le filemu mai le lalolagi. O i latou e **asiasi atu i laufanua o le malumalu** pe auai i maimoaga i le malumalu, e lagonaina foi lena filemu.

O le Faaola o le punavai o le filemu moni. E ui lava foi i tofotofoga o le olaga, ae ona o le Togiola a le Faaola ma Lona alofa tunoa, o le a tauia ai i latou o e ola amiontonu i le filemu patino (tagai Ioane 14:26–27; 16:33). ■

Mai se saunoaga o le konafesi aoao ia Aperila 2013.

O Tusi ua Galo, Molimau ua Manatuaina

O mata uma sa ia te au. Pe mafai ona ou puipuia le Ekalesia i lau molimau faigofie?

Saunia e Abegail D. Ferrer

I se tasi tausaga, sa ou faia ai se sini e faaleleia lau aoaoga faaleagaga. Ou te aumaia ni tusi o le Ekalesia, tamaitusi, tusi lesona, ma tusitusiga paia i soo se mea, e aofia ai le aoga, a o ou matelaina mo afioga a le Atua. Ae o au taumafaiga na faagesegese ina ua ou pisi e suesue mo se suega puupuu o le a faia.

I se tasi aso na taitai atu ai e lo matou faiaoga se talanoaga lea na ia fesili mai ai i tamaiti aoga uma lava i totonus o le potu e le Katoliko e tutu i luga. Sa na o a'u le Au Paia o Aso e Gata Ai i le vasega. E toaono foi isi tamaiti aoga na tutu i luga.

Ona fesiligia lea o i matou: O le a le lotu e te auai? O ai na amataina? Na faapefea ona faatulagaina la outou Ekalesia?

O au le tagata mulimuli na tali. Sa ou popole i le iloaina ou te le i aumaia a'u tusi o le Ekalesia, ae sa ou taumafai e manatua mea na ou suesueina. Na oo mai se fuaiupu o le Tusi Paia i lou mafaufau:

“Ia e faatuatua ia Ieova ma lou loto atoa; ae aua le faalagolago i lou lava atamai.

“Ia e manatua o ia i ou ala uma, ona faatonuina ai lea e ia lava ou ala.” (Faataoto 3:5–6).

Sa ou tu i luma o le vasega ma le lototoa, ma ua galo ou popolega.

“Na ou faaapea atu o a'u o se tagata O Le Ekalesia a Iesu Keriso o le Au Paia o Aso e Gata Ai. Sa ou faasoa atu le tala i se tama talavou, o Iosefa Samita, lea na vaai i le Atua. Sa ou lagonaina le mu o lou loto, ma sa tafe ifo loimata mai ou mata. Sa ou faasoa atu na faatulagaina le Ekalesia i le aso 6 o Aperila, 1830, ma na ou molimau atu na valaauina se perofeta a le Atua ma na toefuatai mai le perisitua. Na ou molimau atu, na ou iloa o nei mea uma lava e moni.

O le tele o itula o suesuega o le talalelei sa matua aoga lava. Na fesoasoani ia te au e puipui ai lou faatuatua ma faasoa atu le talalelei. Sa ou mitamita ina ua, mavae ni nai vaiaso, ae auai mai au uo e toafa o lau vasega i le lotu.

Sa aoao mai e lena aafiaga ia te au le taua o se molimau. I le taimi muamua sa ou manatunatu pe aisea na le uunaia ai au e le Alii e aumai au tusi i lena aso. Semanu e fesoasoani ia te au e tali atu atoatoa fesili na fai mai. Ona ou iloaina lea e le tau manaomia lo tatou taulotoina o mea uma e uiga i le Ekalesia pe faalagolago i mau fesootai—e tatau ona tatou suesue, ola ai, ma faasoa atu le talalelei, ae faalagolago i le Agaga Paia. Atonu e lei i ai ni au tusi, ae sa i ai lau molimau. ■

E alala le tusitala i Cagayan, Filipaina.



SALATOU VAAI IATE IA

O nei tagata na vaai moni lava i le Faaola
toetu, ae e mafai foi ona avea oe ma se
molimau a Keriso i lau lava ala.

Ole a sou manatu pe o le a faapei le molimauina o le Faaola toetu? Mo le faitau selau o tagata i le taimi o Iesu, e lei manaomia lo latou vaaifaalemafaufau i ai—sa latou ola ai. Ua tau mai e tusitusiga paia faapea e le itiiti ifo ma le sefuluua ni taimi ua faamaumauina i le Feagaiga Fou ma nai isi taimi i le Tusi a Mamona na faaali ai le Alii toetu i tagata. Na molimauina e nei tagata se tasi o vavega aupito silisili i le talafaasolopito: o le faatoilaloina e Iesu Keriso o le oti, ma ua mafai ai e i tatou taitoatasina ona toe ola mai. Ofoofogia, a ea?

O lea la le uiga tonu lava o le avea ma se molimau a Keriso? Sei o tatou siakiina ni nai taimi i tusitusiga paia ma mafaufa pe faapefea e i tatou, e tusa lava pe le vaai tino ia te Ia, ona mafai foi ona avea ma molimau ia Keriso.

Maria le Makatala

O Maria le Makatala o le uluai molimau. O le taeao o le aso Sa ina ua mavae le Faasatauroga, sa ia alu atu ai i le tuugamau ma nai isi tamaitai e uu le tino o le Alii. Ina ua iloa atu e Maria se tuugamau avanoa, sa tagi o ia. Sa faalatalata atu se tasi mai tua ma fesili atu, “Funa e, Aisea e te tagi ai?” Vaai faalemafaufau i lona tei ina ua ia iloaina o Iesu lea, ua toetu mai le oti. (Tagai Ioane 20:1-18.)




PENNANT © ISTOCK/GETTY IMAGES



O Soo e Toalua i Luga o le Ala i Emau

Sa savavali Kaleopa ma se tasi soo i le ala i Emau ina ua faatasi atu ia i laua se tagata ese. La te lei iloaina le la soa fou, ae i le taimi o la latou taligasua o le afiafi faatasi, na tofitofi ai e le tagataese le areto. Sa pupula o la mata, ma sa la iloaina ai sa latou malaga faatasi lava ma le Faaola i le taimi atoa. “E lei mu ea o ta loto i totonu ia i taua … ?” sa la tuufesili i le tasi ma le isi, ma mafaufau loloto i le faamamoniga e faapea na la lagonaina moni lava o la lea na faatasi ma i laua. (Tagai Luka 24:13-34.)



O Apostolo e Toasefulu

O soo e toalua o e sa malaga i Emau faatasi ma Keriso na toe foi i Ierusalem ma tau atu i Apostolo e toasefulu e uiga i le la aafiaga. A o la talanoa, na faailoa atu le Faaola lava ia ia i laua, ma faapea atu, “la outou vaavaai mai i o’u lima ma o’u vae, aua o a’u lava lenei: ia outou tagotago mai ia te au, ma ia vaavaai mai; aua o le agaga e leai sona aano ma ni ivi, pei o a’u nei ua outou vaavaai i ai. (Tagai Luka 24:36-41, 44-49.)

O Le Apostolo o Toma

E lei i ai le Apostolo o Toma i le taimi na muai faaali atu ai le Faaola i isi Apostolo, o lea na te lei talitonu ai ua toetu mai Keriso. I le tasi le vaiaso mulimuli ane, na toe faaali atu ai Keriso i Apostolo. O le taimi lea na *i ai* Toma iina, ma ona ua ia vaai i le Keriso, sa talitonu o ia ua toetu o ia. Ua lapatai atu lesu ia Toma e faatatau i le faatoa talitonu pe a vaai, "Ua e talitonu aua ua e vaai mai ia te a'u: Amuia o e le vaai mai, a e talitonu mai pea." (Tagailoane 20:24-29.)



ATA VALI A THOMAS SAUNIA E BRIAN CALL

O Apostolo e Toasefulutasi i le Sami o Tiperia

I se tasi aso ae lei leva ona mavae le Toetu, na o ai nisi o Apostolo e fagogota i le sami o Tiperia ae lei faamanuiaina. O le taeao na sosoo ai, na faaali atu ai le Faaola ma fautuaina i latou e lafo le upega i le itu taumatau o le vaa. Ina ua latou faia, na tele naua ia na maua i le upega lea na tau le mafai ai ona latou toso maia! Ina ua uma ona taumamafa faatasi, sa aoao atu le Faaola e uiga i le taea o le auauna atu i isi, ma faapea atu, "Fafaga au mamoe." E faaaoga e Apostolo le vaega o totoe o o latou olaga i le faia o mea tonu lava na –aoaoina o tagata e uiga ia Kerisoma i nisi tulaga, e oo lava ina latou tuu atu o latou ola mo le galuega. (Tagai loane 21:1-22.)

O LE KERISO TOETU I LE SAMI O TIPERIA, SAUNIA E DAVID LINDSEY



Sa Nifae i le laueelele o Amerika

I le taimi o le Faasatauroga, na faatafunaina le laueelele o Amerika e mafuie, afi, isi mala faalenatura ma aso e tolu o le pogisa i le faailoga o le maliu o le Faaola. Mulimuli ane, na afio ifo mai le lagi Keriso ma asiiasi atu i se motu o tagata e 2,500 na potopoto i tafatafa o le malumalu i Nuumau. Na la valaaulia tagata ia tagotago i faailoga o manua i Ona lima ma vae ma le itu, ma ofoina atu se lauga, ma faamanuiaina fanau a sa Nifae taitoatas. Na sili atu le toatele o tagata na faapotopoto mai i le aso na sosoo ai, ma na asiiasi atu le Faaola ma aoaoina i latou. Na iu lava ina faatuina e le au so le Ekalesia a Keriso, ma na maua e sa Nifae se molimau mamana faapea o i latou ma sa Lamana foi na liuaina i le Alii. (Tagai i le 3 Nifae 11-18; tagai foi 3 Nifae 8-10; 4 Nifae 1.)

Molimau o Aso La ma Aso Nei

Na faaali atu foi Keriso i le toatele o isi tagata, e aofia ai nisi o tamaitai o e na malaga atu i le tuugamau ina ia fesoasoani ia Maria le Makatala i le uuina o le tino o Keriso, o se vaega o tagata e silia ma le 500 alii, Iakopo, ma Paulo. (Tagai i le Mataio 28:9; Galuega 9:4-19; 1 Korinto 15:6-7; tagai foi i le 3 Nifae 19; 26:13.)

Atonu tatou te le maua le avanoa e vaai ai i le Faaola e pei ona sa faia e nei molimau, ae e mafai lava ona avea oe o se molimau a Keriso. E mafai lava ona e sailia le Faaola, e pei ona sa faia e Maria ina ua alu o ia i le tuugamau, e ala i le aoao atili e uiga ia te Ia. Pe e mafai foi ona e faaaogaina lou faatuatua ia te Ia e ala i le tausia o poloaiga ma mulimuli i fautuaga a perofeta. Pe e mafai ona e iloa faamanuiaga a le Faaola i lou olaga, e pei ona faia e soo e toalua a o savavali i Emau. O lenei vaitau o le Eseta, mafaufau i le uiga o le avea ma se molimau a Keriso. O nei tagata o ni molimau moni lava na vaai tino lava i le Keriso Toetu— ae e le o le ala e tasi e mafai ona tatou molimau atu ia te Ia i lou olaga. ■

AOAO IA TE IA



“A o e lagonaina le molimau a le Agaga Paia ia [Keriso], faamautu ma toe faamautu i lou agaga le tele o manatu ma tulaga, a o e taumafai e faasusulu atu le malamalamo o Ana faataitaiga i lou olaga i lea aso ma lea aso, ma a o e molimau atu i isi ma fesoasoani ia i latou e aoao, ma mulimuli ia te la, o oe lava o se molimau a lesu Keriso.”

Elder D. Todd Christofferson o le Korama a Aposetolo e Toasefululua, “Avea o se Molimau a Keriso,” *Liahona*, Mati 2008, 63.

O LA TATOU AVANOA

UA TUUINA MAI E LE ATUA IA I TATOU NI MEAFAIGALUEGA

Ole uso o lou tama o se tusiata ma e gaosia ni tamai vaa laau i totonu o fagu tioata. E manaomia ai le tele o le taimi, nau-nautaiga, ma le taumafaiga ina ia faia.

I se tasi aso na ou vaai ai i ana meafaigaluega uma lava ma matauina ai le auala sa faaaogaina ai meafaigaluega taitasi mo se mamanu faapitoa po o le vaneina o le vaa. A o ou vaai atu ia te ia o galue, sa ou ofo lava i le ala na te faaaogaina ai meafaigaluega i le faiga o nei vaa. Sa ou manatua ai le tala ia Nifae i le fauina o se vaa (tagai 1 Nifae 17–18). Sa ia fausia e tusa ai ma le ala a le Alii, ae le o le ala a tagata. Ua tuuina mai e le Atua ia i tatou ni meafaigaluega e fau ai a tatou lava vaa i Lana ala. O tusitusiga paia, faatuatua, ma le alofa o le Atua o meafaigaluega ia e tatau ona ou faaaogaina i lou lava olaga ina ia fausia ai ma le faaeteete lou lava vaa e aunoa ma ni taetaei. O loo ou aoaoina i aso taitasi ia avea ma se soo o le Alii. ■

Maria Mercedes G., Monagas, Venezuela



LAGONAINA O LE TUUATOATASI

Ose tautotogo malulu i Tenimaka. Sa faatoa amata lau misiona talai, ma sa tauivi ma lau molimau. O au o se tagata liliu mai mo le na o le 19 masina ma na tumu i le le mautonu e uiga i le feagai ai ma se atunu ese, se gagana sa le mafai ona ou tautala ai, ma se gasu o auala sa ou le mafai ona malamalamā i ai. O au tatalo o le loto faafetai na vave ona avea ma ni tuuaiga oona: “Le Atua e, aisea ua e tuua ai na o au lava?”

I se tasi taeao sa ou aioi atu ai ia te Ia i le tatalo. Ae nai lo le fesili atu i le “aisea” ma le ita i lou loto, sa ou augani atu mo se molimau o le moni

o le talalelei ma le aveeseina o ou masalosaloga.

Ina ua uma le tatalo, sa ou tatalaina au tusitusiga paia. Sa ou susueina i le Teuteronome 31:6: “Ia outou faamalolosi ma outou lototetele, aua tou te fefefe; ma aua foi le matatau i o latou luma; aua o Ieova lou Atua, lua te o faatasi ma ia; na te le tuua oe, na te le lafoai ia te oe.

Sa faatumulia lou loto i le olioli a o ou iloaina le tali i lau tatalo: sa i ai pea lava le Atua iina i le taimi atoa. Sa na o Lona faatalitali mai mo tatalo faamaoni nai lo le tuuaia ua tuulafoaiina.

O le a le tuua lava au e le Atua, e tusa lava pe foliga mai ua leai se faamoeome i mea uma. Ma e mafai ona tatou lagonaina Lona alofa e ala i le tatalo ma Ana tusitusiga paia. ■

Clayton E., Texas, ISA

O LOU AVANOA

Etalaina e le *Liahona* ou aafiaga ma manatu i le ola ai i le talalelei. Auina mai lau tala i le liahona.lds.org po o le imeli i liahona@ldschurch.org. Faamolemole ia aofia ai lou suafa atoa, uarota ma le siteki, ma le faatagaga a matua.

SAVALI I LUMA LE AUTAU KERISIANO

“O alii ma tamaitai, o e mananao ina ia maua ni nofoaga i le malo selesitila,
o le a latou iloaina e tatau ona latou tauivi i aso taitasi.”

Aoaoga a Peresitene o le Ekalesia: *Polika laga* (1997), 299.)



“E mafai faapefea ona ou iloaina o loo faafofoga mai le Atua i au tatalo?”

Ole tatalo o se faamanuiaga sili, ma ua folafolaina mai ia i tatou faapea e faafofoga mai pea le Tama Faalelagi, ae e masani lava ona manaomia ai ni galuega e iloa Ana tali.¹

Mafaufau e uiga i lenei mea: a le o le faafofoga mai o le Atua ia te oe po o le Na te le faafofoga mai. Afaia Na te le faia, ia o le mea moni lava e leai se uiga i le tatalo. Ae afaia Na te faia (ma Na te faia!), e tatau ona tatou fuafuaina pe faapefea ona *matuai* talanoa atu ia te Ia i le tatalo, iloaina tali, ma ia agai i luma ma le faamaoni.

Pe a tatou lagonaina Na te le o faafofoga mai, atonu e tatau ona tatou aafia i se tuputupu ae faaletagata lava ia. Atonu e te faia ia te oe lava ni nai fesili: Pe o ou mama? Pe o lelei ou faamoemoega? Pe o ou naunau e fai mea e finagalo ai o Ia?² Afaia o le tali i nei mea taitasi o le ioe, e mafai ona e faatuatuaina faapea o “le Alii lou Atua o le a . . . tuuina mai ia te oe tali i au tatalo” (MF&F 112:10). Ia manatua, o nisi taimi e oo mai ai tali i ni auala maaleale pe e lei mafaufauina.

Afaia na e tali atu leai i nisi o na fesili, e le o tuai lava! Faia ni suiga manaomia i lou olaga ina ia mafai ona e maua le Agaga. Ia naunau e faatino musumusuga e te mauaina.

Ma aua nei galo e maua uma e tagata taitoatasi ni tali eseese. Tatalo ina ia aoaoina oe e le Agaga Paia pe faapefea ona *e* mafai ona iloa tali. Atonu o le a le faigofie ona iloaina tali i le taimi muamua, ae e pei lava o sooo se isi lava tomai: o le faataitai e atoatoa ai. Ia faatuatua ma talitonu faapea o le Tama Faalelagi e faafofoga mai i *taimi uma* lava.

FAAMATALAGA

1. Tagai i le o le Mataio 7:7; Iakopo 1:5–6; Alema 33:4–11; Mataupu Faavae ma Feagaiga 8:1–2.

2. Tagai i le Richard G. Scott, “Aoao ia Iloa Tali i Tatalo,” *Liahona*, Ian. 1990, 34.



Faalogo i le Agaga

Taumafai e faalogo i le Agaga Paia. E faalogo-inia e tagata le Agaga Paia i ni auala eseese, atonu o loo e faalogo-

logo mo se leo filemu, ma le itiiti ae oo mai le uunaiga o se lagona. Ou te iloa o le Agaga Paia o le a tau atu ia te oe mea uma e tatau ona e iloaina—tau lava o lou faalogo.

Elise G., 13 tausaga, Alberta, Kanata

O tali i le Ekalesia

O se tasi taimi sa ou maua se masalosalo tele lava pe alu i se tafaoga faamasani ma se tagata le lotu. I se tasi Aso Sa i le sauniga faamanatuga, na tuuina mai ai e se tamaitai se lauga lea na foliga mai na tuu sao lava mai ia te au. O le taimi lena, sa ou maua ai se faamautinoaga ua tali mai le Alii i lau tatalo. O le taimi muamua, sa ou le mautonu ai e uiga i le mea e fai, ae sa faamafanafanaina au e le Agaga Paia, lea na faatumulia lou loto i le olioli ma le lototoa. E tali mai le Atua ia i tatou e ala i lagona, mafaufauga, o tusitusiga paia, ma e oo lava i failauga i le lotu!

Karen V., 19 tausaga, Minas Gerais, Pasila



Manatua Pe O Ai Oe

Ou te iloa e faafofoga le Atua ia i tatou ona o le tatalo e maua ai se lagona o le filemu, toomaga, ma le alofa i totonus o lou loto. Ou te vaai faapea Na te faasaolotoina au mai mea matautia mai lea aso i lea aso ma e Na te puipuia lou aiga, ma ou te lagonaina le alofagia e ia. Ae ou te lei alu i le aoga, ou te faia lava i



taimi uma le autu a tamaitai talavou; e fesoasoani ou te manatua ai o au o se afafine o le Tama Faalelagi, o le e alofa mai ia te au.

Nicol M., 19 tausaga, Lima, Peru



O Le Tatalo a Se Tamaitiiti

Ou te iloa e faafogaga le Tama Faalelagi i au tatalo ona o upu nei i le pese a le Peraimeri "O le tatalo a le tamaitiiti" (*Tuisipese a Tamaiti*, 12): "Le Tama e, o e i ai iina? Pe o lagona mai tatalo uma? Fai mai e mamao le lagi, ae ou te lagona le lata mai pe a tatalo." Pe a ou manatua lena pese, ou te iloa o loo faafogaga mai o Ia aua ou te lagonana le Agaga ma Lona alofa e le iu mo au. A ou manatua e alofa o Ia ia te au, ou te lagonaina le mafanafana ma iloa Na te faafogaina au tatalo.

Elaine B., 16 tausaga, North Carolina, ISA

Saili I Ai

Sa ou manatunatu i se taimi pe mafai ona faafogaina e le Atua lau tatalo, ona ou lagonaina ai lea o le tali i lou loto. Sa ou faalogo i se tasi o molimau e uiga i le tatalo, ma na mafai ona ou lagonaina le Agaga Paia. O le isi au fautuaga o le fesili atu i ou matua, epikopo, po o isi tagata o lau uarota. E mafai foi lava ona e tatalo mo le fesoasoani i le autu lenei!

Joshua S., 13 tausaga, Oregon, ISA

Faalagolago ia te la.

E faafogaga mai i taimi uma le Tama Faalelagi i a tatou tatalo, ae o nisi taimi e foliga mai Na te le o taliina a tatou tatalo aua atonu Na te le tali mai ia i tatou i le ala po o le taimi

tatou te mananao ia te Ia e tali mai ai. E tatau ona tatou naunau e gauai atu o tatou loto i Lona finagalo ma maua le faatuatua faapea Na te silafia le mea e sili mo i tatou. E alofa le Tama Faalelagi ia i tatou ma o le a taumafai i taimi uma e fesoasoani ia i tatou e aoao ma tuputupu ae a o Ia tali mai i a tatou tatalo.

Mosiah M., 17 tausaga, Iuta, ISA

Ole Atu ona Outou Maua ai Lea

E ala mai i tusitusiga paia, ua aoaoina i tatou o le a faafogaina a tatou tatalo e le Atua ma o le a tali mai pe afai tatou te tatalo atu ia te Ia ma le faatuatua ma le loto faamaoni. O le a tatou lagonaina i o tatou loto le faamautinoaga e faafogaga mai o Ia ia i tatou, o se lagona o le filemu ma le toafimalie. Tatou te lagonaina foi o le a lelei mea uma pe a tatou mulimuli i le finagalo o le Tama. Pe a tatou masalosalo e faafogaga mai o Ia ia i tatou, e tatau ona tatou sailia le taitaiga i tusitusiga paia ona fesili atu lea pe moni mea o loo tatou fatauina.

Constanza L., 20 tausaga, Bío Bío, Chile



AUA LE FIU

"la usiusitai, manatua taimi na outou lagona ai le Agaga i le taimi ua tuanai, ma ole atu i le faatuatua. O le a oo mai lau tali, ma o le a e lagonaina le alofa ma le filemu o le Faaola. Atonu e le oo mai i le vave po o i le mamanu e te manao ai, ae o le a oo mai le tali. Aua le fiu!"

*Elder James B. Martino o le Fitugafulu, "Liliu Atu ia te la Ma o le a E Mauaina Tali," *Liahona*, Nov. 2015, 59.*

Tatalo ma le faamaoni.

A uma lau tatalo, e mafai ona e faafogaga i lagona ma manaoga na e oo mai i lou loto. Atonu o se tasi o na lagona o le tali i lau tatalo. Pe a tatou tatalo ma se loto faamaoni ma le manatu moni i ai, e tali mai lo tatou Tama Faalelagi e tusa ai ma lo tatou faatuatua ia te Ia. E le tali mai o Ia e na ona faamalie ai lo tatou fialoa.

Jean-Claude N., 16 tausaga, Kasai-Central, Democratic Republic o Congo

FESILI O LE A SOSOO MAI

"E mafai faapefea ona ou fai atu i a'u uo e aua le talanoa ma le le alofa po o le le tala-feagai e uiga i isi?"

Auina mai lau tali ma, afai e manaomia, se ata manino lelei ae lei oo i le aso 15 o Me, 2017, i le liahona.lds.org (kiliki le "Submit an Article") pe imeli i le liahona@ldschurch.org.

Faamolemole ia aofia ai faamatlagaga nei: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e i lalo ifo o le 18 ou tausaga, o le faatagaga tusitusia a ou matua (e talia foi le i-meli) e lolomina ia lau tali ma lou ata.

E ono faapupuuina tali mo le uumi po o le manino.

Saunia e Julie C. Donaldson

E faavae i se tala moni

*“O le a ou taumafai ia salamo, ia sili atu,
ia tatalo” (Children’s Songbook, 98).*

Ete manatu e te sili atu nai lo tagata uma
lava aua e te le palauvale,” Na fai mai ai
Nikolai i le malologa.

“E le moni lena tala,” o le tala lea a Andrei.

“Aisea la e te le faia ai se upu palauvale se tasi?
Na o se tasi? E te le otu ai lava. E
palauvavale uma a isi tagata.”

Na faamimigi tauau o
Andrei. “Ou te le fia faia lava.”

Sa iloa e Andrei e sese le
palauvale ma e aluese ai
le Agaga Paia. Na manao
Andrei ia mafuta le Agaga
Paia ma ia. O lea e le
palauvale ai o ia.

Sa fou Andrei i le
aoga, ma o le taimi
nei, e na o Nikolai lava
i lana vasega ono na
manao e avea ma
ana uo. Ae na faa-
velave pea Nikolai
ia te ia e uiga i
le palauvale i
aso taitasi. Ma
i aso taitasi na
faasolo ina le
lava Andrei
i le fai atu e
leai. Ma le isi,
sa fefe Andrei
nei le toe avea
Nikolai ma ana
uo, ma o le a tuu-
atoatasi moni ai
lava o ia.

O Andrei ma le Upu Leaga



“Na o le fai lava o se upu
palauvale se tasi,” na fai mai
ai Nikolai i le tuua o le
aoga. “Ona ou le
toe faalavelave
lea ia oe.”

Na iu lava
ina matuai le
lava Andrei i
le faalavelave
soo mai ia te
ia o lea na ia
faia ai se upu
palauvale se
tasi—o se tasi e

le leaga *tele*.

Na lue atu le ulu o Nikolai.
“Lelei, ua avea nei oe o se
tasi o i matou.”

Ina ua mavae lena, na
talanoa atu foi isi uo a
Nikolai ia Andrei. Sa latou
aai ma taaalo lakapi faatasi
ma ia i le malologa. Ae
o le i ai i le vaega



o uo a Nikolai sa pei o le savali atu i totonu o le one-one mimiti. O le tele lava o le tafafao o Andrei ma i latou, o le tele foi lena o lona talanoa ai ma amio e pei o i latou. Ma latou te palauvavale uma lava. E faateleina. Sa latou talie ma faatiga e le tasi le isi. Sa latou faia ni tala le mafaufau e uiga i o latou faiaga. Sa latou feita ma amio sauia i le tele o taimi. Na amatamata lemu lava ona ita soo Andrei ma maua ai le tele ma le tele o mafuaaga e palauvavale ai.

I se tasi po ina ua o Tina ma Tama, na fai ai se finauga a Andrei ma lona tuafafine matua o Katya e uiga i le faafiafiaga e matamata ai. E aunoa ma le mafaufau i ai o Andrei, na oso mai se upu palauvavale mai lona gutu.

Na foliga faateia Katya. "Ou te taua ia Tina."

Sa tamoe Andrei i lona potumoe ma ato mai le fai-tooa. O le a se mea o tupu i nei tagata? Aisea na latou faaita ai o ia i taimi uma? Ina ua foi mai ona matua i le fale, na tatala lemu le faitotoa e Andrei ma faalogoina Katya ua faapea atu, "Tina, na palauvavale mai Andrei ia te au."

"O le a?" Sa faalogoina le tei o tina. "E le palauvavale lava Andrei."

Na tapuni le faitotoa e Andrei ma faapau ifo i lalo o lona moega. Sa ia mafaufau e uiga i le tele o le eseesege ua i ai nei o ia talu ona amata ona ia palauvavale. Ua umi se taimi talu ona ia lagonaina le Agaga Paia.

Na tootuli Andrei i autafa o lona moega ma tatalo. "Tama Faalelagi pele e, ou te faamalie atu sa ou sauia ma ita. Ou te faamalie atu sa amata ona ou palauvavale. O le a ou faia le mea e sili atu."

A o tatalo Andrei, sa faatumulia lona loto i se lagona mafanafana. Mo le taimi muamua lava talu ona amata ona ia palauvavale, sa ia lagonaina moni lava le fiafia. Sa ia iloa e alofa le Atua ia te ia, ma sa mafai ona ia lagonaina le Agaga Paia. Sa ia lagonaina le faamagaloga ma iloa e mafai ona ia suia ma ia sili atu ona lelei.

Ina ua uma lana tatalo, sa ia tau atu ia tina le mea moni ma faatoese ia Katya. Na maua e Andrei se lagona

sili atu ona lelei ina ua mavae lena mea. O le manaia ia o le faalogona pe a salamo.

O le aso na sosoo ai i le aoga, e lei aai faatasi Andrei ma le vaega a Nikolai. Nai lo lena, sa ia nofo i talaane o nisi tamaiti na te lei iloaina. O le a umi se taimi, ae na iloa e Andrei o le a ia maua ni uo e lelei ma fiafia ma e le palauvavale. E pei lava o ia. ■

E alala le tusitala i Itua, ISA.



LUI O LE FMT

"O le a ou faaaoga ma le faaaloalo suafa o le Tama Faalelagi ma lesu Keriso. O le a ou le palauvale pe faaaoga upu masoa" (O Ou Tulaga Faatalalelei).

I le tasi itu o se fasi pepa, tusi ai pe tusi se ata pe o a ou lagona e maua mai i upu lelei. I le isi itu, tusi ai pe tusi se ata pe o a ou lagona e maua mai i upu leaga.

Faitau Levitiko 19:12. Aisea e taua ai le faaaogaina o suafa o le Tama Faalelagi ma lesu Keriso ma le faaaloalo?

Fesili atu i se matua po o se taitai pe aisea e tatau ai ona tatou faaaoga gagana lelei ma pe na faapefea ona faamanuiaina ai i latou.

Ua ou luiina au lava ina ia . . .





Saunia e Elder
David A. Bednar

O Le Korama
a Aposetolo e
Toasefululua

E mafai faapefea ona ou fesoasoani i lou aiga ia malolosi?



Tau i lou aiga e te alofa ia i latou ma
faaali atu e ala i au amioga.



Tuu atu lau molimau e uiga i mea e te iloa e moni
e ala mai i le molimau a le Agaga Paia. Faasoa
atu lau molimau i tagata e sili ona e alofa i ai.



Ia auai ma le naunautai faatasi ma lou aiga i tatalo
ma suesuega o tusitusiga paia faaleaiga. Ia auai
malosi i afiafi faaleaiga ma faia ina ia malie.



Ia faamaoni i le aoaoina, ola ai, ma ia alofa
i le talalelei toefuataiina a lesu Keriso.



Saunia e
Joy D. Jones

Peresitene Aoao
o le Peraimeri

Saunia mo le MALUMALU i Aso Uma

Ina ua iva ou tausaga, sa i ai sou faiaoga ofoofogia o le Peraimeri e igoa ia Sister Kohler. Sa ou matamuli lava, ma sa matua agamalu o ia o lea sa ou fiafia ai e faatasi ma ia. I se tasi aso na ia tuuina mai ai ia i matou taitoatasii se fasi pepa. Sa matou taufai tusia i lalo mea na matou mananao e fai pe a matou faasolo ina matutua. Sa ou tusia: "Alu i le kolisi ma faaipoipo i le malumalu." Sa ou faapipiina lau pepa i luga o le faitotoa o lau kapoti. I le po, e susulu mai ai le malamalama mai le moli o le auala mai i lou faamalama. Sa ou tilotilo atu i lau fasi pepa. Na ia faamanatu maia ia te au ou te fia alu i le malumalu.

I lena taimi, sa na o le 12 malumalu i le lalolagi. Sa ou fia alu i malumalu taitasi.

Soo se taimi lava na fuafuaina ai e lou tina ma lou tama se tafaoga, sa la aveina pea lo matou aiga i le malumalu. Sa matou nonofo i Oregon, ISA. O le malumalu aupito latalata ane sa mamao ese i le 600 maila (965 km) i Cardston, Alberta, Kanata. Sa leai se ea malulu o le matou taavale. Sa matou nonofo ma lou uso ma lou tua-fafine i le nofoa pito i tua. Matou te tautauina se iesolo susu i fafo o le faamalama o le taavale. Ona matou tuuina lea i o matou ua ia maua ai sina malu.

O se fiafiaga pe a matou vaaia mulimuli ane le malumalu. Ou te lei iloaina tele e uiga i mea e faia iina, ae sa foliga fiafia i taimi uma ou matua pe a o mai i fafo. Sa ou iloaina sa sili ona ttau le malumalu. Sa ou iloaina o le maota o le Alii. (I le ata, o a'u lena o loo ofu paepae.)



Ina ua atoa lou 12, sa tatau ona ou faia ni papatisoga i ni nai malumalu. Ina ua ou feiloai i lau tane i le lumana'i, sa ou iloaina sa ia fiafia tele foi i le malumalu! Sa ma faaipoipo i le malumalu o Manti Iuta.

E mafai ona e saunia mo le malumalu i aso uma. Alu i le malumalu pe a e mafaia. Pai atu i ona puipui. Ina ua 11 tausaga le matua o le atalii o lou atalii o Jarret, sa ia galue i talafaasolopito o aiga i aso sa uma ma lona tama. Sa ia maua le tele o igoa o tuaa. I le taimi nei ua 12 ai ona tausaga, ua ia faia papatisoga i le malumalu mo nei tuaa!

Pe a e i ai i le malumalu, e mafai ona e savali i le mea e savali ai Iesu. O Lona maota lea. Ou te faamoemoe o le a e tatalo i aso uma mo le Tama Faalelagi e fesoasoan ia te oe e saunia e ulu atu i le malumalu ma lagona ai Lona alofa. ■

E Susulu Fetu

Saunia e Jane McBride

E faavae i se tala moni

"E manaia le i ai iinei faatasī ma outou i le Peraimeri" (Children's Songbook, 254).

Sa pipii mau Fetu i ona slavalava. Sa lagona pea le le masani e ofu se ofu talaloa i le lotu. I lana lotu tuai o teineiti sa ofuvae po o ofuvae pupuu i le Aso Sa. Ae le faapena i lana lotu fou. Faatoa uma ona papati-soina o ia ma lona tina i totonu O Le Ekalesia a Iesu Keriso o le Au Paia o Aso e Gata Ai.

Sa mapuea Fetu a o tilotilo i le faaata. Sa fiafia o ia e alu i le lotu mo le uluai taimi o se sui aloaia o le lotu, ae sa popole foi o ia. O le taimi muamua, sa la nonofo ma tina i le taimi atoa i le lotu. Ae o le taimi lenei ua alu o ia i le Peraimeri.

Sa emoemo mata o Fetu i lona ata. Ae faapefea pe afai sa le fetaui o ia iina? Ae faapefea pe a le fiafia isi tamaiti ia te ia?

"Fetu? Ua e sauni?" O le valaaau lea a Tina.

Sa savali atu fetu i le fogafale i lalo. "Pe o ou



aulelei?" na ia fesili ai.

Na ataata atu Tina.
Ua e aulelei a.

Sa faanonou atu foliga o Fetu. "E tatau ona e faia lena tala.
O oe o lou tina."

"E sa'o oe. E tatau ona ou *faia* lena tala.
Aua e moni."

Sa ataata laitiiti Fetu. Na masani lava ona i ai se ala e faia e lona tina na te maua ai se lagona e sili atu.
Ae sa i ai pea lagona popole i lona manava.
Ae faapefea pe afai e

leai se tasi o isi tamaiti e fia talanoa ia te ia? Sa i ai ni ana uo i le aoga, ae sa le o ni tagata o lana lotu fou.
Sa ia moomoo maimau pe ana i ai se uo se tasi la te o faatasi i le lotu.

"Faatoa ou manatuaina se mea e tatau ona ou *faia*,"
sa ia fai atu ia Tina.

Sa ia toe tamoe i le falealuga ma tootuli i autafa o lona moega. "Tama Faalelagi pele e, faamolemole fesoasoani mai ia te au e faia ni uo. Ou te talitonu e moni mea na aoao mai e faifeatalai, ae ou te fefe."

Sa tootuli pea Fetu i ona tulivae ma faalogo. Ina ua mavae sina taimi, sa ia lagonaina se lagona matagofie, ma le filemu, ma sa ia le toe popole tele.



Sa nonofo Fetu ma Tina i le lotu i talaane o se aiga faatasi ma teineiti e toatolu. Na faailoa mai e matua i laua lava ma amata ona talanoa ma tina ao lei amataina le sauniga. Na fesoasoani Fetu i teineiti i le valiina o se ata o Iesu.

Na agai atu Epikopo Andrews ia i latou. "Sister Cunningham! Fetu! "E ese le lelei o le vaai atu ia te ouluia i le aso" Na ia tuu atu ia i laua taitasi se ataata alofa ma se faatalofa. Na galo ia fetu le lelei tele o tagata uma i le lotu. Atonu o le a ia maua lava se uo.

Ina ua mavae le sauniga faamanatuga sa alu loa Fetu i le Peraimeri. Sa ia vaai atu i isi tamaiti ma le popole ao ia nofo i lalo. Sa latou talanoa i le tasi ma le isi ma na foliga mai e lei matauina o ia. Na tau pe le fatu o Fetu. O le a tuuatoatasi pea lava o ia.

Ae savali mai loa i totonu o le potu se teineititi e tupulaga ma Fetu. "E foliga popole foi o ia," na mafaufau ai Fetu. "E mafai ona ou alu e talanoa ia te ia."

Sa ia manava loloa, ona savali atu lea i le teine. "Talofa, o lou igoa o Fetu. Ou te fou. E te fia nofo i ou tafatafa? Sa to e Fetu lona sela. Pe o le a manao le teine e avea ma ana uo?

Sa liua le gutu o le teineititi i se afa-ataata. "O au o Sera. Ou te fou foi. Faatoa siitia mai lou aiga iinei mai Ontario."

"Na ma papatiso ma lou tina i le lua vaiaso talu ai," o le tala lea a Fetu. "Ou te le mautinoa po o le a lau mea e tatau ona fai."

Sa faateleina le ataata a Sera. "O le a ta fuafuaina faatasi."

Sa nonofo faatasi Fetu ma Sera ma le la vasega. O nisi taimi e tepa atu ai Fetu ia Sera ma ataata. Sa ataata atu foi Sera. Sa lagona e Fetu le to'a ma le fiafia. Sa ia iloaina ua tali mai le Tama Faalelagi i lana tatalo ma fesoasoani ia te ia mauaina se uo.

Na fesili atu le faiaoga ia Fetu ma Sera e faailoa mai i laua lava.

Na tu i luga Fetu. "O lou igoa o Fetu Cunningham. O maua ma lou tina na papatiso i le lua vaiaso talu ai." Sa malolo o ia, ma sa i ai se ataata i ona foliga a o ia tilotilo atu i lana uo fou. "Ma o lau uo lenei o Sera." ■
E alala le tusitala i Colorado, ISA.

MAFAUFAU E UIGA I AI

E faapefea ona mafai ona e faafeiloaia se tagata e fou i le lotu?

Avea o se Malamalama

Saunia e Elizabeth Pinborough

"Ia tuu i luga lo outou malamalama ina ia susulu atu i le lalolagi. Faauta o au o le malamalama lea e tatau ona outou tuu i luga." (3 Nifae 18:24).

E mafai ona avea i tatou ma malamalama i isi e ala i le avea ma se uo moni. Faitau manatu nei ma faaopoopo i ai nisi o ou lava manatu. O taimi uma lava e te tusia ai se igoa o se tagata e te manao e faaali atu i ai le alofa, valivali atili le la.

1. **Alofa i isi:** E mafai ona e faia se eseesege tele i o latou olaga! E i ai le alofa o Keriso mo i latou, o lea ia taumafai e faaali atu ia i latou lena alofa.

O ai: _____

2. **Faamagalo:** Afai e faatiga mai se tagata ia te oe, taumafai e vaai i mea mai la latou vaaiga. E mafai ona e fesoasoani e faamaluina o latou loto pe afai e te faamagalo atu.

O ai: _____

3. **Uunaia:** Faamalo atu i au uo i o latou malosiaga. Tagai i le mea e sili ia te i latou e tusa lava pe latou te manaomia le faaleleia atili. O le avea ma lou tagata e silisili e fesoasoani foi ia i latou!

O ai: _____

4. **Faalogo i le Agaga Paia:** O au upu e mafai ona suaia ai se tulaga le lelei i le lelei. E mafai ona fesoasoani le Agaga Paia ia te oe ia iloa upu e fai atu ma le auala e faaali atu ai le agalelei.

O ai: _____

5. **Aua le faitala:** E mafai ona faatiga upu le alofa. Tuu atu i isi le avanoa o le masalosalo, ma aua le amanaiaina manatu le lelei.

O ai: _____

6. **Lagolago au uo:** Tau lava ina ia auai mo se gaoioiga o taaloga a se uo po o se tala faatino o le aoga e mafai ona fesoasoani ia latou lagonaina ai lou alofa.

O ai: _____

7. **Valaaulia isi e aoao e viga i le talalelei:** E tusa lava pe latou te le taliaina mea e te fai atu ai, ua e faaali atu e lava lou popole e faasoa atu ai.


O ai: _____

8. **Faauo atu i ituaiga eseese o tagata:** O isi e tele naua mea lelei e faasoa mai. Na fesoasoani Keriso ma alofa i tagata uma e tusa lava po o le a le tulaga.

O ai: _____

Talai Atu le Talalelei

Faaaoga ata nei o le talafaasolopito o le Eklesia e faasoa atu ai le talalelei!



Samuelu Samita

Ailama Samita

Pale P. Palate

Ina ua uma ona faatulagaina le Eklesia, na finagalo le Tama Faalelagi ia faalogo tagata uma e uiga i le talalelei. O le faifeautalai muamua o le uso o Iosefa Samita o Samuelu. Na aoaoina foi isi e Ailama, le uso matua o Iosefa, e uiga i le talalelei. I se tasi aso na tau atu ai e se tagata e igoa ia Pale P. Palate ia Ailama sa ia faaluina le aso atoa e faitau ai le Tusi a Mamona. Na aoaoina atili o ia e Ailama e uiga i le Eklesia, ma sa papatisoina o ia. Ona auauna atu ai lea o Pale i se misiona! Sa avea o ia ma se taitai i le Eklesia.

Saili isi ata faatusa o le talafaasolopito o le Eklesia i le liahona.lds.org.



Mafaufau ia Iesu

Saunia e Lindsay Tanner

E faavae i se tala moni

Sa fiafia Mía. O lona taimi muamua lea i le lotu! Na faamatala atu e faifeautalai i lona aiga lenei Ekalesia. Sa latou filifili e o mai.

Sa tilotilo solo Mía. Sa ia vaaia se ie paepae i luga o se laulau. Sa i ai se mea i lalo ifo.

“O le a le mea o i lalo o lena ie?” Sa fesili atu ai Mía i se tasi o faifeautalai.

Na ataata Sister Hanson. “O le faamanatuga.”

Faamanatuga O se upu tele tele. Sa faalogo Mía i faifeautalai o tauina atu

ia Tina ma Tama e uiga i ai. Ae sa ia le mautinoa pe o le a.

Na usuina e tagata uma se pese. Sa aveese e ni alii se toalua le ie paepae. Sa i ai i lalo ni fata o falaoa! Na vaai atu Mía ao la vaevaeina le falaoa ini fasifalaoa.

Ina ua uma le pese na fai e se alii se tatalo. O isi alii na pasiina atu le falaoa i tagata uma lava.

“O le falaoa e fesoasoani ia i tatou ia manatua ai le tino o Iesu,” o le musumusu atu lea a Sister Garcia.



Sa aumai e Mía se fasi falaoa. Na ia vaai faalemafaufau ia Iesu o tu i ona luma.

Ona faia lea o se isi tatalo. Na pasi atu e alii ni fata ma tamai ipu vai laiti.

“O le vai e fesoasoani ia i tatou e manatua ai le toto o Iesu,” o le musumusu atu lea a Sister Garcia. “Na Ia maliu mo i tatou ona e alofa o Ia ia i tatou.”

Na aumaia e Mía se ipu vai. Sa ia mafaufau e uiga i le tele o le alofa o

Iesu mo ia. Sa ia lagonaina e pei ua Ia tuuina mai ia te ia se opo lapoa lava.

Na tuuina atu mulimuli ane e Sister Hanson se tamai ata o Iesu ia Mía.


“Tatou te aai i le falaoa ma inu le vai e manatua ai Iesu ma folafola atu e mulimuli ia te Ia.” Sa ataata o ia. “O le a sou manatu i le faamanatuga?”

Sa tilotilo atu Mía i le ata o Iesu. Na ia manatua le lagona mafanafana sa ia te ia. Sa ataata o ia. “Sa maoae! Ou te alofa ia Iesu.” ■

E alala le tusitala i Kalefonia, ISA

Sa Tuuina Mai e Iesu ia i Tatou le Faamanatuga

Saunia e Kim Webb Reid



Sa silafia e Iesu ua toeitiiti lava maea Lona taimi i le lalolagi. Sa Ia faapotopoto faatasi Ana Aposetolo mo le Talisuaga Mulimuli. Sa Ia tuuina atu ia i latou le faamanatuga ma talosagaina i latou e manatua pea o ia.



Sa alu atu Iesu i se faatoaga e tatalo ai. Sa Ia tiga mo agasala ma mea faanoanoa uma i le olaga o tagata uma. Ona Ia maliu ai lea i luga o le satauro ma sa tanumia i se tuugamau.

I le taeao o le Aso Sa ina ua mavae le maliu o Iesu, na o mai nisi tamaitai ma oo mai i le tuugamau. Ua fuli ese le maa i le faitotoa, ma sa gaogao le tuugamau! O fea na i ai Iesu?



Ona ua toe soifua! Sa vaai Maria le Makatala ia Iesu. Na ia asiati atu i Ana Apostolo ina ia latou saunia e aoao atu le talalelei pe a mavae lona toe foi i le lagi.




Pe a ou tago i le faamanatuga, ou te manatua ai Iesu.
Ou te manatua sa ia soifua ma maliu ma na toetu mai
o ia mo a'u ina ia mafai ona ou toe ola! ■



Lili o le Eseta

E mafai ona faamanatu mai ia i tatou e lili matagofie papae o le Eseta le aso ofoo fogia lea na toetu mai ai Iesu. O lili papae e lima ua natia i le ata lenei. O taimi uma lava e te maua ai se lili se tasi, fai atu se mea se tasi ua e aoaoina e uiga ia Iesu.





**Saunia e Elder
Bruce R. McConkie
(1915-1985)**

O Le Korama
a Aposetolo e
Toasefululua

O LE MANA O LE ATUA

*O le faatuatua o le mana ma o
le mana o le perisitua.*

Ua avea le Atua ma Atua aua ua ia te Ia le faatuatua atoa, ma le mana atoa, ma le perisitua atoa. O le soifuga ua Ia soifua ai ua ttau o le ola e faavavau.

Ma o le tulaga lea tatou te avea ai e faapei o Ia o le tulaga lea tatou te maua ai Lona faatuatua, maua ai Lona mana, ma faaaoga ai Lana perisitua. Ma pe a tatou avea e faapei o Ia i le tulaga atoatoa ma le faamaoni, ona tatou maua foi lea o le ola e faavavau.

O le faatuatua ma le perisitua e o faatasi. O le faatuatua o le mana ma o le mana o le perisitua. A uma ona tatou mauaina le faatuatua, tatou te maua le perisitua. Ona, tatou tuputupu ae lea i le faatuatua, e ala i le mauaina o le perisitua, mauaina o le mana atoa, tatou te avea ai e faapei o lo tatou Alii.

O lo tatou taimi iinei i le olaga nei ua vaetofia e avea ma se taimi o le vaavaaiga ma o le suega. O lo tatou avanoa a'o i ai iinei e faaatoatoa ai lo tatou faatuatua ma tuputupu ae ai i le mana o le perisitua. . . .

Na sili atu le tele o mea na faia e le perisitua paia e faaatoatoa ai tagata i ona po o Enoka, nai lo soo se isi lava taimi. Na ttau i lena taimi o le faatulagaga a Enoka (tagai i le MF&F 76:57),



o le mana lea na liua ai o ia ma lona nuu. Ma sa liua i latou aua na latou faatuatua ma faaaogaina le mana o le perisitua.

Ma o Enoka lea na faia ai e le Alii se feagaiga e faavavau e faapea o i latou uma o e maua le perisitua o le a maua le mana, e ala i le faatuatua, e pulea ai ma faafoe mea uma i le lalolagi, e tetee atu i autau a atunu, ma tu atu i le mamalu ma le faaeaga i luma o le Alii.

O Mekisateko o se tagata o lea faatuatua, "ma sa faia e lona nuu le amiontonu, ma sa maua ai le lagi, ma sa saili i le aai o Enoka" (Faaliliuga a Iosefa Samita, Kenese 14:34). . . .

O le a, la, le aoaoga faavae o le perisitua? Ma e faapefea ona tatou ola ai o ni auauna a le Alii?

O lenei aoaoga faavae e faapea o le Atua lo tatou Tama, o se tamalii faamamaluina, e atoatoa ma ua faaeaina o

le ua i ai le malosi uma, le mana uma, ma le pule uma, e silafia mea uma ma e le iu Ona uiga auaumama uma, ma o loo soifua i le iunite o le aiga.

Ma e olioli lo tatou Tama Faavavau i lenei tulaga maualuga o le mamalu ma le atoatoa ma le mana ona e atoatoa Lona faatuatua ma o Lana perisitua e le faatapulaaina.

E faapea o le perisitua lena o le igoa tonu lava lena o le mana o le Atua, ma afai tatou te fia faapei o Ia, e tatau ona tatou maua ma faaoga Lana perisitua po o le mana e pei ona Ia faaaogaina. . . .

Ua tatou maua le mana, e ala i le faatuatua, e pulea ma faafoe ai mea uma lava, faaletino ma le faaleagaga; e faia ai vavega ma faaatoatoa ai olaga; e tutu ai i luma o le afioaga o le Atua ma avea e faapei o Ia, aua ua tatou maua Lona faatuatua, Ona tulaga atoatoa, ma Lona mana, pe i se isi faaupuga, le atoatoa o Lona perisitua.

O lenei, la, o le aoaoga faavae o le perisitua, e sili atu nai so se isi lava mea ma e leai se isi lava mea e mafai ona sili atu nai lo le perisitua. O le mana lenei e mafai ona tatou maua e ala i le faatuatua ma le amiontonu. . . .

E moni lava e i ai le mana i le perisitua—o se mana lea tatou te sailia ia maua e faaaogaina, o se mana lea tatou te tatalo ma le naunautai ina ia i ai i o tatou luga ma luga o a tatou fanau e faavavau. ■

*Mai se lauga i le sauniga perisitua aoao ua faa-
ulatalaina "O Le Mataupu o le Perisitua," Liahona,
Julai 1982, 51; mataitusi tetele ua faalaugatasia.*



**O ISI AU MAMOE,
SAUNIA E ELSPETH YOUNG**

Na asiasi atu le Alii toetu i Ana "isi mamoe" (3 Nifae 15:21) i le laueelele o Amerika ma isi nofoaga. O sa Nifae na "tuu atu o latou lima i ona itu, ma latou tagotago i tulaga o fao i ona lima ma ona vae, ma sa latou faia lenei mea i le o atu i luma taitoatas i seia oo ina latou o atu uma ma vaai i o latou mata ma tago i ai o latou lima ma latou iloa mautinoa ai ma molimau ai o ia lava lea o le na tusi i ai perofeta o le a afio mai" (3 Nifae 11:15).

Ei Ai Foi i le Lomiga Lenei

MO TALAVOU MATUTUA

Malamalama i Lou **Faamanuiaga Faapeteriaka**

O faamanuiaga faapeteriaka e le tau maia ia i tatou mea uma o le a tutupu i o tatou olaga, ae latou te tuuina mai se faafanua patino e mafai ona fesoasoani e taitai atu ai i tatou i le fifia tele o loo faapolopolo mai e le Tama Faalelagi mo i tatou taitoatasи.



i. 44

MO LE AUTALAVOU



i. 58

SA LATOU VAAI **IA TE IA**

O i latou o ni molimau o le Keriso toetu.
O le auala e mafai ai ona tatou tutu
atu o ni molimau i le aso.

MO TAMAITI

Sa Tuuina Mai e Iesu ia i Tatou le Faamanatuga

Tatou te aai ma feinu i le faamanatuga i vaiaso uma.
Ae pe o iloa e lau fanau pe aisea?



i. 76